

武功縣志

卷一

地理志

建置志

地
170-71

35

31-30

31

35

31

31

31

35

31

31

31

35

31

31

31

35

31

31

31

35

31

31

31

35

31

31

31

嘉慶甲戌年刊

續真武功縣志

綠野書院藏板

續武功縣志序

原夫方志流別出自禮經體例淵源肇諸史部故聖人言禮必文獻有徵列國名書亦春秋著號然則志乘有作明備宜宗經曲體要貴法馬班也固矣明康氏海撰武功縣志起上古終正德己卯例著七篇其書長於取裁短於辨例而詞意高潔選擇精嚴規仿龍門得其斷制覈厥宗旨在元和九域之間非樂宋諸家所能企及夙稱名志亦復何愧繼此三經修纂成於康熙壬寅雍正癸丑乾隆甲辰皆各爲一書易致散佚予前撫陝西偶讀康氏志欲合三志續前志後以便檢閱而未得其暇嘉慶十八年癸酉武功令張君樹勳有志編纂適延長令王君森文緣事罷官王君爲會稽章實齋先生學誠門人得聞志乘體例因屬二君合纂續志是冬書成其書依據三次遞修舊本參以鄉先生孫檢討景烈所撰部

序

封聞見錄並紳耆采訪新冊合爲一編事無罣漏而義例恪遵康氏則續志體裁宜然譬諸布帛雖體有廣幅而製無別裁爾雅曰繼旒曰旆廣狹異製烏能成其旆哉予於是冬移撫粵東瀕行二君乞一言弁其首予喜二君能成予志因臚列始末以識修輯梗概焉是爲序

賜進士及第廣東巡撫上元董教增撰

原序

夫志者史之所取材也。合而爲史。散而爲志。則志不可無也。然美惡者俗。利病者法。苦樂者情。賢不肖者人。污隆者運。以至災祥因革。忠臣孝子。烈女貞媛。可爲憂喜。可爲法戒者。靡不具焉。顧事弗彙。則遺蔓弗芟。則冗言弗信。則誣詞弗責。則俚合衆美而成之。此所謂文質彬彬者也。邑乘久闕。自正德十五年。以迨今日。歷百有餘禩。而志不一出。君子蓋喟然嗟焉。先大父休寧公。蓋嘗述之。竟齋志以歿。今雖疆域猶昔。而法制之變更。人文之代讎。以至官師隱德。種種不一。卽在近世。已失其半。詢之故老。恍然如夢。若不及時編入。則久而散亡。後有作者。復何所憑以掇拾乎。我梅嶼李公。浙右儒宗也。以豈弟君子。來涖茲土。甫下車。首崇文教。士子咸切矜式。不期月而綱振目張。美政歷然。備舉前因。茶臺許公訪邑志之未續者。乃以纂修重任。委諸余小子。維熙謏昧不文。譬之執越說燕人。且笑之矣。但命不敢諉。蒐遺典。竄僻聞。謬爲銓次。太史公舊志昭若日星。茲不復贅。祇就後所未及。見而記者。緝而續之。淺鄙無序。念有深愧。夫豈敢侈然自號爲文。特勉成一帙。以卒先公之業。博雅君子。可供覆瓿云爾。至捐俸命工。昭示來茲。以垂諸不朽。皆我公締造圓成之力。而鄙人士不敢忘所自云。

康熙元年歲次壬寅秋八月邑後學高邑令張文熙撰

原序

我

朝鼎興。百有餘載。盛烈光乎重洽。德茂偃乎八區。率土攸攸。遷善罔置。於是公卿言天下。又安承平無事。海內山川。土田政事。風俗人民之美。靡可勝記。若非垂之記牒。則事與年晦。恐無以闡發幽

潛表揚

聖治。

天子可其奏。乃

命直省宏開館局纂修通誌。附詳其事於古。而秦省則以家 泰
憲寓舟先生總裁其事。先生博雅宏才。今膺茲任。宜其綜覈詳明
條分縷貫。而無有遺義。雖古之班馬。何以加焉。華承

命試用秦省。得與校讐之末。聽事日久。雖未能窺公之奧。而亦喜
有以得公之意也。事未竣。華承檄宜君。宜君小邑也。無誌。華乃卽
公之所以爲省誌者。創宜君誌。宜君人不吾非也。逾年調宰。今武
邑。邑固有有明康殿撰撰誌。但迄今二百餘年。雖典型在望。而其
文漫漶。不可復識。卽一修於張明府之手。然

序

三

而修之。得邑人南阿山人續著縣誌私稿。惜多未備。華與孝廉崔
孟宣等。爲之覆核增刪。期於可信。且補入近年事跡。其所以爲武
功誌者。大旨則又與宜君等也。華因思是書之成。雖不敢抗衡前
哲。竊幸闡發幽潛。表揚

聖化。不至背謬者。則皆 泰憲公之所啟益也。而華敢自以爲多
哉。誌成。呈之 泰憲公。公曰。可。質之邑諸君子。無不可者。遂命梓
焉。

雍正十一年歲次癸丑孟冬上澣知武功縣事沈 華撰

原序

邑乘之書。紀載不出州里。而政令沿革。民風士習之淳漓得失。皆
可按籍而考。涖官行政者。得所據依。以爲張弛之具。其裨益洵非
淺鮮也。武功邑志。肇自有明康對山太史。論者謂與韓苑洛朝邑

志並爲陝省邑志之冠。然苑洛才氣濶達。考證間有疎漏。對山文筆簡潔。最能合史傳體裁。惜其成書太速。甫七月而事竣。其於農田學校諸大政。及人物藝文之足資採擇者。亦微有罣遺。後賢繼起踵修。若張暨沈二志。又皆自爲續稿。以成專書。而對山之作。訖無增損於其間。誠以前人著述之美。未可輕易黠竄。然事經三數百年。政治人民日益繁富。苟非彙集典故。勒成一書。則考古者終有不醇不備之慮矣。前令錢君有菴。以名賢英胄。來宰是邦。甫下車。卽殷然以徵文考獻爲先務。適長洲吳竹嶼舍人。來主關中書院。遂以志事相屬。廣搜博採。續輯舊聞。編定新志若干卷。凡康志之文。悉仍舊貫。其他隨事附益。條理秩然。燦若指掌。余適承錢君之後。得遂觀其成。以告歲事。良足幸也。昔唐姚合嘗宦武功。作縣居詩三十首。備述山邑蕭閑之致。想見其時政務清簡。長吏得以

優游賦詩爲樂。余自愧才拙。公事屢勉不遑。詎敢追步曩賢。以吟詠自適。然而有邵舊封詩人所咏。漆沮之間。風土醇茂。後之留心治術者。得是書以考稽掌故。可以不下堂階而得觀民勵俗之道焉。則余與錢君撰錄之意。不可謂非同調也。書旣成。將付諸剞劂。以垂永久。因誌其緣起如此。時

大清乾隆四十九年歲次甲辰三月中浣文林郎知縣事樂昌黃景略譔

武功縣續志原序

盈天地間蕃育者難以更僕而總醞釀於山水。故省會郡邑皆山水所蟠結而成。人物風土於是乎肇。書契遂興。後人因之以作志。然畧焉而勿詳。始焉而勿繼。識者不無代遠人湮之感。庚子春仲。得銓武功令。夏且治裝。發自都門。歷三千里而後至。見其崇岡環抱。曲水流澌。千峰競秀。一壘摩空。不覺掀髯鼓掌曰。此中大有佳處。及與邑之大夫士晉接。揖讓都雅。不愧名邦。向望氣而擬之。今覲面而知之矣。但鉛刀初試。未遑觀縷。事稍暇。取吏所進城圖志。書而覽之。諸戶口土壤祠壇古蹟耆德尊宿。後先輝映。俱較若列眉。至細閱序跋。則爲康太史所纂。終於正德之十四年。以後尚缺焉。有待。會許茶臺有通修秦省之舉。檄取續志。余躬請鄉先生酌議。元白張明府身任厥事。不數日而脫稿。微者顯之。幽者闡之。雖良史不是過也。擬卽投之剞劂。適事冗未果。忽焉裘葛已更矣。諸先生復以續志相商。余斂容謝不敏曰。忝司部令。久玷牧符。苦局難了者。尚思了之。矧此爲光前傳後之書。而又非甚苦。其何敢諉。卽糾匠繕寫。壽之於木。其工食等費。悉以俸薪相給。斷不襲往日陋規。諸先生唯唯而別。因憶少年時。與同人談及名公巨卿佳山勝水。輒欣然神往。以足跡未能到爲恨。茲邀

序

一

天家一命之榮。涉淮泗。踰太行。取道於燕豫齊晉之墟。渡河而抵關中。山川映發。應接不暇。獲交於先生長者。已不啻錫百朋而貽瓊玖。迺卒讀部志。康太史修之於前。張明府續之於後。余拱手受成事。俾識先哲之鴻篇。華胄之世譜。真足以灑練心腑。祓除鄙吝。余小子其有幸哉。其有幸哉。謹役隄廩不律。而紀其巔末於簡端。康熙元年秋。仲吳興李紹韓。臚人氏撰。

續修武功縣志

總纂

特調長安縣知縣前任武功縣知縣張樹勳廩貢生浙江秀水縣人

編輯

雒南縣知縣前任延長縣知縣王森文嘉慶乙丑進士山東諸城縣人

採訪

山丹縣教諭邑舉人黨行義

富平縣訓導邑廩貢生張溶

世襲恩騎尉邑生員馬象南

邑舉人張燕翼

邑歲貢生馬浚六

邑歲貢生華有詩



邑歲貢生焦鑑

邑生員楊本哲

邑生員段書田

邑生員李映奎

邑生員高登鰲

邑生員陳景韶

邑生員張攀龍

邑生員楊甲木

邑生員馬筮咸

邑生員孫奕塏

校刊


邑生員張樹楠

武功縣圖

卷之一

東

輿地
圖
每方
五里



續武功縣志卷之一

地理志第一

武功地理沿革山川俱詳康氏前志間有遺誤考據正史水經泰以孫氏景烈部封錄有足補正前志者并著於篇

史志地理縣境山川古蹟必附子注蓋取識一縣疆域以示後世

故年代久遠考其形勢猶可得所依據漢書地理志雍有五時諸

祠今鳳翔縣漆有漆水在縣西元和志漆水在新平縣西九里北流注涇寰宇記名白土川今名水

籀河漆縣魏改白土隋改新平今邠州自漢迄隋無改置惟北魏志雍縣有周城兼有美陽西境仍不接

壞武美陽有岐山今扶風縣郿有成國渠今岐山扶風南境在渭

北武功有太壹敦物斜水今郿縣在渭南後漢郡國志美陽有岐

山周城周原故城見後漢書梁懂傳懂轉戰武功美陽關注仍今美陽縣名故城在武功縣北七里於其所置關

扶風地無釐而郿有郿亭注引新論郿在漆縣蓋所以廣異聞傳注立文徃徃如此蓋省釐入

卷之一

郿非入武功而郿仍在渭北武功自永平八年復太壹斜水如故

亦仍在渭南降及蜀魏據諸葛亮與步騭書前軍出五丈原在武

功西十餘里武功亦未移渭北晉地理志郿與美陽武功山水無

改置惟晉杜預左傳注駘在始平武功縣所治釐城音義駘依則字作郿

武功徙治釐城在晉不在漢且武功雖有渭北釐地而渭南舊境

仍隸武功北魏地形志真君六年改郿置平陽平陽有五丈原七

年蓋厘并武功故志無武功蓋二縣并有武功渭南北地太和十

一年分扶風置武功郡治美陽美陽有岐山太白山駱谷郿亭蓋

武功渭南北地復屬美陽而武功置郡僅屬虛號酈道元注水經

當在真君七年後北史本傳道元為冀州鎮東府長史時無武功在景明中距真君七年五十餘年

縣渭水注云東逕郿縣故城南又東過武功縣北又東逕武功故

城北王莽新光蓋西漢故城又東溫泉水注之又東逕釐縣故城南又東中

亭水注之。郡改平陽。故稱故城。秦無武功。故稱秦縣。下有武功故城。故武功仍襲舊稱。中亭水會雍。注云。南逕美陽縣西。考其形蹟。當在今漆邨東。蓋武功舊治秦城。復治美陽。郡移而名隨。故漆邨以東堡寨。今猶稱邨封里。史記曹相國世家。參攻雍。秦正義引括地志曰。故雍。句縣南七里。故秦城一名武功。句縣西南二十二里。古秦國也。蓋釋二縣。非專注古秦文。水經注秦城東北有姜嫄祠。長安志。祠在武功西南二十二里。今扶風東南四十里。俗名姜嫄嘴。有姜嫄廟。正五年鐘欵載扶風縣邨城鄉姜嫄嘴。距武功西南三十里。蓋秦漢秦縣舊治。非周武功縣。亦非魏美陽城。自北周移治。由隋迄明。皆治中亭川。

國朝仍明制。隸西安府乾州。雍正三年。改乾州為直隸州。武功仍隸乾州。不更屬西安府。鄉里為一縣疆理制度。古今沿革尤多殊異。武功鄉名秦漢有壤鄉。唐十四鄉。有中水鄉。餘無考。宋四鄉。統四里。縣東高望鄉。統望鄉里。縣南周原鄉。統懷德里。縣東南節婦鄉。統顯揚里。縣北義門鄉。統順義里。明分十五里。末年因兵荒散亡。并俱得奉安為俱奉里。坊廂姚安為姚坊里。

卷之一

國朝順治十六年。裁明屯衛軍地屬縣。更設左右中前後五衛。皆名康熙五十九年。乾州民買種武功地。名寄莊里。實無邨落。雍正九年。改明秦藩采地屬縣。為更名里。亦雜厠各里。皆不成里。武功鄉制。實有五衛十三里。嗣因民間過割地畝。輾轉糾紛。遂致疆理紊亂。里法不能統一。縣之地。雍正七年。檄立社倉。建九社。為在城長寧大莊。普濟薛固。永安楊陵游鳳。魏公九鎮。乾隆十五年。又分置韓店社為貞元鎮。共十鎮。里衛邨落始有所統。康熙二十二年。分興平扶風武功渭北地。設西安駐防兵馬。厥武功。厥地東西五十二里。南北二里五里不等。地屬駐防。不在十鎮中。統計縣境

南北四十五里。東西六十里。東至興平界四十五里。治九十里。南至盩厔界二十五里。治四十里。西至扶風界十五里。治六十里。北至乾州界二十里。治六十里。距西安府一百九十里。

京師二千八百里。孫氏景烈曰。武水縣東門外北來水。宋游靖重修縣廳碑云。鳳岡西拱。武水南領。今改武功為武亭縣。其地理志有武亭河。則武水之名已久。而明對山康氏縣志誤以此為漆水。

余嘗辨之。今按武水。乃水經之杜水。源出麟遊縣西五十里。招賢

鎮杜山之陰。即水經所謂水發杜陽縣大嶺側。世謂之赤泥峴。沿

坡歷澗。俗名大橫水也。與出杜山之陽之小橫水異源。小橫水亦曰杜水。

水經又謂大橫水東南流。逕杜陽故城。世謂之故縣川。二坑水注

之。水有二源。一水出西北。與瀆魍水合。而東歷五將山。又合鄉谷

水。出鄉溪。東南流。謂之鄉谷川。此下有闕文。杜水又南。蒹水注之。蒹水即乾

卷之二

州之漢又南。逕美陽之中亭川。水經注。雍水謂之中亭川。今按雍谷水。

據此。則武水為大橫水。又名杜水。明甚。而武功人自宋至對山作

縣志時。不謂之杜水。橫水。直謂之武水者。蓋以此水西北來。下好

畦。至黃家堡。入武功界。遂易其名。弗之考耳。至漢漆縣之漆水。源

出麟遊縣西百二十里。舊普潤縣。隋縣名。西之青青山。東南流。數十

里。折而西。即岐山縣北境之朱家河。又西流。至鳳翔之亢家河口。

與岐水合。又西至杜陽川口。與杜水合。水經注云。杜水東南流。合

漆岐二水。俗謂之小橫水。以武功河為大橫水。亦或名之米流川。逕岐山而

又東。與雍水合。岐山縣志云。岐梁諸山之水。自汧水以東。在岡脊

之南者。俱歸雍水。在岡脊之北者。俱歸杜水。即大橫水。而會於武功之

川口。南流入渭。可謂言簡而明且確矣。漢谷水。漢金史作莫源。出

永壽麻亭嶺。逕乾州西南夾道中三十里。至董晁邨。入縣界。又至

縣東門外二水寺。從武水南流。唐德宗之如奉天也。朱泚反。遂犯奉天。

建中四年十月戊申。德宗如奉天。丁巳。朱泚犯奉天。辛酉。戰於漢谷。

靈武鹽夏渭北諸將合兵

入援。上召將相議。道所從出。渾瑊曰。漢谷險狹。恐爲賊所邀。不若自乾陵北過。且分賊勢。盧杞曰。漢谷路近。若爲賊邀。則城中出兵應援。上從杞策。援兵死傷甚衆。退保邠州。此漢谷之見於史鑑者。無可疑矣。安得因鄉人訛。漢谷爲沐浴。轉疑其訛。讀沮爲浴。而遂指此爲沮水耶。武功無漆沮。學者自能辨之。漳水。據寰宇記。源出岐山縣東北六里漳谷東。元和志。漳川縣。以縣南漳水爲名。省志。魯班溝。在岐山縣東十里。龍尾溝。在岐山縣東二十里。麻葉溝。在岐山縣東二十五里。俱有小水南流入交河。漳水出岐山縣境。當卽魯班溝諸水。今則直指雍水爲漳水矣。按岐山縣志。雍水卽澗。音緩河源出鳳翔雍山平地。自岐山縣西南十五里河北邨東流。

卷之一

至交河。與小橫水合。又東至龐義邨。魯班溝水南注之。又東至侯家灣。龍尾溝水北自灣西注之。麻葉溝水北自灣東注之。又東一名漳水。一名白水。逕坡子頭。入扶風界。自是而逕扶風縣東門外。受鳳泉水。東至武功縣西南十里之聶邨。嗟下。入武功界。又東南逕武功之鏡照寺。殷彭邨。崔家溝。趙家河。牛家河。許家溝。約二十五里。俗名後河。後河之名。自岐山扶風至武功。無或易者。以渭水在前。漳水在後。故也。至楊邨。與武水合焉。宋游靖重修縣廳碑云。宇文造周。易治中亭。水經。美陽中亭川。注云。雍水謂之中亭川。據此。則雍水卽爲漳水。復何疑歟。清水不見縣志。其源則扶風齊家務東南數里之湧泉也。東行三十里。至武功縣西南隅。永安邨。渭水之北。傍渭而行。約七八里。至橋頭。始入於渭。渭水縣之南界也。源出鳥鼠山西北。水經注。渭水又東。東逕郿。及武功。槐里。縣北。此指渭南之武功言。今逕武功縣南。

矣。自縣西南界永安邨而東。逕縣南界六十里。入興平界。縣志未載。

卷之二

建置志第二

建置志法度也。考其興廢而治忽寓焉。法度所在。城為重。

縣城西據稷山東臨武水。周三里二百二十步。池深八尺。東一門曰觀瀾。南二門。東曰集賢。西曰望月。北二門。東曰迎仙。西曰來鳳。明代修築。正德以後無考。

國朝康熙二十五年。知縣徐奇桂重修。並建各門磚樓。乾隆十八年。知縣龔師勝復修。如舊制。城內街衢。東門大街。西至大十字。為東街。又西至小十字。為學前街。又西至原麓。南折出望月門。為西街。大十字南出集賢門。為南街。北出迎仙門。為小北街。小十字北出來鳳門。為大北街。南為宣化街。東折通南街。為南司巷。

縣署。主治之區。儀門三楹。前後堂五楹。堂中亭。後堂夾室。皆三楹。明嘉靖五年。知縣廣安州姜思修治。縣民所輸木也。見鄆縣王檢討九思所撰

卷之一

碑記

國朝初年。知縣費緯祉。康熙元年。知縣李紹韓繼葺。後知縣徐奇

桂。建署後磚樓。章紳移建鄩侯廟。大門東樓三楹。舊在迎賓館南。今所夫外移。改為民壯值宿房。並祀衙神。皆間為補綴。嘉慶十六年。樹勳更加修

築門三楹。大門有鼓樓。左右有民快值宿房。獄在西。儀門內有介

石亭廢。左右有六經承房。有皂隸值宿房。堂涂北達大堂。堂五楹。

左庫房。右堂房。堂後堂二。寢一。中曰思古堂。制皆如大堂。惟磚樓

廢。思古堂西增南北書房十八間。廚房在西。大堂西舊縣丞署。自

裁部城驛丞。舊驛在南街馬神廟驛。遞歸縣。改為馬號。康熙三十

年。章紳重修。嘉慶十三年。樹勳更加開拓。重葺廟宇。增置槽廄。急

遞總舖。舊在府行署西。崇禎九年。知縣張含光。貨公地償民賠項。

舖遂廢。今歸承發房代辦。典史署在縣署西。營汛署在南司巷。卽

布政司行署舊址皆縣之輔也。一縣之治首先教化。學校實教化之本。

教諭訓導署在學前街北。明嘉靖三十四年。教諭荆珉及邑紳士

倡眾捐修萬歷九年。知縣曹崇朴移明倫堂舊堂西北舊基爲敬

一亭。闔門直堂。俱見張鍊重修廟學碑記雍正十一年。教諭姚奮聖倡邑人重

修。見奮聖重修文昌祠奎星樓碑記萬歷二十六年。知縣薛郭建尊經閣於堂後

有張汲教諭訓導宅在堂西。訓導後移縣署西。按察司分司署廢

址爲學校之輔者。有書院義學。

有邵義學在大北街西。舊靜山書院也。義學舊在城隍廟南。康熙

五十七年。陝西學政覺羅逢泰。知縣劉銓建學堂三楹。並置租地

雍正間。知縣沈華增廂房四楹。今廢。乾隆八年。知縣楊毓芳。因庭

宇湫隘。改置縣署東。名曰靜山書院。靜山者。毓芳字也。門東向。講

卷之一

堂三楹。堂後三楹。廂房四楹。院廣六丈四尺。修七丈九尺半。有孫

烈碑二十六年。知縣瑪星阿。改曰有邵書院。有教諭劉嘉慶十四

年。樹勳既重修綠野書院。因改爲有邵義學。前志宏治年里置一

城內今廢鄉學亦廢

綠野書院在城東南隅外。本葆真菴故址。明宏治八年。與綠野亭

互易。改爲書院講堂。前建祠祀宋張子橫渠先生。有吳寬明末棟

宇傾圮。半爲耕者侵蝕。

國朝康熙五十年。知縣孫琮。勘復舊址。五十六年。知縣田中孚。乾

隆十三年。知縣鄒儒。有儒自撰碑記碑逸繼修如舊制。後復荒廢。嘉慶十四

年。樹勳倡紳士重修。建屋五十四楹。刻石記其事。復添置學田。得

實地二十八頃九十畝八分。每年招佃收租。又乾隆二十九年。趙

和璧等捐銀五百兩。嘉慶十五年。楊肯堂捐錢四百千。先後交質

庫營息均充書院義學。師生修脯膏火之資另刊經費章程。令董事掌執。專司出納焉。

申明亭所以宣化也。縣門外舊有申明亭。久廢。雍正三年。知縣杭雲龍於在城及八鎮各置鄉約所。月朔宣講。

聖諭。後志有旌善亭與申明亭同處。今廢。

坊表所以旌善也。孝子坊在訓導宅南。雍正八年。為孝子宇文澄

建雙節坊。在社倉東。雍正八年。為節婦康閔氏康耿氏建。後志有

曾坊在縣門西。馬駟布政使坊在南街。康氏海狀元及第坊在大十字街東。康浩地官大夫坊在學前街西。康河太守坊在小十字街西。楊秉中御史坊在南街。張鏞張鍊兄弟同科坊在東街。李朝綱御史坊在南街。李時芳尚嵐副使坊在南街。陳奐妻牛氏旌節坊在宣化。

禮義生於富足。則積財尤為急務。街皆廢。

預備倉古常平也。舊有十五廩。在縣署西。後志十四廩。乾隆四年。建北

倉七廩。小北街西。貯採買糧舊。五年。建南倉七廩。南街東。貯捐監。

卷之一

本年。又建西倉五廩。縣署西。貯預。後因空廩坍塌。移用及估變十

六廩。今存南倉六廩。北倉七廩。實貯穀三萬石。除豁免民欠穀六

貯及民欠穀二萬九千三百九十石。八斗零。社倉亦所以輔常平。分繫各鎮。以與戶口

相衝。邨落則列其要者。寺觀不足。言建置陵墓不宜入建置。附錄

之。藉金石以識鄉聚也。

在城鎮領街七堡三十八戶。一千九百九十四。社倉五楹。在城內。縣署南

府行署。貯穀三百七十二石。二斗零。北郭有報本寺。景泰元年。嘉

慶十三年。邑人補修。有僧了覺。張汲。火神廟。舊在郭外東北野田。楊錦堂碑記三通。寺有浮屠七級。中因武水西泛。虞其

傾圮。移建。今址有萬歷。養濟院。舊在郭城驛西。郭外有香山寺。有

四十八年。張惟恭碑記。今在報本寺南。郭外有香山寺。嘉

靖十九年。鐘。鴻禧觀。有嘉靖二十六年。康。浩。三十六年。張鏞。康

在縣門鼓樓。鴻禧觀。熙四十八年。康。呂。賜。邑人重修。碑記三通。二水寺。在武水。漢谷之交。寺舊有石大士洞。明萬歷三十年。知縣

名崇禎十五年。鐘。始載寺。東郭有漏澤園。今南北西。東有官渡。渡

東原麓有東嶽廟舊在二水寺南後沒于水移建今址孫真人洞

有萬歷三十三年教諭程永惠碑記嘉慶十四十八等年張溶捐

一十二畝樹勳價買郭西原半為西郭南有葆真菴練野亭原上

有演武教場舊在東郭門外南為臘吉坡有姜嫄墓修廣十丈郭南南里

城周貞元十五年漳環制有書院義學田乾隆二十四年知縣瑪屋

濟西莊康氏海莊西有康氏海墓後志有宋游師雄莊在北郊康

海洪東草堂在漳水東李時芳別業在南郭西原麓又有符上人泐園康浩城

南精舍張汲會昌園遺址無考今皆廢

貞元鎮距縣城東二十里領堡七十五戶二千八百八十八社倉

五楹倉厥皆貯穀四百二十五石六斗零鎮有韓店舖距城十里乾

元寺有萬歷十二年東可會舖距韓店十五里舖西西牛家寨有

書院義學田康熙五十九年學政覺西南坡頭廟東北高望川有

高望亭亭基

長寧鎮距縣城東四十五里領堡八十三戶二千二百六十七社倉

五楹貯穀六百三十五石七斗零鎮有長寧舖距可會舖十五里

關帝廟舊長寧驛丞署乾隆二十六年公館乾隆四十一年北皇

甫邨有黃龍寺有萬歷四年西北河道邨有香城寺有嘉靖五年

本名興隆禪寺成化又東北馬午邨有社學寺有正德十三年碑

邑人張沂建南焦上邨舊有興城

薛固鎮距縣城東南五十里領堡五十八戶一千九百八十二社

倉五楹貯穀八百二十一石五斗零鎮有成國故渠故白渠渭北

有書院義學田嘉慶十五年樹勳詳撥薛固鎮西至杜家堡灘地

四畝西渭源邨有渭水渡東渭源邨舊有渭源有渭水渡有平定

寺寺內有卧佛有成化四年鐘有西南永豐里西北燒香臺舊有

康熙五十四年鐘載節婦鄉

卷之一

九

里社有**望仙宮**。有嘉靖二十七年碑記。西南馬坊堡有**渭水渡**。後志學。有康洋渭。鎮有康洋渭。北別墅今廢。

普濟鎮距縣城東南四十里領堡六十戶二千一百四十三。社倉五楹貯穀七百三十六石七斗零。鎮有成國故渠。隋地理志永豐渠。普濟渠。疑皆在故白渠。疑即成國城隍廟。有康熙三十五年鐘。南鄭邨。舊有會同西南高家寨。有渭水渡。北顯義里。又北新尚邨。有**聖壽寺**。有乾隆四十年碑記。七年碑記。東

北香灣。有書院義學田。乾隆二十八年知縣瑪星阿捐地五畝。

大莊鎮距縣城東南二十里領堡六十一戶二千二百五十四。社倉五楹貯穀六百二十一石二斗零。鎮有成國故渠。漢故渠。上承功至高陵。故白渠。唐故渠。合漳水。莫谷。香谷。武安。四水。概武東有霄陵人謂。故白渠。功至高陵。田二萬餘頃。去縣南十三里。

東有霄**湟廟**。有萬曆三十二年鐘。廣元寺。有崇禎元年鐘。義樂寺邨。有義樂寺。有景年碑記。寺內有關帝廟。有萬曆四十七年鐘。載節婦鄉。東南尖柏樹。有關帝廟。有嘉慶三年。陝西巡撫秦

承恩碑記。載本年二月。白蓮賊據渭。將宵濟廟。何家堡。有渭水渡。出紅燈。及渭數百。開奔馬聲。賊蓋神佑也。

西北高邨。舊有部封。有**洪教寺**。有嘉靖四十四年鐘。觀音堂。有白兔寺。後志李淳風。又北漆邨。俗名南。又北毛家嘴。有武水渡。客山廟邨。縣以西原為主山。故以東原為客。

永安鎮距縣城西南二十里領堡四十七戶一千九百三十三。社倉五楹貯穀八百一十七石三斗零。鎮有成國渠。永慶寺。有乾隆

年四十年碑記。載嘉靖二十四年重修。今西。有**聚仙宮**。俗名北塔。名興隆寺。嘉靖二年鐘。載周原鄉永安里。廟有萬曆二年三年四十六年。嘉正八年。太白祠。在聚仙宮東。有池。東北建碑記。廟建于宋太宗至道元年。太白山。取水祈雨多驗。

子溝。有**恩義寺**。有康熙六十年鐘。載古名慶善宮。後改恩義寺。養堂。亦唐南姚安邨。舊有永安。東崖子堡。有書院義學田。乾隆二

太宗遺跡。知縣瑪星阿詳撥灘地。高家嘴。有書院義學田。乾隆二十五年。又七畝七分二厘五毫。石谷邨。立節堡。有慈德寺。有宏

三厘。武水東張捕邨。舊有永豐。石谷邨。立節堡。有慈德寺。有宏

三厘。武水東張捕邨。舊有永豐。石谷邨。立節堡。有慈德寺。有宏

卷之一

楊陵鎮距縣城西南十五里。領堡七十七戶二千一百四十一。社

倉五楹。貯穀七百九十三石八斗零。鎮有成國故渠。西魏六門堰。賈志昇源渠。

通濟渠。疑皆在此。五泉故渠。長安志引十道志。渠自扶風界流入。經三時原。上東流經縣西南去縣十二里。亦疑即成

渠。關帝廟。有乾隆二十年張氏洲碑記。東博邨。有唐蘇許公環墓。修九十步。北

姚安邨。有龍岩寺。有正德十五年鐘。載周原鄉。川口。有武水渡。下川口。有舟渡。

北。三時原。在漳南。北周瑯琊公司馬裔。河內溫人。建德元年。原西鏡

照寺邨。舊有姚安里社學。有鏡照寺。有宏治十五年鐘。載周原鄉姚安里。東磨李溝。有漳水

渡楊邨。有舟渡柴家嘴。有書院義學田。嘉慶十六年。樹勳捐地三畝一分。漳北西

原新寨。有蘇瓌神道碑。高九尺。廣三尺五寸二分。十八行。每行六十字。張說撰。銘虛藏用撰。序并隸書。額題唐故司空文貞公

蘇府君之碑。十二字。篆書。按序云。唐景雲元年十一月己巳。太子少傅許國蘇公薨。明年三月己酉。制葬公子武功之先塋。建碑于

塋北。一十五里。太平寰宇記。關西道雍州武功縣蘇許公墓。在縣西一十里。神道碑存。碑文約千五百餘字。漉滅者三百餘字。前志

卷之一

謂剝蝕過半。乃仍羅家堡。有唐殤帝陵。唐地里志。武功西原殤帝

石。墨鑄華之誤。重茂見中宗本紀。及三宗諸子列傳。前志有隋殤帝墓。邨上營堡。

封錄云。營是殤訛。為殤陵。修四丈六尺五寸。廣四丈六尺。有書院義學田。乾隆三十七年。知縣李周原堡。西原發脉。周原故

鄉名。有是名。宋亦取以

游鳳鎮。距縣城西北二十里。領堡五十八戶一千二百六十一。社

倉五楹。貯穀四百八十九石五斗零。鎮。舊有游鳳里社學。西有海潮院。有

化四鐘。鳳泉渠。自西原東溝出。東流逕鎮入武水。長安志有南焦陽

邨。有沮淤水。瀦葦葦中。賈志良溝泉在縣北十五里。永樂初湧出。據里數亦當即此水。舊有張鍊雙溪亭舍。今廢。又南。湫

池溝。有清涼寺。有嘉靖四十二年。南王澤邨。舊有俱得。有宋游師

雄墓。在華家堡南。墓修五十三步。廣四十八步。墓志石。今在西安府學碑林。題云。宋故朝奉郎直龍圖閣權知陝州軍府兼管

內勸農事兼提舉商號等州兵馬巡檢公事飛騎尉賜緋魚袋。借紫游公墓。誌銘。張舜民撰。邵鑄書。章案。蓋安民。安敏。姚文。安延

年模刻。誌云。游氏世居京兆之武功。曾祖永清。祖裕。考光濟。公以

紹聖三年七月卒。于陝州十月葬。于武功縣西原鳳岡之先塋。

夫人仁壽縣君張氏祔公龍家門有漢蘇中郎武墓修廣八丈五尺西腰
有文集十卷奏議二十卷
子堡有書院義學田嘉慶十二年張北橋子堡有書院義學田隆
四十二年知縣胡鼎藍田捐地五畝又北郭房廟有乾隆四十年碑記
蓉捐地一十五畝載廟名新華寺康熙
二十五年鐘武水東蒜邨岸底邨載周原鄉

魏公鎮距縣城北二十里領堡五十五戶一千五百五十五社倉

五楹貯穀五百七十七石一斗零鎮有城隍廟有天啟五年建廟碑記康熙四十七

年鐘載南奉安邨舊有奉安有書院義學田乾隆二十四年知縣

周原鄉里社學分岡上邨有三官廟有萬歷十年碑記東南攀邨有雙聖廟乾隆五右

所邨有書院義學田嘉慶十七年魏楹捐當地蘇坊邨漢蘇中

谷東南北兆邨有書院義學田乾隆七年知縣楊毓芳董晁舖縣

北十凡十鎮六百一十二堡二萬四百一十一戶社倉穀六千二

百九十一石零

祠祀志第三

前明祠祀。正德以後未聞改革。

國朝釐正祀典而損益備焉。

先師孔子廟。崇德元年定。順治二年定。於每歲春秋仲月上丁日致祭。通行直省。州縣各學遵行。雍正元年增建啟聖祠祀孔子五代祖考。武功廟殿舊在縣署東。明萬歷九年知縣曹崇朴重修。有張鍊碑記二十五年知縣劉中正補修。有張鍊碑記

國朝自順治十七年。乾州知州署縣事袁州佐重修。有州佐碑記歷知縣倪維楫張翥孫琮工乃畢。乾隆四十五年知縣胡鼎蓉請帑重修。繼以紳士捐資。祠宇益增鞏固。

社稷壇。順治元年定。直省州縣每歲春秋仲月上戊致祭。武功壇位舊在北郭外。雍正十年知縣沈華增建壇垣三十四丈。門樓四

卷之一

三

壇高三尺寬二丈五尺。

神祇壇。順治初年定。于每歲春秋仲月致祭。雍正三年定。直省州縣神祇壇設雲雨風雷位于中境內山川位于左城隍位于右。武功壇位舊在南郭外。雍正十年知縣沈華增建壇垣如社稷。

先農壇。雍正四年定。直省州縣建先農壇及耜田。每歲仲春亥日致祭。行耕耨禮。壇制高二尺一寸廣二丈五尺。武功壇位在神祇壇東。本年知縣杭雲龍建。舊志作二年誤並建先農祠三楹。祠前貯耒耜祭器房各一楹。耜田五畝。

關帝廟。順治元年定。于五月十三日致祭。雍正三年增祀。

關帝三代祖考于後。麟五月致祭外。增春秋二祭。武功廟殿舊在南郭。稱武安王廟。明隆慶元年邑人重修。有李朝綱張鍊碑記二通崇禎七年

知縣劉渤然修。有耿志煒碑記十二年知縣許國修。有知縣費緯祉碑記

國朝順治五年知縣周曰熙有教諭姚隆運碑記康熙十年紳士馬應福等

有舉人李大春碑記乾隆四十五年知縣胡鼎蓉有貢生黨植槐碑記相繼重修

厲壇順治元年定于每年清明日七月十五日十月朔日祭于北郊設城隍位于壇武功壇位舊在小北門外久没于水今復舊

名宦祠亦順治元年定武功祠宇舊在縣署儀門東後改建文廟

戟門東康熙二十年知縣徐奇桂重修祀韋維駱賓王毛若虛李

愷薛播張署陳南仲姚合張及种世衡王頤高士徹呂義山錢秉

李宗趙茂曾孟通劉幹張山甫王君杜淵耿忠嚴祀賴禮宮廷曹

俊蘇孝冠如圭劉志劉彝高璉張宏陳潤王翼宋學通曹山趙文

傑劉紹呂彥士牛揚荆琨曹崇朴相邦教葉映榴學四十四人

鄉賢祠亦順治元年定武功祠宇舊在文廟戟門西偏康熙二十

年知縣徐奇桂重修祀富辰蘇武趙禹蘇純李育蘇章蘇不韋蘇

卷之一

則蘇愉蘇祐蘇亮蘇湛蘇讓蘇縵蘇椿蘇威蘇夔劉文靜蘇世長

蘇昂蘇良嗣蘇瓌蘇幹蘇頲蘇詵蘇震富嘉謨蘇源明蘇弁元讓

蘇檢蘇曉游光濟蘇昞游師雄康汝楫馬京符泰張儒珍耿儒張

鏞張鍊馬蟠龍馬自履馬當耿志燁馬鳴世丁世勳康國張相焦

國鼎焦勤馬應福馬璟張樞康昌賜五十六人

忠孝祠雍正二年定武功祠宇在今訓導宅南祠三楹雍正四年

知縣杭雲龍建祀宇文澄一人

節義祠亦雍正二年定武功祠宇在文廟街南祠三楹亦雍正四

年知縣杭雲龍建祀喬丁氏李喬氏等一百十九人

文昌祠嘉慶六年定于每歲二月初三日秋吉日致祭並祠文昌

先代武功舊祠在儒學署東西向左有魁星閣前志未載後志載

雍正十年知縣沈華重修有教諭姚奮聖碑記

城隍祀典在壇不在廟廟亦正祠也武功廟宇舊在東門內明萬
歷四十一年知縣李舒芳倡合紳士重修有張汲碑記嗣歷百餘年屢
圯屢修至乾隆五十二年知縣田灝復倡紳士重修迄六十年工
竣有張玉樹碑記凡壇廟十有二祀皆通行天下著為令典若武功境內
歲有修理防護之例者則有

姜嫄祠后稷祠皆在城內稷山頂康熙五十三年邑人重修有康呂賜碑記又有宏治年順天府尹與平間鐫碑記乾隆二十六年知縣瑪星阿重修有孫景烈碑記
嘉慶十七年樹勳重修有直隸按察使靈保碑記又有

唐太宗祠在鴻禧觀後康熙四十八年邑人重修有康呂賜碑記又有宋崇寧元
年趙茂曾明洪武初都督耿忠碑記二通又有

漢蘇武祠在香山寺祠舊在蘇坊村明成化間沒于河像經水不
損昇祀北郭外香山尼寺萬歷間張鍊請于上官別建祠于西原

卷之一

大道旁明季復遭兵燹仍移像香山寺見乾隆四十四年張介題壁康熙三十
年知縣倪維梧重修祠三楹又有

宋張子橫渠先生祠在綠野書院詳建置凡五祠每歲終與姜嫄
蘇武蘇瓌游師雄康海五墓彙報護理如令舊志載唐高祖祠在太白祠後已廢又載

康太史祠在十字街東南明嘉靖時列入祀典耿太常祠在儒學東今二祠俱存子孫自行修理此外又有
太白山神祠在城西北鳳岡上明崇禎七年知縣劉渤然有耿志燁碑記

國朝順治五年知縣周日熙有教諭姚隆運碑記乾隆二十六年知縣阿明
阿錢汝器有生員葛炳麟書碑相繼重修非武功境內山亦祀之太白舊武

功也亦猶姜嫄故祠舊屬武功舊境古郿城武功因墓建祠禮緣
義起蓋亦人心風俗之故孫氏景烈撰姜嫄后稷祠碑記深得祠

祀精義故備錄之其辭曰吾邑姜嫄祠據宋龍圖學士宋敏求氏
長安志在城外西南原麓間傍有后稷祠余嘗按其遺社當為今

望周原之禾黍。戶慶豐穰。人歌樂利。於乎職思哉。其何以端士習。厚民風。遜志詩書。陶情禮樂。仰副

聖天子治化之隆。而永荷思文無疆之德。庇也乎。此余因士民之請而不能已於言者。願與士民共勗之。非盡侯之責也。侯名瑪星。阿。字景謙。滿洲正黃旗人。丁卯舉人。

續武功縣志跋

康氏海撰武功縣志夙稱名作後賢繼述韓沈嗣踪規步矩行用逾尺寸錢氏後起書成倉卒未免冗雜貽譏樹勳亦乏武功多年深喜俗美風淳留心採訪擬事考訂上元 董觀橋先生巡撫關中觀風下邑合參志乘命樹勳曰康氏志自成一家不可損益續作繁瑣久易散逸合三書爲一以續舊志且便觀覽其君之功乎樹勳唯唯退而博覽

昭代典章徵求人物名雋並得孫酉峯先生部封聞見錄適延長令諸城王君森文被議閉居延爲纂輯體遵舊志傳用別裁合三志之人文歸一家之義例起于故明嘉靖壬午止于

國朝嘉慶甲戌共述七篇以續康氏志後所以成 觀橋先生之志也康氏志舊本爲孫酉峯先生所刻近多漫漶與續志並付割

跋

刪其注釋評點悉依原本校正無或訛漏焉樹勳旋調長安刊刻始得卒業因識其顛末附於篇終時嘉慶二十一年丙子孟冬秀水張樹勳跋于長安官廨



武功縣志

卷二三

田賦志

官師志

選舉志

172.79
35
2
部

續武功縣志卷之二

田賦志第四

古賦地丁並徵。徭役則專取民力。自明嘉靖中始爲一條編法。總括一縣賦役量地計丁。畢輸於官。而僉差募運之費。存留供億之用。土貢方物之需。以及交納贈耗之數。皆徵銀折辦於官。立法頗爲簡便。

國朝仍其舊制。更加詳核。百數十年來。官民兩便。但恐相沿日久。忘其因革。官知徵錢糧耳。其鄉里差徭。則視爲未僉之徒役。而不知已徵於均徭項下。民亦知納錢糧耳。至官府供給。則視爲未輸之經費。而不知已納於存留項下。既溯流而忘源。或枝生於節外。故於賦役起科。分其條目。考其由來。更於存留項下。詳列花目。庶幾顧名思義。無或越思焉。

卷之二

一

民地地糧。唐之租調也。租徵粟米。調輸布縷。後世合納折色。原其所出。故曰糧。正賦也。武功原額民地三千三百一十四頃三十九畝六分零。額徵本色折色糧一萬一千八百七十五石三斗二升零。折徵銀一萬四千九百四十三兩七錢八分零。除蠲免豁免及新增自首開墾地畝。又新增王駙馬地租銀。實在民地三千二百二十五頃五畝六分零。額折徵銀一萬四千六百三十二兩二錢五分零。丁稅。漢之口率錢也。元太宗令每丁歲科粟一石。後亦納折色。與地糧並徵。故同日糧亦正賦也。武功人丁三門九則。折下丁一萬八千六十一丁。額徵銀三千七百二十九兩二錢二分零。除優免及審出溢額丁口。實在行差丁一萬七千八百七十三丁。額徵銀三千六百九十兩四錢零。雍正五年以糧載丁。攤入田賦徵解。續審人丁。欽遵康熙五十二年。

恩詔。永不加賦。又乾隆元年。至三十六年。編審案內。抵補屯更丁銀一千六十五兩六錢六分零。攤入地糧徵收。均徭。則古力役之徵。卽唐之備法也。凡丁。歲役三旬。若不役。則收其備。每日布三尺。元有助役糧。明定一條編法。同正賦計地起科。故亦曰糧。其實卽僉募供億之費。役而非賦也。武功原額徭役銀二千二百一十兩二錢三分零。又增自首溢額銀九兩四錢零。實徵銀二千二百一十九兩六錢三分零。又額外徵收匠價。停免及軍籍丁糧銀三千六兩六錢二分零。計地丁徭役實徵銀二萬一千三百七十六兩三錢九分零。視明正德年增地一千三百六十二頃七十餘畝。減糧五千三百餘石。視

國朝雍正年。減地五十頃零。減糧銀一百七十六兩零。減均徭役銀二十六兩九錢零。起運銀一萬六千五百一十二兩七錢八分零。存

卷之二

二

留銀四千八百七十三兩六錢二厘零。徭役卽在其中。額徵站支項下。解站支新墾銀六十六兩五錢九分六厘。驛站浮銀二十二兩二錢六分二厘。邊塘銀二百三十三兩八錢。撥協長武夫馬工料修理銀三百三十四兩。支驛馬五十四匹。草料銀一千四百五十八兩。驛馬修理銀五十四兩。支直銀一百一十三兩。夫三十名。半。工食銀三百二十九兩四錢。額徵雜項下。知縣一員。支俸薪銀四十四兩六錢二分二厘。皂隸十四名。工食銀八十四兩。快手八名。工食銀一百三十四兩四錢。民壯三十七名。工食銀二百一十二兩。門子二名。工食銀一十二兩。庫子四名。工食銀二十四兩。轎夫四名。工食銀二十四兩。傘扇夫三名。工食銀一十八兩。半級四名。工食銀二十四兩。典史一員。俸薪銀三十一兩五錢二分。門子一名。工食銀六兩。馬夫一名。工食銀六兩。皂隸四名。工食銀二

十四兩。教諭一員。俸薪銀四十兩。訓導一員。俸薪銀四十兩。教諭齋夫一名半。工食銀一十八兩。訓導齋夫一名半。工食銀一十八兩。廩生二十名。膳夫二名。月糧銀七十七兩三錢三分三厘。門斗四名。工食銀一十四兩四錢。禁卒八名。工食銀六十四兩。件作二名。工食銀一十二兩。額徵雜支項下。解縣馬新墾銀四十二兩四錢九分七厘。損夫新墾銀一百三十八兩五錢八分二厘。撥協留壩損夫工食銀七十五兩六錢。支縣馬五匹。草料銀一百八兩。損夫七十名。工食銀七百五十六兩。祭旗纛犒賞民壯銀三兩九錢四分六厘。舖司十九名。工食銀一百一十四兩。春秋祭祀銀七十三兩一錢二分四厘。鄉飲銀四兩九錢三分三厘。鐘鼓夫三名。工食銀七兩二錢。縣馬修理銀五兩。額徵孤貧冬衣布花銀一十八兩七錢三分三厘。此係歷年裁減實數。視雍正年減銀四百六十八兩四錢九分零。民地外又有軍地更名之別。

軍地。本明時屯衛糧不屬縣。故前志不載。順治十六年。裁衛歸縣。丁馬銀縣徵。糧輸省倉。而縣核其實收。原額軍地二千三百五十二頃六十三畝零。額徵本色折色糧一萬四千二百六十七石九斗四升零。折布及丁條馬草銀二千六十二兩九錢五分零。除荒地衝坍豁免。及改隸各府州屬收地畝。並增收各府州屬及額外清查自首地實熟地一千九百八十九頃八十二畝零。額徵本色折色糧一萬一千九百一石九斗八升零。折布及丁條馬草銀一千七百六十九兩六錢五分零。原額人丁三門九則。折下下丁五千八百八十一丁。額徵銀四百二十三兩四錢三分零。除屯更銀糧均丁減銀。及改隸各府州屬均丁銀。並新增丁銀。及原額長解銀。接收各府州屬均丁銀實徵起運銀二千一百八十四兩九錢七

分內除屯丁兌食銀實在起運銀二千一百七十兩二錢七分零實徵運道倉糧市斗豌豆三千四百七十一石一斗五升零市斗粟米四千二百八十一石七斗一升零。

更名地明時秦藩湯沐地也舊名王田差糧俱屬都司徵比後屬糧鹽道雍正九年歸縣官徵民運原額地三百三十頃二十六畝零計增減豁免衝崩改隸接收及均丁銀各項實存地三百一十二頃零額徵均丁銀七十五兩四分零折色銀一百五十九兩九錢二分零小麥六百六十一石五斗九升零粟米六百三十三石九斗九升零豌豆七石八斗二升零此皆計地起科正賦也其不由地畝徵收各款雜稅則有課程銀三十一兩三錢九分牙帖銀二十九兩一錢畜稅銀一百四十餘兩當稅銀每座五兩地稅無定額。

卷之二

鹽課亦稅法也明徵課銀二百六十七兩九錢四分八厘。

國朝康熙初年招商給引原額鹽引一千四百六十道每引課銀四錢一分六厘零課銀六百八兩三錢三分三厘零雍正七年增引三十六道共徵銀六百二十三兩三錢三分三厘零乾隆五十七年裁商鹽歸民運課銀攤入地丁徵收嘉慶十二年復歸商運額設鹽引一千四百四十道又增引五十六道每引鹽二百四十觔課銀四錢一分六厘零又鹽引一千五百一十一引共鹽七十二萬一千六百八十觔課銀二千三百六十兩六錢五分二釐歲解山西河東道。

官師志第五

官師選舉皆表體也。康氏志選舉既編年分科。復錯舉行事。蓋仿漢書百官表之體例。官師亦宜奉為程式。故首冠以表。備存官師全目。後更錄其行事。以考政畧焉。

明

年代 知縣 縣丞 典史 部驛驛丞 教諭 訓導

嘉靖三年 姜 恩

見部封 字君錫進士 四川廣安州人

年無考 許泰和 李尚文 趙峻德 王章 陶治

皆依舊 字懷之河 南河內人

周崇禮 劉鉉 石經邦 張紀 高永翊

四川嘉定 人 李時昌 張大錫 山西蒲州人 賓人

卷之三

孟霖 樊淳龔 王定邦 孫振德

河南陽武人 王 佇 河南睢縣人

徐化 李聰 曹堂

湖廣人 羅廷詔 山東人

祁鯨 李瑞 夏寅

字化麟河 南汲縣人 山西人 安徽安慶人

唐交 彭岱 楊棟

山東東平人 朱之賓 江南沛縣人

孫由義

字子宜山 西安邑人

三十二年 朱哀 周國濟 齊宗儒 張懷 程永惠 白以仁

見東嶽 廟碑 字崇進舉人 湖北鄖西人 山西人舊志 惠作思誤 山西太谷人

三十三年 聶榮

見藥王洞鐘款 四川富順人

年無考 劉相

字元夫 直隸三河人

郭金

張守藩

馮廷光

張自化

直隸衡水人

張錦

河南上蔡人

四十三年 魯變

見城隍廟碑洪教寺鐘款 字志道 河南睢州人

雷鰲

張九功

蔡邦正

山西解州人

李士元

河南鞏縣人 舊志士作誤

四十四年

見荆琨入祠碑

隆慶元年 趙澤民

見武安王廟碑 直隸高邑人

年無考 陳一濂

四川巴州人

杜璽

何希哲

荆琨

山西猗氏人

楊淑京

四川郫都人

六年 賈巨

見武安王廟碑 直隸棗強人

陳紳

湖北鄖縣人

陳邦器

山西河津人

趙體坤

山西太原人

年無考

李在

寧夏人

牛佐

山西潞城人

萬曆五年

見三清殿碑

喻嘉言

四川邛州人

王一元

安徽德州人

年無考 王正守

四川郫縣人

毛廷諍

山西平陸人

臺世昌

楊天用

霍時敏

郭良弼

張啟良

劉禧

定遠人

九年

曹崇樸

見學宮碑

山東冠縣人

楊永佑

新城人

郭洋

王朝美

李芝

王之屏

四川內江人

牛時和

白水人

凌汝孝

山西高平人

劉佳

堂邑人

李遵

四川劍州人

張問明

河南登封人

張光霽

成縣人

十年

見香城寺鐘款

年無考 李悌

興濟人

張問行

衛任思

吳璋

劉中正

山西代州人

段知微

貢生直隸遵化州人

張秉燹

孟春

胡淑

字澁之

范春芳

四川德陽人

劉承祖

四川內江人

李養源

合水人

王一魁

四川開縣人

費養源

山西解州人

劉繪

廣西新寧州人

蕭應奎

金縣人

卷之二

七

三十五年薛郭
見尊經閣及學宮碑
字汝衛
山西西安
張
浙江仁和人
林
直隸東光人
安如霍
郿縣人
王學詩
固原人
岳希嵐
郿縣人
寧翰卿
山西大同人

年無考
趙民望
山西壺關人
王樂賢
山西祁縣人
宋朝會
秦安人

何汝霖
四川璧州人
焦士傑
直隸祁州人

卷之三

三十年李舒芳
見文昌祠碑
字萬英
陶邱人
蔚本秀
字子文山
西朔州人
張肅臣
字士忠
湖北黃岡人
馮喜孫
湖北蒲圻人

三十二年
見姜嫄廟鐘款
岳貢正
字瑞徵
向致
四川巫山人
張德安
直隸成安人
杜思周
山西猗氏人
李綦
南鄭人

衛天命
河南陝州人
趙恒吉
直隸平鄉人
鄭秉乾
太平人
尚完
舊志缺
高嵩
延州人舊志嵩作登誤
馬永慶
葭州人舊志次丁長善後
魏之彥
西寧人

四十年相邦教
見報本寺碑
字蓮石
西安邑人
彭良祥
西人舊志次向致後
張君化
東掖縣人此後無驛丞

四十二年
見城隍廟碑

年無考

年無考

見大神廟碑

直隸沙河人

年無考

湖廣夷陵州人

韓國英

直隸平鄉人

崇禎三年劉渤然

見太白祠碑

字與伯新安人

年無考

字元錫山東東平人

七年張含光

見縣署納賦碑

河南西華人

年無考

孟縣人

胡三宗

湖北蘄縣人

王永年

山西汾西人

蓋載於萬歷末年舊志皆缺

沈宏道

蒲縣人舊志缺

梁有光

上虞人舊志缺

劉孔英

直隸人

李騰文

陳累見舊志缺

賈應春

舊志缺

程永惠

多建中

高位

段復性

洋縣人

劉位

四川寧遠人

張登選

舊志選作進誤

朱櫛

卷之二

九

張紀

王建官

山西人

丁長善

太平人

馬如翰

閻如愚

蔡宗孔

國朝

知縣

縣丞

典史

教諭

訓導

邵承恩
夜山人
舊志缺

順治三年

張吉士

傅應宿

張茂猷

劉從濂

見政績碑

字松霞
進士
東平人

浙江山陰人

山西臨汾人

舊志缺

郝光耀

山西大同人

年無考

徐之敬

浙江人

五年

周日熙

寇名玉

姚隆運

見太白祠碑

字匪莪
東即墨人

舊志缺

字泰階
秦州人

十三年

費緯祉

孔文誦

劉章

喻文

王佐

見關帝廟碑

字支喬
進士
江鄞人

聖裔舊志作文怖誤此後無縣丞蓋已裁

年無考
陳廷諤

選貢浙江天台人

張鵬鳴

字响夫
江南通州人

張筆

黃如璞

字太素
舉人
緜德州人
十年復

十七年
李紹韓

歲貢浙江湖州人

年無考

馮緒商
大興人

王之翰

康熙年

知縣

典史

教諭

訓導

武職

朱萬引

何獻瑞

明設屯衛官屬西安衛百

二年	郭維藩 字价人廬 生遼陽人		志注未詳 按順治十 五年已裁 教諭康熙 二十一年 復置元年 不得有教 諭	李國相 歲貢三原 人	國朝裁屯衛始 置把總隸督 標
八年	楊引昌 乾州知州 署				劉萬倉
九年	邵翀 字昆星進士 直隸鹽山人				薛化鳳
十年	陳昌謨 舉人湖北 黃陂人				
年無考					張信 本姓劉 榆林人
十二年		陳可現		王臯 歲貢秦安 人	
十八年	劉祚向 按察司經 歷署				
十九年	柳暉 進士直隸 邯鄲人				
二十年				高標 歲貢延川 人	
二十三年	徐奇桂 字月丹舉人 浙江臨安人				

卷之三

二十五年

王景賢

楊廷桂

字月丹舉人寶雞人

朱文傑

鳳翔人
是年改設千總
又改蘇西鳳營

二十七年 張至隆

署乾州知州

二十八年 王毓奇

監生滿洲人

高廷諫

歲貢米脂人

二十九年 朱廷鉉

署淳化知縣

三十年 章紳

監生浙江會稽人

三十一年

龍迅飛

浙江紹興人

米朝雲

靖遠衛人

三十二年

馬貺賓

舉人興安州人

呂鴻勳

歲貢洋縣人

三十四年 倪維梧

貢生江南無錫人

趙惟忠

河南河內人

陳怡

歲貢隴西人

三十六年

崔勉

歲貢隴西人

三十七年 謝嵩齡

署乾州知州

三十八年 姚奮標

舉人廣東潮陽人

三十九年 張翥

進士直隸人

<p>四十一年黃培 署邠州州判</p>	<p>四十二年張文偉 監生江南 泰州人</p>	<p>四十三年孫達 澄城縣丞 署</p>	<p>四十四年孫琮 貢生直隸 盧龍人</p>	<p>四十六年 陳友誠 浙江紹興人</p>	<p>四十七年</p>	<p>四十八年彭爾年 署西安同知</p>	<p>四十九年呂應韶 監生滿洲 鑲紅旗人</p>	<p>五十四年</p>	<p>五十五年田震孚 進士直隸肅寧 人興平知縣署</p>	<p>五十六年王會隆 署長安縣丞</p>	<p>劉銓 署同州州判</p>
<p>李惟新 直隸人</p>											
	<p>張銷 廩貢洛川人</p>								<p>千貞吉 廩貢真寧人</p>		
				<p>汪騰龍 歲貢神木人</p>			<p>楊正茂 歲貢潼關人</p>	<p>饒光榮 廩貢西寧人</p>			
<p>白勉 河州人</p>				<p>趙勝 湖廣人</p>		<p>路得奉 固原人</p>					

卷之三

辛七年 陳九睦

署 興平知縣

辛八年 羅思哈

署 涇陽縣丞

辛九年 羅鳴珂

滿洲正白旗人

趙如龍

天津衛人

六十年 楊俊傑

署 西安同知

雍正元年 杭雲龍

山東聊城人

四年

陳經

吳弓擢

董尚賢

蘇隆

卷之二

四

五年

吏員直隸 順義人

恩貢平涼人

字希聖 歲貢洛川人

固原人

六年

姚奮聖

字亦聞 副貢潼關人

周琬

漢中人

七年

傅光聖

監生浙江金華人

九年

許克家

舉人浙江德清人

寇含鏡

字明公 歲貢中部人

沈華

字紀榮 監生江南吳縣人

十年

楊世英

靖遠衛人

十一年

閻玉

隴州人志作十二年

周琬

寧夏人

十三年楊毓芳

見靜山書院碑
字靜山舉人
湖南黔陽人
志作寧夏生貴陽人
乾隆元年任

乾隆元年

趙振聲

副貢華陰人

邢周建

歲貢合水人

二年

章沅

吏員廣東南海人

三年

李伯齡

武舉山西

趙三綱

固原人

卷之三

十五

楊毓芳

太平人永壽知縣署
書院碑云
在任八年
三年回任
可知

七年

馬尹奇

舉人江南陽湖

劉豫泰

歲貢寧夏人

八年

章會邵

吏員直隸宛平人

九年

董淑典

醴泉知縣署

邵鼎

吏員安徽含山人

郭仙

監生福建仙遊人縣丞署

劉青榮
進士江南
泰州人

十年

十一年吳其瓊

選貢江南
震澤人署

侯鈞

進士江南
無錫人

十二年唐一貞

監生江蘇嘉
定人州同署

李輅

舉人饒黃
旗人

鐘謨

吏員浙江
會稽人

張應銓

舉人涇陽
人

張涵

舉人咸陽
人

解註

歲貢郿縣
人

李執中

郿縣人

卷之三

十六

十三年鄒儒

選貢江西
樂平人署

戴之幹

舉人江南
六合人

十五年劉秉鉞

進士山西
平定州人

十六年龔師勝

舉人直隸
盧龍人

十七年

唐鳳彩

吏員浙江
海鹽人

劉宗孔

選貢扶風
人

十九年

朱昇陽

歲貢渭源
人

伍連登

長安人

二十二年 吳積忠

監生江南如
舉人縣丞署

二十三年 瑪星阿

字景濤 漢人滿
洲正黃旗人

二十五年

李承膺

歲貢靖邊
人

二十六年

歐陽林

監生廣東
翁源人

白祥

長安人

二十七年

李玠

舉人涇陽
人

二十九年 任兆熙

進士山東
聊城人署

王天成

貢生山西
長子人

卷之二

陸維垣

監生直隸大
興人縣丞署

三十年 劉吉

進士直隸
南皮人

張應時

貢生江蘇
元和人

年無考 潘汝瀾

監生浙江仁
和人縣丞署

三十二年

江為式

舉人阜
蘭人

三十三年 歐煥舒

選貢廣東
樂昌人署

吳斯盛

舉人廣東
歸善人署

三十五年朱休承

舉人浙江
秀水人署

李杰

舉人河南
登封人

三十六年

何廷試
志缺

三十八年葛德新

監生山西
浮山人署

三十九年阮曙

舉人江蘇
江寧人署

張貞生

選貢華陰
人

四十年張心鏡

舉人山東
萊陽人署

歐陽林

四十二年

于沛

歲貢興平
人

李莪

隴州人
監經制外委

四十二年

張爾包

廩貢朝邑
人

四十二年程毓和

監生江蘇
婁縣人署

葛善應

選貢淳化
人

胡鼎蓉

舉人江蘇
青浦人

四十四年楊河柱

舉人江南
武進人署

四十五年胡鼎蓉

見文廟
武廟碑

四十六年 阿明阿

筆帖式正
黃旗人署

周鼎樞

舉人浙江
嘉善人

錢汝器

舉人浙江
嘉興人

四十七年 黃景畧

舉人廣東
新會人

四十九年

包均

監生浙江
錢塘人

五十年

曾睿

歲貢漢陰
人

木雲

鳳翔人

巴個唐阿

固原人

卷之三

五十二年

馬崑

選貢寧朔
人

朱庶

副貢咸寧
人

五十二年 田灝

舉人四川
成都人署

五十三年

韓繼晉

舉人三原
人

五十四年 翟續祖

舉人直隸
撫寧人署

五十五年 黃景畧

五十六年

夏寅

監生江南
如皋人

六十年

朱繼武

嘉慶年 朱士蛟

廩貢生山西介休人署

寧朔人

三年 吳永綏

監生江蘇吳縣人署

陳九錫
平涼人

黃景畧

四年

王棟
平涼人

五年

郭京佐

恩貢文縣人

六年

周錫渭

舉人湖南湘陰人署

李宏彥

歲貢石泉人

七年

郭肇

舉人白水人

八年

黃釗

監生湖南善化人署

十二年 林慶章

進士福建侯官人署

張樹勳

廩貢生浙江秀水人

十三年 周賡

廩貢生河南固始人署

張樹勳

曹鳳儀

舉人蒲城人

姜恩嘉靖甲申知武功事。讞獄均徭。勸農弭盜。興作庠序。延訪耆舊。問民所疾苦。夙夜靡遑。逾年。乾州妖人樊伸聚眾攻城不下。南趨武功。恩度賊走礦場。必逕立節橋。令鄉人要繫之。獲賊磔諸市。賊奔礦場。遂爲于敖所擒。堂皇舊支朽木。置弗顧。越三年。政成。民信。乃築堂基。民間工作。獻材木。交錯於道。鄠縣王九思記其事。更爲之銘曰。何令無堂。何堂無作。維侯作之。民心孔樂。戒爾勿亟。基成三日。孰伐爾木。如林斯集。民曰我侯。我父我母。我趨父事。孰忍或後。累官左布政使。

朱哀能吏也。舊志曰。哀狼猛嚴急。惡少斂跡。鑿城西北岡。斷縣地脉。邑人恨之。邵封錄曰。哀抑豪強。祛積弊。關中稱鐵漢。無貶辭。哀前官許泰和不嫻應對。渾厚稱長者。後官陳紳以縣丞攝任一年。民頌慈祥。哀之才。豈許陳所能企及。而輿論品評。所好如此。所惡如彼。讀班氏循吏傳。可以爽然矣。

卷之二

三

牛揚荆琨曹崇朴相邦教同祀名宦祠。揚與朱哀同時。舊志稱其平易近人。遺事未詳。琨入祠碑。載琨由清水訓導。遷燕居。必肅衣冠。臨衆亦寡言笑。勤於考課。卹貧生衣粟。士奮興。售且連科。遷寧夏教授。謝歸。邦教舊志稱其明敏。不避權貴。清賦緩徵。扶善剪惡。調濟驛遞。善政居多。遷正定府通判。亦未詳其實績。

劉相檄均丈地糧。飭民無敢隱計。升科總會。僅增二升五合。遷綏德州知州。

魯變平賦均徭。與民休息。學宮傾圮。變會計公儲。謀定。遷河間府通判。去趙澤民繼至。澤民果毅嫺吏事。期成變志。已程工度。謝官歸。荆琨偕紳士竭作。工僅草創。文廟亦敝甚。萬歷辛巳。曹崇朴知縣事。捐俸錢。剋期興作。學校淪廢垂七十年。工成。落之嚴整。如創

建崇朴沉毅有幹濟獲岐山巨盜不受關說置諸法失上官旨改東明去。

李舒芳謹飭不務紛更邑東長寧鎮舊屬武功民產與平豪任三錫恃勢爭舒芳質上官地復籍遷無爲知州。

劉渤然嚴明一法令崇禎三年旱渤然禱西原太白祠三日雨大沛歲獲豐稔遷慶陽府通判。

張含光以廉介稱時流寇逼城激勵士民守禦處以談笑城獲全盜劫軍餉岐山餉急上官檄近縣賠餉半武功科償不給含光擇署驛壇墮隙地並售寺觀樹木解償邑人感之遷太原同知。

張吉士順治初知縣事首葺學宮授諸生讀籌酌正賦省舊輸十之二民或自殺誣人產置無論惡風頓息武功形勝衝突賊賀珍蜂出寶鷄所至蹂躪吉士完繕夜馳謀告西安急賊薄城攻疾時

卷之二

三

吉士守東門日中得諜譁曰大軍至矣賊懼突殺數賊圍乃解吉士偵賊復來傳餐食衆蒐弓矢戒嚴簡敢死士伏賊歸路明日賊果至矢石突發賊死傷重趨乾州遇伏大破之斬賊魁數十人獲牛馬無算民或匿賊吉士曰非得已也罪已發餘置之境內悉平築舍容萬人逃亡民咸感庇上官檄增輸賦力陳凋敝還其檄吉士明經術諳刑名政尚拊循不務苛察故能文才武畧作民干城邑人袁楷勒碑頌其德沈華去吉士八十餘年由宜君調歲饑等度賑濟民免流亡修義學增諸生舍纂修邑乘博雅有文邑南七里有淫祠曰孤魂神鄉人分年迎祀祀必豐否則喪作送必盛饌設樂民苦糜費積重難返雍正丁卯清明昇神城外毀象投諸河害遂除。

李紹韓順治庚子知縣事延邑舉人張文熙纂續志三卷恪守康

氏志成規而增置藝文已開損益前志之漸歷七十一年。沈華纂後志四卷。增典禮武備六篇。徵引博洽。又四十九年。錢汝器屬長洲吳竹嶼重編。合三志爲一書。多至十八卷。

徐奇桂字月丹。明敏不畏強禦。時有點賊伏岩穴。誘鄉人謀。白晝突出。劫財于隘。行旅苦之。奇桂偵得狀。會營員圍穴。數晝夜。殲其魁。餘悉就擒。同時教諭楊廷桂亦字月丹。工書能文章。立社課文。品隲較錙銖。士民咸愛戴。當時有一月雙丹桂之謠。

郭維藩康熙二年知縣事。邑當孔道。郵政久弛。計畝責民。芻茭槽檻。費不資。維藩請復官馬舊制。民困獲甦。邑南瀕渭。濟以漆。岸地多坍塌。民苦賠賦。力請蠲除。邑豪占王祿田。親行勘丈。尺寸無隱。維藩強毅任勞。輸軍儲。按民疾苦。皆身親其事。邑人立坊官道。頌其德。遷御史。

卷之二

三

孫達。決罰無留宿。任浹旬。搏徒絕迹。驕悍震懼。冒爭母敢詬。積玩之風一變。

楊毓芳。涖任首葺學宮。增其租稅。復建書院。振興文教。書院舊在城隍廟南。移縣署東。名靜山書院。置田二十餘畝。延師授教科名。大振。調長安去。

瑪星阿。爲政有張吉士風。邑通蜀道。際軍儲充斥。民間逋賦十年。瑪星阿綜理有章。數月廓清。檄市騾供軍需。相度機宜。飭衛民充役。下軍屯教衛民樂輸。且勒石頌之。軍務底定。乃葺有部書院。增田若干畝。教諸生講習。又新東郭樓。以培地脉。修姜嫄后稷祠。以崇祈報。刊康氏海邑志文集。孫氏景烈課解諸書。以式多士。鄉會試多得雋者。

陸維垣攝縣事。值歲饑。施粥兩月。始日給數十百人。繼而日數百。

千人遂增至日千五百人。邑人張徽楷作施粥圖。孫氏景烈有觀
施粥圖詩。辛卯春復饑。李杰捐粟五十石。倡士民得粟千餘斛。施
粥濟饑。令男女有序。夫役有稽。存活萬七千餘口。邑人張氏洲記
其事于石。癸丑及嘉慶丙寅復饑。黃景畧施粥。如李繼陸。民食其
惠。景畧官武功。凡二十有三年。

李執中。軀幹魁梧。通文義。嗜讀周程張朱書。洎武功千總任。朔望
率弁兵宣講。

聖諭復延師課兵子弟。讀兵氣振興。咸樂爲用。巴個唐阿。本漢軍
旗人。出旗爲固原人。由行伍授武功外委。嘉慶戊午。從勦川楚賊。
四川竹池陣亡。子巴繼忠襲雲騎尉世職。入籍武功。

舊志闕訪官師

李紹韓。續志知縣。唐交操行堅正。誨諸生如子。以憂去。陳一濂。恭

而有禮。以不諳吏事。改涇陽尉。李梯。巖巖自持。時望頗重。以不協
州守。降解州判。薛郭。踈曠不矜細行。一切出納。泊如也。轉漢中府
通判。岳貢。正慷慨。有古俠士風。然性傲慢。爲士大夫所惡。巡按御
史劾罷之。李雲。溫厚和平。以仁愛爲本。升潁州知州。陳嘉引。寬恕
平易。溫然長者。士子矜式。民戴如父母。升同知。王永年。剛復自用。
頗有治才。民畏憚之。以闖賊入關。罷去。賈緯。祉溫和俊雅。喜怒不
形于色。政簡刑清。古之遺愛也。改淄川知縣。縣丞。蔚本秀。清慎有
爲。民甚德之。升王官去。徐之敬。美丰姿。善奕。恪守成規。一毫不苟。
佐理之良吏也。孔文。諱孤介。有守。典史。林紳。安雅如書生。遷漢中
司獄。李勝文。能詩。儒雅士也。嘗題梁山書院聯云。一水清堪濯。千
山翠可題。升巡檢。張茂猷。勤幹有爲。歷任九年。會代更之際。險阻
備嘗。雖廉介不足。亦一時能吏也。教諭。夏寅。質柔以教。莊雅有容。

升南陽通判楊棟謹厚仁恕三閱月引年棄仕諸生祖於道有回首青氈傲五侯之句衆方知其能詩張自化甫任以違限赴部去其人實俊爽情未見其施爲楊淑京博通經史蜀名士也升國子監助教趙體坤剛方好義非時輩所及卒于官李在簡傲固執能書法李遵好學能文士咸若于其訓升知鄆縣胡淑慷慨有俠氣然酗酒放言遷南京監助教姚運隆字泰階有善教屬諸生頗敬畏之遷良鄉知縣黃如璞修文廟有勞績以外艱歸訓導張錦襟懷修爽不以貧故傷固陋轉寶雞教諭李養梁忠信誠懇有古人風費養源言不妄發簡固少文劉繪爲人清不絕俗教無苛求竟以譖去宋朝會治易有時名仕不廢學遷潼關教諭瀕行于素契者皆有贈別下逮廝役不遺王建官有守復饒幹畧無寒士氣習丁長善寬而有體恕以喻人庶幾有師範焉蔡宗孔嚴正不阿諸生無敢違者。

卷之二

三五

沈華後志知縣邵紳勤慎平易治務近情以憂去章紳明習吏事時稱爲能遷祿勸州牧張至隆善折獄無情者畏其發摘無敢試之朱廷鉉外寬內辨精鍊世故後累官至興黃培綜核明聰後遷知渭南教諭吳弓擢多持正論剛勁之氣雖老不衰後病死肅寺中家貧不能具棺殮邑紳士共襄其喪以歸訓導李國相性行安和待諸生不設崖岸遷寧夏教諭高廷諫平易近人接諸生如家人禮時與回族馬覲寶同官不直其所爲嘗嫚罵之以老罷歸楊正茂爲人坦率和易時論稱長者以老罷歸武職米朝雲忠厚和平兵民俱稱善勉其訓練朝夕不懈一時馬步兵精騎射者武邑稱最路得奉軀幹魁傑和易近人兵民宜之。

錢汝器志知縣劉秉鉞邑之由科第顯者多經指授劉吉嫺于吏

治頗著廉聲。訓導江爲式。工詩文。廉介自守。訓士有方。志曰。永清縣志于舊志人物事跡不詳者。更立闕訪專篇。蓋各爲標目。旣恨于無可表見。僅著尋常一節。亦嫌輕視其人。以爲舍是無他長也。故存舊志原文附錄篇末。亦猶華陽國志之序列漢中士女。初非不信其人爲其善行。倘亦不止于是而已也。舊志載唐交以下政績。或寥寥數語。或泛設膚詞。皆無實事可徵。因倣闕訪義例。存其舊文以識慨焉。



續武功縣志卷之三

選舉志第六

選舉列表。人物所由出也。選舉所載。法期明備。而例無棄取。人物則錄其高秀。義取嚴謹。而詞具抑揚。蓋史家之微旨也。班馬裁篇。莫不先表而後傳。其意深婉。不宜倒置。故依史例。改列人物之前。

明

年代

進士制科明通附

舉人

貢生

武舉

嘉靖元年
年三午

康河

二年癸未

康河

姚涑榜任贛州府知府

卷之三

七年戊子

魏河

任常州府通判

楊纘

張罇

張鍊

鄭時

牛恒

十三年甲午

尚薰

尚芳

任榮經縣知縣

馬蟠龍

任保寧府通判

十四年 乙未 牛 恒

韓應龍榜任
周王府左長
史

二十三 年甲辰 張 鍊

秦鳴雷榜任
湖廣按察司
僉事

尚 薰

任工部員外
郎

喬邦瑞

二十八 年巳酉 張 鑄

徐時行榜任
蜀王府左長
史

舊志進士舉人俱有年甲可稽而貢生自

國朝康熙以前俱不可考今分其時代嘉靖貢生附嘉靖年後

孫 軒 張世策 臨津教諭 楊 鑾 情豐主簿 陳 策 崑山縣丞 魏 華 長垣訓導

丁 貢 臨津主簿 何宗道 太谷縣丞 王 瓊 寶雞訓導 郭 完 通州訓導 牛慶祥 經子偃師縣丞

李 誨 威遠教諭 王永裕 寧鄉教諭 康 濂 裕州學正 楊汝朝 陳宗堯

陳宗舜 傅朝用 廣陵教諭 楊 立 曲沃訓導 康 淳 黨 昭 任縣訓導

康 輪 侯宗史 龐吉元 堂邑訓導 侯宗文 甘州訓導 李 訓

張 鑰 襄城教諭 陳得人 潞安訓導 于世爵 涪州訓導 康 桂 西平教諭 趙 珂 潘王府教授

設廷相 鄧西教諭 康 偉 齊河教諭 李一元 琳子廷長教諭

隆慶四年 李時芳

陳嘉猷 高縣知縣

隆慶貢生附隆慶年後

董文益濟南訓導 康 梈

魏問之湘陰王府教授

弓 鉞蘭州學正

景紹芳靈臺保寧學正教授

萬歷二年 李時芳

孫繼臯榜任山西按察使

四年丙子

康 梈

任靈壽知縣

李居泰

誨子任芮城縣知縣

七年己卯

康 塤

任河南府通判

十六年戊子

弓 燿

卷之三

任永寧州知州

三十一年癸卯

張 橋

三十四年丙午

耿志煒

任工部郎中

三十七年己酉

郭內俊

任單縣知縣

四十年壬子

康 圻

任芮城縣教諭

朱國楨

張 榮

四十一
年癸丑

耿志煒

周延儒榜任
太常寺少卿

任南川縣知
縣

四十三
年乙卯

張橋

任行人司行
人

馬鳴世

四十四
年丙辰

馬鳴世

錢士升榜任
戶部侍郎

朱國楨

任壽光縣知
縣

萬歷貢生附萬歷年後

卷之三

四

張舜耕

羽元孫彰
德訓導

李居敬

詢子太
谷訓導

康

佳

牛

佳
綿竹縣
知縣

王悅言

永裕子韓
王府教授

張

汲
休寧
縣丞

李時茂

劍州
知州

耿光世

儒子松
江教授

康

樅

蕭王府
教授

白思賁

慶陽
訓導

牛仕

恒子

張相

邱縣
知縣

楊

紋

嘉祥
訓導

康大觀

鄭西
教諭

耿評

張惟恭

平陽韓府
訓導教授

馬

當

孟縣
教諭

陳尚文

濟南
訓導

趙希喬

洮州
教授

朱光裕

岐山
訓導

韓

霞

白思問

莊浪
教授

丁世勳

鳳翔
教授

黨邁春

唐縣
教諭

李漸羽

洋縣
訓導

李服義

閿鄉
知縣

呂守業

泰昌貢生並附

張臬

天啟元
年辛酉

李可楨

四年甲
子

尚承業

七年丁卯

任石城縣知縣

尚聘

任鎮平縣知縣

李可植

黃建極

任荏平縣知縣

天啟貢生附天啟年後

張樞絳州同州耿識

張梯平涼教授

劉緯鎮平教諭

崇禎三年庚午

王鎰

任文安縣知縣贈尚寶寺卿

六年癸酉

耿瑩然

卷之三

任獲鹿縣知縣

張文熙

任高邑縣知縣

十三年庚午

李可植

魏藻德榜任翼城縣知縣

康引叔

任戶部主事

十五年壬午

楊澤

張曠

十六年癸未

楊澤

楊廷鑑榜任崞縣知縣

崇禎貢生附崇禎年後

楊克一 馬鳴玉汾州府知府 耿獻忠廣西巡撫 葉綦 李培茂 牛中麒
 耿朗然 甘文燁 張善誘賢良方正 魏立業河曾孫 李培榮

國朝

順治二年乙酉

劉珂 任上虞縣知縣

王家楨

五年戊子

焦勤 任直隸井陘兵備道

康大邦浙江守備

八年辛卯 十一年甲午

趙昌周 楊季昌 牛衍慶 任西華縣知縣

卷之三

六

十四年丁酉

張增 任安仁縣知縣 馬班 尚聰 趙繩祖 李大春

十六年巳亥

尚聰 徐元文榜任 陽穀縣知縣

十七年庚子

馬步階 戴運隆

十八年辛丑

楊季昌 馬世俊榜任 松陽縣知縣

趙繩祖

順治貢生附順治年後

王昌祚 涇州學正 趙行可 馬州學正 康紹叔 平涼學正 李可棟 葛攀桂 江寧知縣

康庶 海元孫 李達 南陽通判 康夢卜 佳曾孫代州同知 劉繼芳 清水教諭 張文燦 寧夏教授

馬環 永嘉知縣贈浙布政司參議 喬可佐 王良臣 喬守約

馬珂 鳴世子

康熙元年壬寅

李華國 朝綱子

三年甲辰

魏永祿 立業子

五年丙午

魏蒞 黨元臣 徐四知

永祿子任洛川縣教諭 恩貢

卷之三

七

六年丁未 馬班

張德惠 任興安州訓導

繆彤榜任吏部主事

黃御衣 鳳縣訓導

七年戊申

耿獻可

九年庚戌

馬珮 選貢當孫府谷縣教諭

董綏寵

十三年甲寅

馬應乾

恩貢禮縣教諭

十五年
丙辰
十七年
戊午

十九年
庚申
二十一年
壬戌
二十三年
甲子

二十五年
丙寅
二十七年
戊辰
二十九年
庚午
三十一年
癸酉
三十三年
乙亥

三十五年
丙子
三十六年
丁丑

張應熊

靜寧州訓導

張廷相

魏湛

李國楫

延安府教授

張禹錫

漢中府教授

魏永祚

張文龍

焦映龍

副榜

焦映岱

卷之三

八

選貢華亭教諭

張壁

朱運豐

馬玃

楊元鯤

李頤齡

崔曇

李崙生

朝綱曾孫

李含英

海寧縣知縣

牛逢慶

選貢

五十五年 丙申	五十三 年甲午	五十二年 癸巳	五十年 壬辰	五十年 辛卯	四十八 年巳丑	四十六 年丁亥	四十四 年乙酉	四十一 年壬午	三十八 年巳卯
	張士元	黨 鈺 麟遊縣教諭	楊君寵 陸川縣知縣	徐 遜 四達子	李 華齡 義服孫	耿 鉞 獻可孫	馬鳴秋	李 玗	徐四達
黨 低	李作舟 張錫綬 副榜	崔 昭 葭州學正 馬慧姿 穎姿弟任魯 山知縣	黨 旻 恩貢	楊 陶 恩貢澤孫	尚 志	張純修			

卷之三

五十六年丁酉

閔文翰

王居敬

副榜

五十七年戊戌

馬鐔

五十九年庚子

魏范

永祿子

六十年辛丑

李乃桂

選貢

六十一年壬寅

焦鑛

雍正二年甲辰

趙驥恒

劉燦

副榜

黃虞臯

崔成遠

恩貢

卷之三

十

四年丙午

張金爐

馬傳

馬錦

任寧洋縣知縣

牛之界

李崇義

劉輔世

六年戊申

張伸

選貢山丹縣教諭

八年庚戌

馬登瀛

耿星

白琦

鳴世元孫

十三年乙卯

孫景烈

馬伸

乾隆元年 丙辰		高迥 <small>任順昌縣知縣</small>	馬克岐 恩貢	程鑾 副榜	選貢
二年丁巳	孫景烈 <small>登明通榜孝廉方正</small>	魏勣	焦璿		
四年己未	孫景烈 <small>莊有恭榜任翰林院檢討</small>		耿性良 選貢	楊彥靈	
六年辛酉					
七年壬戌			孫景昌 副榜		士
九年甲子		劉燦	李可楫		
十年乙丑	劉燦 <small>明通榜</small>		李含睿		
十一年丙寅			李作梅 副榜		
十二年丁卯		趙景梅 <small>任府谷縣教諭</small>	張金甌	張維紳	
				楊秀靈	

卷之三

士

十三年
戊辰
十五年
庚午

馬衍宗

杜瑤

劉以安
恩貢

魏焯

副榜興平教諭

魏正緒

鎮安縣訓導

十七年
壬申

楊本仁

秦大士榜任
廣東高廉道

楊本仁

王世平

恩貢西鄉縣教諭

黨黃琰

十八年
癸酉

張洲

楊本立

選貢宜都縣知縣

卷之三

十九年
甲戌

趙慶璧

二十一年
丙子

張玉樹

符鳳池

孟兆

段士傑

浴子任陽朔縣知縣

二十二年
丁丑

張洲

蔡以臺榜任
德清縣知縣

二十三年
戊寅

馬朝宗

伸子寧州學正

李映梅

二十四年
己卯

趙和璧

二十五年
庚辰

楊克讓

李雲璧

楊秀山

張廷榴

恩貢

二十六年辛巳

張廷榴

王杰榜任枝
江縣知縣

張玉樹

任雲南臨安
府知府

劉煒

二十七年壬午

黃鑑

寧夏教授

王梅如

副榜

楊俊靈

二十八年癸未

徐夢麟

楊俊靈

進士

二十九年甲申

郭綸

成縣訓導

卷之三

三

三十年乙酉

李震川

郭慎行

張書紳

選貢

焦繼烈

副榜

陳應驪

副榜

段浴

張介

喬巖

三水訓導

魯鳳鳴

三十一年丙戌

三十二年丁亥

三十三年戊子

三十四年己丑

三十五年庚寅

王應槐

王人華

三十九年甲午

恩貢
張廷梅
崇信訓導

楊傑靈

四十年丙申

薛應枚
副榜西寧教諭
陳應騶
副榜
張位

張瀚

胡奉先

四十一年丁酉

張寶樹
書紳子選貢
刑部司務
黨植槐

卷之三

古

四十二年巳亥

高登泰
黨行義
劉雲爛
狄道州學正

楊仲彩
秀靈子

四十三年庚子

馬純熙
耿曇
汝和子維南
訓導
耿汝和
劉元灝
恩貢

四十四年癸卯

康步超
岷州學正
孫景熙
徐萬清
楊仲舒
俊靈子

四十五年丙午

徐作楷
迪化州學正
焦士範
恩貢
徐輔清
楊世靈

五十三
年戊申

楊仲覺
秀靈子

孫特
黨瀛
副榜

馬步月

五十四
年巳酉

劉雲龍

黨振聲

楊仲鑑

張燕翼

選貢華州訓導

秀靈子

寶樹子順天榜

馬黃璧

張永清

錦子

五十五
年庚戌

宋作梅

黃虞夔

五十六
年辛亥

段玉田

王鳳來

卷之三

五

富平縣教諭

五十八
年癸丑

弓峻登

黨瀛

楊仲蔚

張應旗

副榜

俊靈子

元齡子

張元齡

六十年
乙卯

劉元灝

欽賜舉人麟遊縣教諭

尚步月

嘉慶元年
丙辰

黨行義

孝廉方正科
山丹縣教諭

桂廷楹

華有詩

二年丁巳
三年戊午

張珠樹

劉奉清

五年庚申

孫慶餘

特子

孫巒

景烈子恩貢

張振川

馬茂林

楊錦堂

固原州學正

孫慶長

特子

張珠樹

沂陽教諭

黨樹蕙

選貢

楊天榜

仲鑑子

六年辛酉

八年癸亥

九年甲子

王璨

楊述啟

君寵曾孫

尚保齡

卷之三

共

十二年丁卯
十三年戊辰

劉晉吉

郭愷

黨金衡

馬凌六

王開科

張寶樹

傑孫

韓玉樹

欽賜舉人

薛應枚

欽賜舉人

十四年巳巳

黨先聲

恩貢

焦鑑

士範子

十五年庚午

弓常新

峻登子

胡鳳鳴

十六年 張寶樹

欽賜翰林院
檢討

癸酉 十八年

張燕序

珠樹子選貢

俊靈孫

楊天賜

張凌霞

張西銘

志曰。康氏海之論文也。以為古人言以見志。故其性情其狀貌。求而可得焉。此孔子所以于師襄得文王也。昔人陶則陶。杜則杜。韓則韓。柳則柳。咸自成家。今或不能自立。傍人門戶。效顰而學步。志意性情。畧無見焉。無乃類諸譯人也。君子不鳳鳴而鸚鵡言。陋矣哉。功名之士。三復斯言。庶幾無愧科名矣。

例貢生監生出仕者

明 馬時中

班序

宜

巴縣主簿

王

容

館城主簿

守

機子榆次主簿

馬襲吉

孫

卷之三

耿光範

儒子遂寧主簿

王乾亨

仁壽主簿

李茂

嘉興府經歷

康禹民

樸子

康萬民

樸子

劉芳譽

張秀

張承燿

朱王臣

耿陳忠

景

堅

大

劉際爵

司獄

張世居

典史

黨孟儉

典史

劉憲

經歷

賀勝

大使

國朝 張

封

臨汾縣丞

郭如嶢

內俊子

程名

馬鳴知

班序

焦映漢

例監歷官

楊一漳

增貢九江府知府

韓文達

郟縣教諭

鄭良佐

饒州府經歷

崔培

廩貢

楊一正

附貢刑部主事

楊佐龍

增貢樂至知縣

焦世爵

例貢

楊力堂

本仁子

例

馬傑

廩貢

軒轅德

寧訓導

馬位

員外郎

楊力堂

貢主簿

張燕嘉

王樹子

例

張溶

廩貢

耿焘

例監

楊琪

廩貢

例貢

馬璧

馬仟

劉繩祖

楊夔龍

崔慶遠

崔宗遠

張偉

劉超

沈志

掾吏

別鴻嘉瓊州府吳名譽湖州府王定國德平楊元吉靖遠蘇繼仲海陽

周復隆觀城張永清龍州

鄉飲賓

劉志德珂李可材可棟兄徐四達康熙楊佐龍 張 治 李光先乾隆

年十一 張維紳 趙廷獻 王學倉十二年劉 燦 徐養初 羅吉人三十

年 張金甌 喬 融 徐 徵十六年馬 傑 高益讓 王生超七十

年 楊佐龍 馬士雙 黨允福十八年馬 傑 崔映霄 張鴻舉

王振德十九年劉 燦 宇文瑄 劉紹宗 李世泰二十年馬 錦

王世平 賀士超 閔 重二十六年劉 燦 王元儒 孫萬有二十八年

馬 錦 張金卣 何君耀三十年郭 綸 郭際藩 徐宏毅

耿世鈺 華 峻四十年喬 巖 黨泰齡 徐儲元 徐復元

蒲逢賓五十年馬黃璧 黨喬齡 華毓琬 田玉潔嘉慶十一年

卷之三

大

武職

明 康堯民樁子左康今民樁子榆陳世忠戶馮嘉陞戶華守遠戶

國朝 康大邦浙江王好文西鳳蘇 然西鳳閻自德西

協千 薛化鳳西鳳韓世榮守備楊秀靈洮州營孟 兆府

總 薛化鳳把總 田招喜生玉子承襲巴繼忠

清水堡把馬象南環元孫嘉慶八年以附 巴 繼 忠

總乾隆年 襲雲騎尉世職

武功縣志

卷四

人物志上

地 170.79
25
3
部

續武功縣志卷之四

人物志第七上之一

武功多世族漢魏以降蘇氏累葉簪纓不減城南韋杜宋有游氏亦克濟美自前明以迄我

朝名公鉅卿輩出子孫繼承亦能以詩書科第振其家聲編為世

族蓋三輔文獻之邦也考諸譜牒先世起家莫不以忠厚勤儉為

本是以後代相傳皆能蒙其庇蔭歷久不衰苟為之子孫者更加

培植延其世德則五世之澤再實之木不必為世祿虞也至於弱

族孤芳編氓高秀本原既厚培養易滋後世克繼遺徽子孫必致

昌大此則余於邑中諸君子有厚望焉李紹韓續志著錄七十六

人仕宦明康海楊秉中康浩牛兆祥李朝綱張儒珍耿儒耿朝用

張鑰趙珂李時芳康樛牛作康垣張波李時茂張相馬當張橋張

志焯郭丙俊康圻朱國植趙希喬張榮丁世勳李服義馬鳴世張

臬張樞張梯黃建極王鑰尚承業丁仕俊李可楹尚聘康紹叔

國朝耿獻忠霍達封贈明康鑾李文厚馬旻康國楊師孟科明楊

繼貢明康演康淳牛中翹張善誘李可棟監明康禹民康萬民張

秀諸生明康燦李可材趙明俊韓識者德明張海耿光前馬自履

耿進李時吉劉志沈華後志著錄五十三人宦馬鳴玉耿瑩然張

文熙焦勤康引叔張文燦楊澤牛衍慶馬班張封張增張德惠黃

御袁焦映漢馬逸姿李含英焦映岱楊一漳義門李瓌篤行張廷

相馬之騷崔祿海崔祿漢耿啟乾張文烜馬鳴秋徐四達耿獻極

康呂賦薛文龍牛星施張琰宇文澄文學趙繼祖朱運豐耿獻可

馬應福楊鑄隱逸張焯李自春魏惟慎藝文志李大成春列女傳內

張錢汝器志著錄三十九人廉能馬慧姿黃虞臯張仲馬錦趙景

趙夢璧馬衍宗楊佐龍張維紳孫景烈孝義馬傑張錫綬張金綬

郭容兆張金白閔洪章劉漢周張爵錫張演楊滋甲康達張復才

文學馬位崔昭張金爐趙和璧醇行楊一湖楊躍龍張天宿党允

福李環方技趙驥恒仙釋佛心上人馬象乾補一人張志張承烈

新志著錄六十三人徽楷張洲張瀚張玉樹張潔張曠弓鉞弓女

煥弓峻登弓燿郭慎行黃鑑焦世爵焦士範焦繼烈李繼明程登

科楊本立楊本仁党喬齡党欽党振聲高元介高迥李可楨張元

哲張渤陳博陳應驪劉紹先劉紹宗劉元灝何敬蘇氏張守元陳

模張統董榮李振楷馬亨馬順世李厚徐立功段玉田田生玉劉

彪縣卷李柏周大用部封錄馬馴楊季昌尚聰孫國良李可楨黃鸞張山人張氏洲文集劉永年孫景昌何瑞皆依據舊志。叅以諸家譜牒。及孫氏景烈部封錄。張氏洲文集。以次編纂。譜系可稽。則倣南北史王謝諸傳之例。合爲一篇。餘倣史列傳義例。分合比次。要皆畧約時代科第爲先後焉。仙釋依康氏志例不錄。

康海

康海字德涵。號對山。事詳明史本傳。不具論。論其軼事。海數歲。與羣兒嬉。父鏞授之業。輒退而嬉。怒欲箠之。課所業。無可箠。乃已。於書覽而不誦。嘗曰。上士恒逸。下士恒勞。誠虛吾衷。以友博學。則博不在友。而在我。爲諸生時。什九在外。日與朋友論說。挾冊者笑之。旣而同試。笑者方構思。海已投卷逝。凡撰著。中煩而外疲。弗爲也。惟靜而虛。虛而意生。滔滔乎來。夫然後操觚而揮。雖衆咻弗聞。未及乎匱也。止焉。蓋養其鋒而善用之。恒若新發礪。及第狀元。授修

卷之四

二

撰。充經筵講官。凡著作。必宗經而子史。以宋爲俚。唐爲巧。秦漢爲伯仲。而未醇。故同進者忌海。海遭母喪。歸。還沙河。遇盜。已令償失金。海受之。及劉瑾敗。忌者劾海交瑾。令懼瑾。故償金。遂罷官。海愛人之心長。而自好短。嘗援李夢陽於死。後顧謗其交瑾。放廢。不復起。然海未嘗仇夢陽也。海之廢也。以文爲身累。遂倦於修辭。曰。辭章小技耳。壯夫不爲。吾詠歌舞。蹈泉石間已矣。乃製樂府。諧以聲容。自操琵琶。倚歌別居澣西莊。自號澣西山人。又號澣東漁父。賓至彈琵琶娛賓。或勸其仕。則怒。舉琵琶提客。然海事親孝。調族黨厚。教育子弟戚黨。皆成名。嘉靖十九年。年六十六卒。命以山人巾服殮。遺鼓三百副。所著有對山文集。澣東樂府。康氏族譜。張氏族譜。武功縣志。行世子栗。字子寬。岸生。早卒。著有子寬集。次樗。字子秀。號小山。喜任俠。詩文有父風。萬歷舉人。聞喜靈壽知縣。有政聲。

著有小山集。子禹民字水衡。監生。工詩文書法。萬民字公遜。一字無沴。亦監生。博學能文。與兄禹民齊名。有增讀蘇蕙回文法。禹民更得十萬首海叔錫鑿。錫字振祿。成化貢生。藁城縣丞。士民稱廉直。錦字華伯。有文行。宏治貢生。長洲縣丞。常州府知事。子濟字德一。與弟濂學行。濟美。濂字德周。嘉靖貢生。裕州學正。鑿字振聲。負幹濟才。宏治末。西虜入寇。出金助餉。子浩洋。河。浩河成進士。以浩官封戶部主事。河官贈知府。浩字德充。正德進士。戶部主事。遷郎中。以慝直出守嘉定府。禮士愛民。有政聲。先是從兄海與御史陳察不相能。察時按蜀。嫉浩罷去。著有旻齋集。洋光祿寺署丞。孫焮號後溪。庠生。博學工文。卒不第。以安貧講學。老著有後溪集。子國字濟宇。庠生。事繼母何。撫異母弟孝友。爲宗黨法。嘗醉游漳畔。薄暮遇少婦。厲涉避去。有無賴警仇。將殺諸阨。遇國得不死。居間釋其仇。終不與警言。爲文千言立就。書工楷法。時有關西兩絕之目。卒祀鄉賢祠。

卷之四

三

國朝贈戶部主事。著有德庵集。子引叔字延周。崇禎舉人。

國朝湯陰知縣。鄰邑詭寄田賦。釐清積弊。治湯衛二水。患去而利普。邑有冤訟。致千金。斥不受。卒白其事。遷戶部主事。解組歸。著有積善錄。澤野詩集。子呂賜字復齋。自號南阿山人。廩生。居喪三年。不御酒肉。能文章。自命必成進士。兩舉副榜。不售。嘆曰。求人何如求己。歲額及貢。棄去。潛心經史。面壁研精。得理學宗旨。以致良知爲宗主。以慎獨爲工夫。以體用一原。內外兩忘爲究竟。著有回書語錄。易語錄。雜語錄。三禮及詩書史錄。高安朱公軾。海寧陳公世倌。皆稱其得理學真諦。雍正九年。端坐卒。祀鄉賢祠。弟呂賦。庠生。九歲失怙。善窺母意。旣授室生子。嬉戲如六七歲兒。母卒。絕粒四

且既禪不御酒肉。焮從孫紹叔字殿周。順治貢生。平涼苑馬寺訓導。克興士習。河字德清。嘉靖進士。戶部主事。明世宗廉其才。命徵涇王祿米。不數日報績。使釐馬房。弊歲省金錢數萬。知兗州。贛州知府。發摘若神。勢宦仇訟。互誣人命。前守積不決。河廉其皆誣。訟遂解。於是訟難白者。造河求決焉。著有漳川集。子樅。萬曆貢生。肅王府教授。躬行禮讓。被容接者。雍然有儒雅風。河族兄弟。演字文敷。成化貢生。少負經濟。瀕仕卒。子永嘉。字可久。族叔海嘗以進士器之。後由正德貢生。除伊陽縣丞。性孤介。恥與世浮沉。致仕歸。子輪。學肖其祖父。嘉靖貢生。永嘉族子。垣字廣廷。萬曆舉人。河南府通判。有治才。垣從弟圻字君畿。萬曆舉人。芮城教諭。

志曰。方夢陽在獄。寄海片紙云。對山救我。後世傳爲佳話。王世貞史乘攷異。反復幾二千言。傳聞異辭。迄無定說。明史載海謁瑾。設

卷之四

詭辭說之。瑾意解釋。夢陽言簡意該。洵稱史筆。呂賜素以文名。所撰續譜。海傳僅據別錄。而弗折衷他說。始未見王氏別集。與河續學居官。亦海之次。豈無行狀家傳。續譜削而不錄。抑又何也。

趙珂

趙珂字德儀。漳環邨人。曾祖庸。永樂舉人。蔡王府右長史。子履信。生經。皆庠生。經生珂。嘉靖貢生。成都府訓導。以禮讓誨諸生。遷藩志作王府教授。時有王生。不給湯粥。珂贈以米。資衣食。使受業焉。潘珂罷官數年。卒將葬。郡令來弔。盛禮祭哭。甚哀。王生也。王習堪與學。爲定塋兆去。郿縣志王命山。西安邑人。嘉靖二十六年。任考其時代。命蓋王生。子希彭。傳國壁。

昌言皆庠生。昌言子繩祖。字其武。號雍門。順治辛丑進士。工部觀政。尋卒。繩祖文不好奇。得先正法。蓋厓楊河及弟淵。同領順治辛酉鄉薦。皆繩祖弟子。歲荒。族有鬻女者。贖爲己女。及長嫁之。子煥。

庠生。生驥恒字燕乘。雍正舉人。工舉子業。因父病。兼精醫學。著有選注瘟疫諸書。子景梅字調三。讀書不沾沾章句。而文思超軼。由乾隆舉人。除府谷教諭。子閻。子文炳。俱庠生。自庸至文炳十三世。皆庠生。希彭弟希喬字北溪。明萬歷貢生。除南漳縣訓導。遷洮岷衛教授。所在稱善教。夢璧字毓荆。與驥恒爲族兄弟。而分支無考。夢璧乾隆貢生。少失恃。育於祖母。事祖母以孝。稱邑令。延主書院講席。從祖弟和璧字秦璽。乾隆舉人。工詩文。弟子數十人。被其沾丐。

丁世勳

丁世勳字欽吾。在城里人。族孫煊。據廟主編列始祖天祐以下。世勳次八世。家貧廢學。同邑張汲憐其才。令與諸子游。從而飲食教誨之。世勳感奮。力學爲諸生。師王死。養其妻子終身。由萬歷貢生。

卷之四

五

官鳳翔教授。稱職。卒祀鄉賢祠。世勳嘗拯陶工郭成。成病愈。謝以金。弗受。歲荒。鄰人常寬盜世勳木。世勳憐其貧。贈粟。戒改行。世勳卒。寬喪服執紼。自述舊德。人始知之。橋亦八世。封滎池知縣。生任俊。萬歷舉人。知滎池縣。歷遷工部郎中。左遷合州。官名缺罷歸。仕俊爲人淳質。無機械。鄉里稱長者。

馬當

馬當字大任。在城里人。五世祖肅。贈戶部主事。生驥。驥。驥。驥。見前志。孫襲吉。生當。當篤於同氣。嘗爲宅代償。兄適。而自儉。屋居由萬歷貢生。除開州訓導。同官吳蓮卒。當營棺殮。歸其櫬。遷孟縣教諭。諸生趙延慶。貧而能文。當周以衣食。爲婚娶。後延慶與當從孫鳴世同榜進士。語及當。輒泣下。卒祀鄉賢祠。開州孟縣名宦祠。宗之驥字三良。庠生。

國朝康熙十八年。遊族子璆永嘉令署。值總兵祖宏勳之變。璆死難。之。隸。冒。死。歸。璆。妻。子。賊。平。陳。璆。節。獲。邀。

贈。廕。溫。處。道。陳。丹。赤。與。璆。同。殉。之。隸。並。衛。其。家。以。歸。或。贈。以。詩。有。曰。不。難。罵。賊。隨。賊。洪。直。欲。存。孤。同。林。日。非。虛。譽。也。應。福。字。澤。吾。驥。元。孫。守。愚。子。順。治。間。人。富。而。好。施。子。璆。知。昌。樂。縣。

封。如。璆。官。璆。死。祖。宏。勳。難。應。福。哭。之。慟。既。而。慨。然。曰。兒。殺。身。成。仁。死。得。其。所。夫。復。何。恨。卒。祀。鄉。賢。祠。子。璆。璆。璆。璆。璆。會。孫。衍。宗。字。聖。宣。乾。隆。貢。生。璆。會。孫。朝。宗。字。海。觀。乾。隆。舉。人。寧。州。學。正。皆。有。學。行。朝。宗。官。學。正。尤。能。廣。其。教。育。璆。字。奉。璋。號。仙。菴。順。治。副。榜。貢。生。初。知。昌。樂。後。補。永。嘉。耿。精。忠。叛。圍。溫。州。總。兵。祖。宏。勳。通。賊。詐。以。缺。餉。激。衆。殺。副。使。溫。處。道。陳。丹。赤。勸。璆。降。璆。罵。之。遂。被。害。賊。平。

贈。浙。江。布。政。司。叅。政。

卷之四

子。祭。葬。廕。一。子。

勅。建。雙。忠。祠。於。溫。州。華。蓋。山。祀。璆。丹。赤。康。熙。四。十。二。年。

賜。謚。忠。勤。並。

御。書。旌。勞。葵。忱。匾。額。榜。其。祠。璆。從。父。兄。凌。霄。子。穎。姿。字。孟。敏。隨。璆。永。嘉。賊。既。殺。璆。洵。劫。縣。署。穎。姿。與。僕。張。義。實。禦。賊。於。門。誓。死。守。璆。家。屬。得。踰。垣。走。持。久。力。不。支。犬。呼。殺。數。賊。皆。死。時。年。二。十。有。五。賊。平。穎。姿。並。

賜。葬。祭。璆。無。子。嗣。穎。姿。弟。逸。姿。字。隼。伯。由。廕。生。除。霸。州。知。州。遷。刑。部。員。外。郎。兵。部。郎。中。權。濬。墅。關。除。陋。耗。商。民。便。之。遷。浙。江。驛。傳。道。補。湖。廣。岳。常。道。調。蘇。松。糧。道。遷。江。蘇。按。察。使。讞。大。嵐。山。叛。獄。平。反。遷。安。徽。布。政。使。歲。荒。請。賑。多。所。全。活。以。事。被。議。若。毫。州。十。年。除。直。隸。子。牙。河。分。司。卒。於。官。逸。姿。居。官。三。十。年。常。加。惠。鄉。里。爲。十。三。里。

完逋賦其最著者。子位字思山。能詩工書法。嘗代張尚書照書九符樣本蒙

恩褒許充

武英殿纂修。旋卒。著有秋窓隨筆。南垞詩稿。選人

國朝英華錄。及別裁集。逸姿弟碩姿子傑。字秀升。以醇謹稱。事繼母孝。母齋素。母歿。祭必素饌。由廩貢生。除西寧訓導。兩舉鄉飲大賓。碩姿弟姿字彥林。康熙舉人。知魯山縣。抑豪強。濟饑饉。民頌其德。罷歸。捐地建靜山書院。藝林稱之。馴字應芳。少從兄驥。授書。勤學淹雅。明成化甲辰成進士。授戶部主事。督糧昌平。杜宦寺冒支。由員外郎轉河南按察司僉事。布政司右叅議。清理錢穀。疏通黃河淤澱。上官交薦其能。轉四川左叅政。時璫勢方盛。乞歸老。朝廷以馴職業修舉。恬退可嘉。詔以右布政使致仕。時年六十五。優

卷之四

七

游田園以老。蟠龍號松谷。馭孫年二十三。膺嘉靖甲午鄉薦。除保寧府通判。上官廉其能。檄核州縣事宜。臧否取決焉。卒於官。祀鄉賢祠。子自履。號後山。醇篤有容。惡少醉侮之。避去若不知。卒祀鄉賢祠。子旻庠生。有善行。無子。嗣兄旻子鳴玉。以鳴玉官。贈汾州同知。鳴世字聲希。號岫旭。蟠龍孫。父旻。贈順天府丞。鳴世萬曆丙辰進士。除知洪洞。砌石梁爲渠。灌田百餘頃。民利之。擢御史。巡山東。時魏璫勢熾。爭建祠獻諛。或諷鳴世曰。魯人獵較。奈何。遂衆持虎鬚。鳴世弗從。魏銜之。時題差宣大。竟矯命削籍。崇禎初。詔復原官。鳴世抗疏辨。君子小人。莊烈帝深嘉之。遷順天府丞。左右通政。太僕寺卿。在通政疏。請增兵措餉。以討流寇。云廟堂之上。以延慶視。延慶未嘗以全秦視。延慶以秦視秦。未嘗以天下安危視秦。而且諛視流寇爲饑民。識者謂切中時弊。晉副都御史。巡撫操江。尋以

病歸起戶部侍郎以母憂歸。

國朝順治元年流寇李自成據西安逼降不屈死初監軍陳某欲安插南兵於武功時鳴世家居以地小民貧爲言事得寢邑人懷其德祀鄉賢祠著有中丞奏疏防江疏草弟鳴玉字聞德明崇禎貢生除知柘城設科條三十五時流寇猖獗所過殘破鳴玉訓練義勇防禦周密城獨全遷汾州府同知策平汾盜合機宜遷汾州府知府汾有慶成永和兩藩王素武斷爲民害鳴玉裁以法皆斂跡崇禎十六年流寇李白成據西安迫輸餉不屈歸自是逍遙林下二十年著有西園詩稿班字漢雙鳴玉子

國朝康熙丁未進士除知平山革恢社鎮商稅千金再知沐陽裁城門擔夫稅錢舉廉遷吏部驗封司主事以清慎稱與修

會典告成授江南驛傳道留部未赴卒於官鳴玉從弟鳴秋字駿

卷之四

八

聲蟠龍弟允龍曾孫康熙貢生童穉知孝年十四就學西安母疾思鳴秋鳴秋輒心動急歸省母疾旋愈遭親喪卧苫枕塊三年忌日悲泣如初喪父國英撫兄國榮遺孤成立鳴秋分爨均已貴驥伯父貞十世孫錦字素菴雍正舉人知福建寧陽縣多惠政士民肖像祀任五年歸舉鄉飲大賓蟠龍元孫章學於李中孚未卒志死見續志譜無。

志曰馬氏譜牒稱驥父肅力田養親事兄如父力有餘則修道路橋梁不愧長者其子孫代膺顯秩宜然而捐軀殉難三世繼美豈不難哉穎安布衣耳慷慨同懷卓然與珥爭光嗚呼烈矣。

楊舟

楊舟字濟川南里城人曾祖禮明初人孫鑑生舟宏治貢生山西夏縣訓導善易撫兩兄遺孤如子從叔父輝無子旣葬修其歲祀

子秉中貴封雲南道監察御史。秉中字用之，號南里。正德辛未進士。除行人司行人，奉命封韓籙，例酬使臣金幣不受。王重其操，贈以圖贊，遷監察御史。嘉靖五年，武清民桑謹七人被盜，誣陷辨其冤釋之。巡按四川，還武功，丁父憂。七年，服闋，入都，寓真如寺。桑謹七人亦圖秉中容以獻，補雲南道監察御史。直聲上聞，世宗賜御膳官器，寵異之。終以忤權貴，授山西按察司副使，旋乞歸。曾孫師孟，號小樓，少孤貧，跋涉經營，獲錙銖必報毋，以博毋，歎以子澤。國朝贈崞縣知縣。澤字雲涵，號臨川。明崇禎癸未進士，除知汲縣，遭流寇亂，棄官歸里。

國朝初，除知烏程縣，賦重累民，給照單質宿弊盡除。以憂去，再知崞縣。崞近直隸，時禁逃匿旗下，澤嚴保甲，令自首免罪，讞五台山嶽賊黨，誣良善，力爲開釋。五年罷歸，著有偶然錄。

卷之四

牛兆祥

牛兆祥字朕吉，牛家寨人。宋靖康間，始祖正徒武功，占籍邵封里。傳九世孫經，明宏治貢生，常州經歷。生兆祥，由正德舉人，除開封府推官，有神明之目。遷知昌平州，錦衣衛內監騷擾絡繹，兆祥僞與交，置酒極歡，豎喜皆俯首聽指揮。舉廉，遷登州同知，再遷韓王府左長史，貧不自贍，負貧歸。子恒，字子占，號槐堂，十歲能詩，嬉戲俯仰皆詩。致嘉靖乙未進士，除知山西壺關縣，政尚清簡，作縣居詩數十首，有汲黯卧治淮陽風。卓異上計，遷戶部主事，支對密雲草場災，謫河間通判，尋遷南京戶部員外郎，除維揚稅弊，再遷河南周王府左長史，輔導諸王。歷二十年，無懈心，間作詩歌以寄諷喻。其周府宮詞曰：春殿牙籤萬軸餘，香勻風細綠窓虛。侍兒臨罷誠齋帖，函出先呈女校書。蕭蕭修竹映池寒，分汲銀瓶灌牡丹。報

到花朝開內燕競持金剪。遶朱欄。夜來行樂雁池頭。侍女分行秉燭遊。唱徹憲王新樂府。不知明月下樊樓。叢生桂樹後山幽。花石猶傳後代留。宮嫗引來巖際望。蔡河春漲拍天浮。吹台南下令婆墳。憶昔從王掌秘文。今日綺羅何處是。野花啼鳥自紛紛。恒爲長史在莊敬。二王間櫟下周元亮。稱詞雖五章。可當夢華錄數卷。所著有九峯樵吟。槐堂集。古文辭集。白閣策筌子。佳字元德。善屬文。以萬歷選貢。除綿竹知縣。明敏有祖風。左遷浙江鹽運司經歷。轉課京師。後期罷。子中兕。生星炮。字峴玉。

國朝順治間人。三齡失怙。依母膝下。旣析居。與母偕。母間宿昆季家。則寢食倉皇。母年八十。漸衰瘠。每撫母背。輒悲啼不自禁。子逢慶。字原其。康熙選貢。邑令沈華。延教授義學。與修後志。舉鄉飲大賓。孫氏景烈。稱武功。二牛氏歲貢生之環。才高而文沈雄。選貢生。

卷之四

十

逢慶學富而文雅。飭俱有可傳者。中兕兄中麟。孫衍慶。字慶長。順治舉人。除知河南西華縣。水潦傷稼。報減賦額。抑不行。文七上罷歸。佳弟佶。子中麒。字仁徵。明崇禎貢生。工書畫。築室容膝。庭蒔花木。寢食其中。里人多不面。耿志煒與中麒兒女姻。勸其仕。笑而不答。以窮約老。

志曰。牛氏多才。恒尤風雅。讀槐堂集。想見其俯仰焉。白閣策筌惜未見。讀黃東麓傳。爭輝泥東矣。

李文厚

李文厚以子朝綱官。封監察御史。鄉里稱長者。朝綱執法不阿。某自度必得罪。密乞文厚關說。文厚固辭。時謂文厚有子。朝綱有父。云朝綱字振之。號武川。由正德舉人。除知聞喜縣。清介特著。上官某疑其詐。假覈錢穀。突入內室。檢箚中。舊衣書籍耳。朝綱妻方紡。

績竈下炊脫粟某嘆曰吾真小人也首薦之尋擢御史巡歷所至墨吏望風靡嘉靖間疏請罷天下中使遷山西按察司副使岢嵐道卒以清直罷歸孫國華曾孫崙生皆國朝康熙貢生。

耿儒

耿儒字季醇元末名再成者從明太祖開國勲勞死事追封泗國公其別支白固始徙武功兄弟三人分東西耿輝爲西耿永樂貢生府軍前衛經歷曾孫堂贈太平知縣生儒正德十四年與族兄弟朝用同舉於鄉時號雙龍除知河津太平修學校嚴緝捕明察無敢欺舉廉行取入都不能俯仰交納出判廣平府卒祀鄉賢名宦祠子光前字爾孝與諸弟析居僕婢擇其老者曰事子久樂與侶也田土分其瘠者曰子所置也衣服器用取其舊敝者曰子所

卷之四

七

習用也邑人稱其義舉鄉飲者賓于評萬歷貢生贈吏部文選司郎中子志煒字明夫號孟諸萬歷癸丑成進士除荊州推官荆地瀕江患漸洋二洲水害志煒築堤三千餘丈人咸樂業稱曰耿公堤荆有湖田民久業福簿請益采下其議撫臣梁某議如所請志煒不從某怒將以違旨劾辯益力竟得寢遷吏部主事文選司員外郎天啟初魏璫用事歸里杜門不出者八年崇禎初起文選司郎中莊烈帝書其名示輔臣曰耿志煒清公任勞怨可久任也會推閣臣尚書王永光意主溫體仁囑志煒署名濡筆強之志煒正色曰閣員豈徇情之具私寓非考相之所投筆出尋遷翰林院提督四譯館太常寺少卿以母老乞養歸值流寇猖獗志煒激邑人忠義登城固守城賴以全崇禎丁丑十月五日有星隕於門越二日卒邑人懷其德祀鄉賢祠更建專祠以祀著有怡園新詩和元

韻詠懷詩。子獻忠字伯長。崇禎選貢生。除元城縣主簿。累官廣西巡撫。

國朝順治初。分巡閩。官名志時明唐王朱聿鍵初平。執獲首功。不

辨珉玉。獻忠訊釋數千人。除廣東布政使。時李成棟鎮廣東。任武

德。摧折士大夫。獻忠警成棟。粵東世族多獲保全。順治五年。成棟

以廣東叛。附明永明王朱由榔。獻忠事見明史。朱天麟傳。順治九

年。授廣西志作巡撫。未蒞任卒。子啟乾字子元。庠生。明末荒旱。頻

仍啟乾。資粥施賑。復買棺掩遺骸。大稱其義。光前弟光範元孫。星

字天章。學工制藝。年三十。猶應童子試。康熙己卯。學政陸公德元

聘舉人。錢可大閱試卷。知星閱武功卷。得佳文。拍案曰。必耿君也。

陸折卷果星。由是名大著。由雍正貢生。肄業國子監。客死都中。朝

用號兩泉。父雄。爲東耿。生朝用。正德舉人。知盱眙縣。以仁厚清廉

卷之四

著。遷濟南府通判。蕪州知州。祀蕪州名宦祠。兄字子進。字德寵。某

竊進粟。猝遇進。進曰。卽貧何至。是某惶伏。進遺竊粟道去。歲禮焚

貸卷盡。皆人所難能者。舉鄉飲賓。孫瑩字碧若。崇禎舉人。

國朝初。除岐山教諭。遷獲鹿知縣。平田賦。情訟獄。吏嘗以金斥之。

時禁匪逃。旌律連坐。委曲辦理。多保全。真定營卒擾鄉曲。制以法。

皆斂跡。近山多嘯聚。選鄉勇擒捕。悉解散。子獻忱。曾孫汝恭。居城

東街。乾隆丁丑。母閔卒。寢苦三年。己卯冬。葬母河東二水寺。晝理

家計。夜宿墓側。又三年。獻忱弟獻極。字建公。庠生。性豪邁。喜急人

難。而涇渭自分。舉鄉飲介賓。孫性良。字醇夫。工書法。敏於文科。試

五經。專經者。瞠乎後也。爲諸生。與孫氏景烈。齊名。同受知於邑令

楊毓芳。以乾隆選貢卒。毓芳聞其喪。哭之慟。瑩然。兄子獻可。字君

若。庠生。應歲試。榜未放。學政令自信者。領卷。諸生率遠。巡獻可詣

院曰。李生第一。生次之。學政喜其氣度。曰。真秀才也。終康熙貢生。志曰。志煒進退從容。綽綽有古大臣風。觀其見幾。寺禍杜門八年。未嘗不爲楊左諸君子惜。而後裔凌替落落無所表見。東耿無顯宦。瑩然清介。克述父德。俾子孫詩書承繼。代有傳人。朝用家聲。賴以不墜。豈不賢哉。然而鄉人稱耿氏賢者。必首曰耿太常。

魏河

魏河字本澄。戴家坡人。嘉靖舉人。除常州府通判。議甦江陰縣。江田逋賦。丁內憂歸。復補大名府通判。六世孫蒞。

國朝康熙舉人。洛川教諭。善書。子正宗。

贈興平縣教諭。家貧。飯食炒豆一掬。學益力。子焯字伯明。乾隆副榜。除興平縣教諭。課諸生。先性理。次文辭。錄大學衍義誦之。終身遇春秋廟祭。前三日。不飲酒。不茹葷。如古齋禮。

楊纘

楊纘字禱。昔北關人。始祖控。明洪武間。由固始遷武功。十世孫立。嘉靖貢生。曲沃訓導。生纘。有學行。嘉靖舉人。會試卒於京師。嗣兄續。子庠。生璧。生汝智。庠生。鄉飲耆賓。子懷瑛。亦庠生。鄉飲介賓。以子季昌官。

國朝封松陽知縣。季昌字九如。順治辛丑進士。吏部觀政。出爲松陽知縣。稱能吏。以親老乞歸。善書法。工詩文。著有江遊集。海東秋吟。箋雲樣槎。嶰雲集。子鳳翥。亦庠生。續七世孫滋甲字特生。未嘗學問。孝悌性成。居親喪。哭泣痛及鄉鄰。

張海

張海世居興城里。七世祖盛。元大德間人。元孫敬。明洪武間人。生海。海天性朴厚。嘗市肉。屠給衡數。信之。某掘地得金。誤以易鋤。海

篤行士。棨弟樞字斗垣。明天啟選貢。山西絳州同知。攝蒲州事。以廉正稱。大學士韓爌家居。重樞。韓奴橫。亦懲以法。卒祀鄉賢祠。子承煜字魏卿。樞遺腹子。

國朝生員。博雅多聞。鍾字伯始。號漆濱。嘉靖戊子。與弟鍊同舉於鄉。時號雙鳳。鍊早成進士。或勸鍾謁銓。曹鍾曰。千鈞之弩。寧摧撞折。牙不能學羣兒彈射也。壬戌亦成進士。距鄉薦三十五年矣。除知曲沃縣。裁青衣皂隸。夫馬徭役冗費三千金。有奇。邑豪占丁役一里。取值歲數百金。鍾革之。與豪忤。豪搆中傷。鍾謫汝寧教授。遷黃州判官。兩淮鹽運司判官。大理寺評事。時有誣及殺叔者。鍾力辯得白。顧其叔富室也。關節於主卿。主卿又張居正姻婭。以是沮抑。甫遷寺副。卽出爲蜀王府左長史。以病歸。心切施濟。有德於鄉人。卒祀鄉賢祠。子汲字不棄。萬歷選貢。休寧縣丞。清介不避權貴。

卷之四

十五

邑豪率白眼。汲曰。居官而爲人奴隸。非夫也。拂衣歸。武功廟學祠宇。漆渭橋梁。皆汲倡修。復置義塚。建浮屠。著有南遊稿。仰濱樂府。以子相官。贈邱縣知縣。子臬。相。橋。林。臬字汝陳。爲諸生。以文名顯。與弟相橋。號關中三鳳。前後提學。重其文。屬專纂陝西陵墓志。秦昌選貢。著有二水山房草。無子。嗣弟相子文熙。以文熙官。

國朝贈高邑知縣。文熙字存白。年十六。充縣學生。與族弟熿。同明崇禎舉人。

國朝初。除知高邑縣。政尚簡易。工古文辭。與修陝西通志。所著有嶰谷集。旅遊草。武功縣續志。子封字公慎。事繼母孝。由康熙貢生。除山西臨汾縣丞。著能名。歸開青玉閣。會詩文。工繪事。三舉鄉飲大賓。著有蜀道吟。浪遊草。平陽紀咏。封弟增字仲謙。順治舉人。知安仁縣。充康熙丁卯科同考官。能得士。增弟子金門。庠生。以孫廷

榴官。

馳贈枝江縣知縣。無子。嗣兄金輅子。演字法聖。家貧。事嗣母備甘旨。母卒。鬻產。塋產。且盡。或勸之。泣曰。親恩罔極。我能自盡者此耳。追爲後日饑寒計。子廷榴卒。成進士。以廷榴官。

贈枝江知縣。廷榴字安石。乾隆辛巳進士。知枝江縣。疑獄苦株連。廷榴訊得魁寃。盡釋。邑瀕江。殺人輒投尸江中。嚴懲曲論。風乃息。江岸善崩。居人危之。程工修築。民獲奠安。在官六年。以母老乞養。歸。相字爰立。萬歷選貢。知邱縣。有惠政。官四年。以父喪歸。不復仕。或勸之。喟然曰。一親膺封典。吾志畢。寧復爲五斗米折腰。著安雅堂草。祀鄉賢祠。子文耀。生塋。

國朝庠生。塋曾孫徽楷。字伯模。父早卒。祖蒲錫疾。爲嘗糞。甘苦。邑宰楊毓芳旌其門。間作詩歌。語奇偉。畫亦有致。文耀弟文熊。庠生。子塋亦庠生。塋以孫洲官。

卷之四

六

馳贈修仁縣知縣。無子。嗣弟塋子。金直字秬一。庠生。生九齡。葬塋。哀泣如成人。博聞善記。爲人長者。舉鄉飲介賓。知子洲才。督課嚴。洲卒。成進士。以洲官。

贈修仁縣知縣。洲字萊峯。號南林。少爲諸生。文名藉甚。肄業關中。嘗院。與大荔李法。武威孫備。吳堡賈天祿。雒南薛宁。延韓城王文。端公杰。俱爲古文學。時孫氏景烈主講席。稱爲關中六士。乾隆丁丑。成進士。除廣西修仁縣。解緬甸軍需馬。辦兩月。遭父憂。歸服除。銓知浙江德清縣。兵部員外郎周。浙江布政使徐戚也。索厚饋。不與。遂搆洲。旣涖任。清積訟。辨舉人蔡三辰寃。縣瀕太湖。爲盜藪。正月朔。出其不備。捕獲盜首十三人。徐上計殿。調簡改教授。乞病歸。主講嶧縣膠州書院。洲少肆力古文辭。論者謂直接對山空同諸

君子生平游歷西至蜀南極粵往來吳越楚豫燕趙而終老於齊山川助其氣勢憂鬱佐其謳吟卓乎自成一家言所著有對雪亭文集十卷詩集六卷詩餘一卷論語講義一卷詩經講義一卷洲生平謹言文辭亦不輕作子樹楠外舅陶爲妻乞壽言却之文能與人交周急無德色子堦生金爐字仲鼎雍正舉人淹貫經籍好班扶風范華陽書文章有兩漢風老舉鄉飲大賓金爐弟金印無子嗣兄大猷子瀚字浩然乾隆貢生喜作記傳表章邑人潛德與孫氏景烈爲文字交互相質也有清白裔或誣爲奴邑宰偶咨瀚事得白堦弟堦字子敬庠生家素裕歲饑輒出粟濟窮乏子金綬字子章庠生尤樂造就後學出資爲里黨延師且給衣食焉橋字叔濟號元珠明萬歷癸丑進士授行人司行人奉使朝鮮卒於道

卷之四

七

著有南遊詩失於兵燹子女煜庠生生墟國朝順治間人子爵錫字天秩幼失怙恃家寢衰歲饑不及莖隨母就食外家扶風母旋卒亦厝焉年十餘歲歸里迎母櫬同父合祔如禮以孫玉樹官

馳贈膠州知州子書紳字公佩少歷貧窶嚴冬草閣不蔽風雪置足藁楮中讀不輟年逾五十以乾隆選貢老教子玉樹成進士將謁銓部書紳訓之曰爾民父母也爾視民如吾視爾則民視爾自如爾視吾矣玉樹卒以循吏稱以玉樹官

贈膠州知州玉樹字德潤號蔭堂少從父讀遭際艱難而學問固旣成進士教授齊河令署究心吏事而治法精乾隆甲午攝知清平縣時叛賊王倫陷陽穀北躡去清平三十里邑無城民沟懼玉樹趣繕防禦鳩僕役公服懷印示必死民心以固賊平卽真首建

書院義學。教樹桑柁。調劇嶧縣。地衝役重。而秣役馬。輸官熒濟。盈口河。及運河。絳夫尤爲民累。漚任十日。悉罷之。旣而河決絕。運道漂沒。廬舍無算。玉樹詳報。請恤。檄截留糟米。濟寧。濟寧距嶧二百餘里。乃假數千百金。倍糴黍粟。加額以賑。徐糴漕米。酬假款。是役也。省運費。無需時。民得黍粟。數倍南米。其利普焉。舉廉。遷知膠州。某生素通。胥吏病。民間玉樹至。懼而自裁。於是豪強斂跡。遷知濟寧州。一年。再遷雲南。臨安知府。首罷供支夫馬。次與學校。修水利。復義倉。士民感被。滇多私鑄。儲粟者藉以居奇。錢價日增。置城鄉錢米二局。米局假千金。糴米備糶。錢局貯制錢。收私錢。民間私錢滯塞。樂易制錢。錢價定。米價自平。有疾者。民八百餘人。祈社減算。以代。旣卒。農夫村嫗。更番哭奠。復肖像建祠。以祀。及行。選丁壯備糗糧。昇柩歸武功。傾城哭祖道。白衣冠如霜雪。一時有雪滿臨城。

卷之四

六

之謠。玉樹事親孝。居喪倚廬三年。及官嶧縣。煮粥施賑。嶧當

南巡。蹕道期迫。賑未畢。趨役次。夢父告曰。民饑奈何。驚覺。馳歸。歲賑務。著有恒。訓。閣志學錄。存辨錄。秦賢彙集錄。各二卷。惕終齋日記。十四卷。詩文抄。存二卷。叔銘純。字又新。監生。善持家。減衣食。佐兄讀。撫玉樹。慈愛逾於兄。玉樹視猶父。及官嶧縣。

馳贈如已官。鍊。字伯純。號太乙。嘉靖甲辰進士。出行人。司行人。遷刑科給事中。齊東有紅羅女。田斌變。巡撫何鰲。匿不聞。鍊特疏發其事。世宗震怒。下鰲獄。鰲黨嚴嵩。嵩。嶧鍊。鍊知陝西總督。會銑才。與大學士夏言議。俾開府西陲。圖復河套。舊驢。嵩與言有夙隙。誣殺言。及銑。更責諫垣。各予杖。鍊被杖幾死。出爲湖南按察司僉事。湖南士大夫稱最歸里。四十餘年。置義田。周族黨。年九十一歲卒。祀鄉賢祠。著有太乙稿。經濟錄。雙溪樂府。太乙詞抄。孫珠元。孫維紳。

字四持。乾隆貢生。讀書觀大意。而工於文。嚴正不妄交。舉鄉飲大賓。維紳從祖弟。潔字進菴。庠生。亦工於文。然而數奇。族兄演善數。屢阻其試。潔憤甚。卒不第。以投徒老。珠弟琳子。曠字君闇。性豪邁。讀書遇古忠孝。輒掩卷揣其情狀。與從兄文熙同崇禎舉人。國朝順治元年。流寇李自成僭偽號西安。某舉曠才。賊嚴檄招之。不應。劫致授偽職。又不從。置諸獄。大罵賊怒。毆曠仆地。不食死。續志缺載。事詳家譜。歿死年符明史據譜增入。

志曰。海以力田起家。傳數世。科第聯綿。簪纓繼起。列名膠庠者。且百數十人。巍然爲郟邑巨族。而鍊之直。曠之列。洲之文章。玉樹之政事。尤爲表表可傳。余嘗讀其譜牒。至海追還遺金。儒珍負母骨。逆旅。輒爲之慨嘆不置云。

尚薰

卷之四

尚薰字德馨。尚家坡人。父達明。巡檢。贈工部員外郎。薰與弟芳同領嘉靖甲午鄉薦。薰甲辰成進士。知襄陵縣。興除宜民。遷南京工部主事。再遷工部員外郎。分遣雲南開局鼓鑄。未幾歸。卒於家。芳爲諸生。讀書善慶寺洞中。貧無書。借書遍錄。悉能記誦。後知榮經縣。薰孫承業字克承。號九崖。亦與兄子聘同領天啟甲子鄉薦。除知石城縣。僧訟失金。承業曰。僧金非外人所得。知。按之果僧弟子。發金千餘兩。左右勸入官。承業曰。僧被盜而我得金。是二盜也。卒予僧監生。某兄弟構訟。爭餽厚賂。斥不受。仍勸諭友愛如初。邑俗爭墳山。積牘久不決。承業親勘。立與清結。官六年。民立祠以祀。聞流寇亂。告歸。卒於道。聘字應三。工詩文。善繪事。除知河南鎮平。緣事謫常州。照磨。

國朝順治初。除寧國府知事。承業子聰。號小崖。順治己亥進士。知

山東陽穀縣。

李時吉

李時吉字惟亨。在城里人。先世自固始遷武功。以德新爲始祖。七世孫思恕封山西按察司副使。生時吉。性樂施與。歲饑。鄉里乏籽。種領庚分給。明年倍其償。辭不受。弟時芳字惟榮。號兩山。萬曆甲戌進士。戶部主事。監倉場。舊衙投數金不起。易新衙。錙銖悉應。出知河南府。以經術飾吏治。列剡薦三十六疏。遷山西按察司副使。岢嵐道。地近邊。墻修城堡。厲卒乘。墾營田數千畝。再遷山西按察使。丁憂歸。著有兩山詩集。弟時茂字惟實。萬曆選貢。除開州判官。善折獄。遷河南府通判。時閹寺競開礦場。激劫兵變。時茂單騎往諭。執渠魁。餘悉解散。封嵩縣丞。寧盧氏一十三礦洞。遷知雲南劍川州。俗多跣足蠻服。浹月革其舊。釐正三十年。丁賦得編。匿丁九

卷之四

三

千。徭役以均。子可植。天啟舉人。崇禎八年。流寇高迎祥畧武功。殺可植於路。時芳子可植字在敏。崇禎庚辰進士。知真定縣。改補翼城縣。會流寇亂。棄官歸。

國朝順治初。除知上猶。辭不赴。未幾卒。時吉子可材字用吾。順治庠生。善醫學。舉鄉飲賓。可材弟可棟字在美。順治貢生。博學工書法。兼精篆隸。叔時茂卒。其子奔喪劍川。可棟跋涉數千里。同扶柩歸。

弓鉞

弓鉞字汝虔。明初。始祖寬自邠州徙武功山。邨好施濟。生子仁。官授秦王府典膳。正生鉞。隆慶貢生。除德平教諭。遷蘭州學正。再舉鄉飲大賓。晚年寓長安。亦再舉長安鄉飲大賓。孫之秦。

國朝庠生。復歸武功。孫文煥字天章。家素貧。無子。力作供弟冲漢。

讀冲漢卒。撫其子賜彤。日事隴畝。問曰。弟子猶吾子也。冲漢庠生。賜彤亦庠生。賜彤子。峻登。字極之。乾隆舉人。好古文詞。喜方畧。嘉慶初。川楚賊劫掠山外。武功騷動。峻登鳩衆堡守。遠近效之。鉞兄子。旣穀。贈成都通判。子。耀。字騰輝。萬歷舉人。除成都通判。時值明末。盜賊哨聚。擄掠。耀設計擒獲。居民安堵。遷知山西永寧州。盜謀襲殺。耀聞之曰。吾愛民。何畏盜也。盜卒不敢發。任永寧。務崇學校。鉞兄弟六人。兄統銳。子孫多徙居長安咸寧。有舉人射斗。丕中。不隸武功籍。

郭內俊

郭內俊。字見心。洛陽邨人。始祖子寧。宋代自固始遷武功。八世孫榆。生內俊。萬歷舉人。貧而好學。知單縣。務實政。子如嶢。鄒縣丞。榆叔世良。元孫容兆。字衆康。

卷之四

三

國朝監生。考授州同。愛弟容庶。弟卒。撫弟四子。皆成立。以子綸官贈成縣訓導。容庶孫慎行。字敏夫。乾隆舉人。著學庸知解錄。除鎮安縣訓導。未赴卒。

朱國楨

朱國楨。字翊明。川口人。始祖錦。元奉議大夫。阿魯府左長史。六世祖鑑。元孫光裕。明萬歷貢生。肅州衛教授。生國楨。治尚書及左氏春秋。萬歷丙辰成進士。知山東壽光縣。邑災蝗。緩稅息徵。給牛種。令捕蝗百石。賑粟百石。立格旌賞。於是逃民復業。子運豐。

國朝康熙貢生。事母孝。能文章。子鼐。康熙舉人。運豐兄子。屢庠生。工詩。著有敬齋草。崔昭稱其大言。爰深詣理窟。益不徒以詩鳴者。

黃建極王鑰

黃建極字表中。號東崖。顯義里人。天啟舉人。知在平縣。縣有巨盜嘯聚。乃禮結士人。廉盜所潛伏。出奇計。置諸法。察廉。行取入都。未及行。值

大清兵東下。城陷。及其女。乃自殺。後蒙贈恤。見明史忠義傳。所著有守城庸言。五十四篇。子御袞。字仲補。弱冠隨父在平。父殉難。哀痛悲號。拮据數千里。扶柩旋里。由

國朝康熙貢生。除鳳縣訓導。倡諸生修廟學。勤講課。董修鳳縣志。孫虞臯。字元弼。雍正舉人。知山西鄉寧縣。縣產鐵。業炭窑千餘家。苦胥吏需索。首禁之。隣縣饑。檄撥運常平穀賑。額不足。輒買穀協糴。雹傷稼。出俸錢給籽粒。而後報聞。僧某掘地得金。議判入官。不從。給僧佈寺。弟虞夏。早世。撫遺孤。鑑銘如巳子。鑑字子虛。父虞夏。賈蜀新都。客死。塋義塚中。時鑑方數歲。乾隆壬午。舉於鄉。麻衣草

卷之四

五

履匍匐新都。尋父柩。荒塚縱橫。杳無踪跡。刺血清枯骨。遍不得。則繞冢悲號。困頓中。若有人示以地。旋得碣土中。姓氏里居無訛。復刺指血滴骨。血滲入。遂棺殮歸葬。秦蜀人皆稱黃孝子。除山丹教諭。

贈虞夏如其官。遷寧夏教授。嘗教諸生曰。人之所以爲人者。忠孝而已。舍此何以爲學。

王鑰。字北門。高望川人。祖永裕。嘉靖貢生。寧鄉教諭。生悅。言萬歷貢生。韓王府教授。生鑰。崇禎舉人。嘗夢神示以鏡鑑。及終身。既醒述之。而不言其終。除中牟教諭。遷知文安縣。爲政忼爽。精勤。十一年。

大清兵由喜峯口南下。鑰鳩衆城守。身率同官。親當矢石。七晝夜。矢盡援絕。城陷死之。其同官主簿山東安衡。典史河南湯國。紀訓。

導河間郭養性亦死焉事聞贈尚寶寺卿廕一子入監。

國朝崇尚節義纂修明史載忠義傳鑰祀文安名宦祠而武功鄉賢典闕曾孫植病將屬纊語其戚張氏洲爲作記傳因次其事而爲之贊曰志士忘身貞臣死事溫序周苛風傳奕禩嶽嶽王公疆邑守吏傾厦曷支厥衷罔異殫力及旬之死勿二身與城俱舍生嗜義苟生者徒覩面而逃繫誰無死死等鴻毛惟公氣意企古賢豪太史執簡金管揮毫書事書名爰詔後世白日流光秋霜彌厲聖主旌忠勸來報往俎豆桐鄉牲醴斯享亦有在平臣節不爽比時同輝邵原莽莽凜烈英風我民慨想梓里可祠茲邑攸仰。

志曰我

朝王師撻伐天下無敵雖有孫吳安所施其知哉鑰與建極不量蝦臂城破之日甘心一死雖違

卷之四

天命可謂忠矣鑑漬血枯骨忠孝萃於一門建極有孫哉鑰後嗣不顯而植拳拳祖德至屬纊不忘悲夫。

焦國鼎

焦國鼎河道里人父萬倉國鼎沉重寡言早歲爲諸生杜門績學明崇禎末出穀賑饑後避流寇亂爲賊所獲賊有識之者曰此焦公也何可犯送還里。

國朝封刑部郎中祀鄉賢祠子勤字魯生順治舉人知臨桂縣遷刑部郎中扈從南海子奏對稱

旨命恤刑兩廣多平反擢直隸按察司僉事并陘兵備道有惠政遷江南布政司叅議丁內艱歸哀毀踰禮嬰沉疾猶扶病事父晨昏初官嶺南妻劉卒於家終身不再娶分兩弟宦遊餘金無所私祀真定名宦邑鄉賢祠子映漢字雲濤由監生除知巴縣康熙十

九年譚宏叛映漢募鄉勇捍禦全城卓異遷刑部員外郎出守平樂調慶遠撫馭犇捷巡撫彭鵬舉廉晉雷瓊道映漢宣揚

聖諭導民向化邱文莊濬海忠介瑞瓊產也風節冠一鄉遺文散佚倡粵人重刊遷江蘇按察使會總督與巡撫不協並誣映漢落職久之獲昭雪改廣西按察使卒弟映龍字卧雲康熙副榜工詩古文少倜儻廣交遊有豪放不羈之目既而杜門三年更精性命之學學者稱卧雲先生著有拾遺集子世爵字紹菴爲映漢嗣子映漢被誣落職八年時世爵以例貢生需次銓部弗忍仕匍匐險阻萬狀旋遭父喪服闋除知霍邱縣邑有寶宦訟產托巡檢某懷金關說世爵笑且吟曰年來酌水惟明志夜靜焚香可告天某慚退四年被劾去職勤弟子映岱字春瞻早喪母事父以孝聞由康熙選貢除華亭教諭攝縣篆政教並著孫士範字玉成深沉有容

卷之四

二五

地隣某誣其侵佔度地鄰實侵佔畝餘士範曲爲解說釋其慚讀書早慧年十六充生員第一人以貢生老映岱弟映恒孫繼烈乾隆副榜貧而好學授徒得修金付弟供家計妻子無所私鄉里稱友愛

張氏洲曰焦氏宦者三世顧類皆坎坷抑塞然所在民思抑班氏所云在官無赫赫之蹟去後常使人思者是與非與

李栢李繼明程登科

李栢在城里人以耕讀傳家訓諸子曰勿分爾我勿蓄私財勿聽婦言惟力田業儒永守家法傳友庚友甲友甲無子友庚傳璪璪皆庠生兄弟恪守祖訓合龔終身璪傳生馨生馥俱庠生璪傳御芬御芳御芳庠生生馨修明家法簡御芳掌家政早夜勤劬歷數十年財用無私兄弟子孫咸俯首聽命生馨傳修生馥傳械彰參

御芬傳倬。修庠生。家政聽於倬。雍正十年。參倬俱存。當是時。修傳含英。康熙丙子舉人。傳子作士。庠生。是爲李氏大宗。含英弟含芳。傳作弼。械傳含哲。庠生。次含謀。傳作善。彰傳含睿。含錦。含睿貢生。傳作樺。作棟。作梁。參傳含義。含元。含元傳作仁。倬傳含輝。次子含澤。爲御芳嗣孫。子孫衆多。咸聽命於倬。邑令上其事。

欽賜御書匾額曰敦睦可風。含英字秀初。官海寧知縣。清介自持。罷歸。行李蕭然。亦足徵其家範。

李繼明。崆峒邨人。始祖李孟春。孫自誠。生繼明。繼亮。順治間人。兄弟不異爨。繼明傳長興。長隆。繼亮傳長泰。長美。四傳至元孫。五服親盡。猶恪守祖訓。不分析。時長美有六世孫。瓜兒。蓋七世同居云。程登科。長寧舖人。父英生。登科。登第。父卒。登科傳長良。長傳樹芳。歷秉家政。登第。傳和。和傳樹賢。樹積。樹善。或讀或耕。或買皆勤。苦助家計。嘉慶十八年。樹善及樹芳子式。存孫曾蕃衍。式及樹善。能聯以雍睦。不替其家聲。

卷之四

二十五

志曰。栢家訓善矣。然非生馨。簡才授政。統馭有法。又何以歷久不衰。繼明登科。事多未詳。而台君數世。與生馨競美。故附栢後。以觀家政焉。

楊鑄

楊鑄。字大治。菜園堡人。始祖廣明。洪武間。由河南固始遷居武功。鑄。廣十世孫也。

國朝順治間。庠生。幼孤。事母六十餘年。逕馬嵬坡。拾李姓遺金。訪還長安。舉鄉飲介。賓將卒。焚借券。謂諸子曰。爲汝等消過也。子一漳。一湖。一正。君寵以一漳官。

贈中書科中書。一漳。字子淵。增貢生。除膚施縣教諭。遷知廣西昭

平縣釐清逋賦以德化盜盜自革擢中書科中書授九江知府子
佐龍字熙載庠生援例除四川樂至知縣有惠政丁父憂歸著有
惜陰堂文集子本立字茂園乾隆選貢除潼關廳訓導遷知廣西
靈川縣再知湖北宜都讞江陵監利獄以平允著擇地建清江書
院士多稱之將卒以父有修理祖廟捐書院膏火夙志命子肯堂
竟其事肯堂既修祖祠復捐銀四百兩入綠野書院可謂善繼述
矣一湖字子善恂謹自飭家庭坐立地有定位急公事雖勞瘁不
辭。

贈雷州府知府子躍龍字來田子本仁官陸豐知縣訓之曰進一
飲食當思下民脂膏子民一杖當思父母慈祥卒

贈雷州府知府本仁字銘西號槐亭少篤於學農忙荷農器歸及
家不知觸門駭然家人皆笑乾隆壬申成進士除知廣東陸豐縣

卷之四

二十六

善折獄書院湫隘本仁捐俸倡修增膏火更立章程時李公侍堯
總督兩廣本仁特邀賞識調劇高要值平糶期高要額三萬石本
仁載錢赴墟民價糶糶且運三墟邑人喜其平請代糶大吏廉有
聽訟才疑獄輒委之某訟某糾眾伐山樹某爲証本仁曰訊証足
矣訊曰汝何生理曰小經紀幾時見伐樹曰凌晨幾時止曰將暮
本仁怒曰某伐某樹與汝無涉何故自棄其業自朝至夕甘受饑
餓某無詞乃服獄遂決察廉遷雷州知府以父憂歸服除補韶州
府時巡撫李公湖嚴督保甲獲英德竊盜九十餘名將置重法本
仁抗論再三乃從輕典遷高廉道以疾歸本仁居官二十餘年自
奉儉約勤於民事折獄尤著明察故所治皆稱其賢一正字在涓
庠生援例除知真定縣遭喪歸復除知館陶康熙六十一年饑勸
富戶貸穀數千石次年官責償不動倉儲貧民以濟察廉以知州

知蓬萊縣。攝知福建龍岩。尋知福清。逋賦積十餘年。設順里滾催法。兩月賦清。獲盜繫鈴盜項。令偵二盜自贖。展轉緝捕。盜風遂息。遷延平知府。調漳州知府。緣事擢刑部主事。復緣事除光祿寺署正。閉曹冷署。處之淡如。君寵本名一浚。字子予。康熙舉人。知廣西陸川。俗多訟。君寵按以法。奸民斂跡。罷歸。善丹青。潑墨遣興。自娛。

黨允福

黨允福字澤吾。南莊人。始祖麗。歷十五世。時代無稽。以士清士廉爲一世祖。士廉明初人。子良。端整。端見前志。整子資壽。資美。資壽八世孫允福。居鄉樂施濟。

國朝乾隆間。舉鄉飲耆賓。子喬齡。監生。亦鄉飲介賓。嘉慶十八年。喬齡年九十二歲。子黃瑞。武生。年六十五歲。孫金鎔。武生。年三十九歲。曾孫永祥。年二十一歲。元孫繩兒。年四歲。五世同堂。遵例申報。資美八世孫。銳字衛廷。附貢生。事親孝。從父兄銓。卒於江寧。跋涉數千里。扶櫬歸葬。銓母薛有姪國寧。貧無依。爲置家室。養之終身。性樂調濟。藥米隨時。老弗倦。以仲子行義官。

馳贈山丹教諭。季子振聲。字健菴。好學能文。乾隆選貢。除華州訓導。志遠大。日與諸生會。交師而友也。得猝疾卒。

崔襟海

崔襟海字滄洲。在城里人。原籍固始。可考者自一世祖受始。受六世孫榕。生襟海。順治庠生。幼失怙恃。長好學。有聲鄉校。弟子多成名。同邑副榜焦映龍。選貢焦映岱。舉人閔文翰。族子昭。皆其選也。襟從父兄弟杞。生襟漢。字雲傳。亦順治庠生。善說經。聞者解頤。母卒。兄弟遠客。將葬。大水及舍。伏柩號痛。幸不湮沒。及葬。徒跣泥淖中。遂病濕腫。著有四書輯義。子昭字孟宣。康熙舉人。博學能文。與

修陝西通志及武功後志除葭州學正。

孫國良

孫國良字必聖。城西街人。先世自固始遷武功。可稽者自繼元起。繼元生國良。康熙庠生。年十八有聲學校。事親食必甘旨。親卒祭必涕泣。產僅中人。遇貧乏。量力周給。性介。偶疾。同學馬鳴秋贈藥資一金。謝不受。子起相。生鎮。鎮子景烈。字孟揚。號西峯。幼奇穎。乾隆丙辰會試。取明通榜。除商州學正。己未成進士。改翰林院庶吉士。散館。授檢討。次年

廷試不及格。以原官休致歸。其將爲學正也時。

上命舉賢良方正之士。官令長陝西大吏首舉景烈。景烈以不得與會試辭。乃以六品頂帶爲學正。教諸生。闡發經義。究義利之辨。州人士競相勸學。自休致歸。貧益甚。若常惟母劉甘旨無缺。餘僅

卷之四

二十六

日一食。而一室雍雍。不聞交謫聲。景烈主講關中書院者三。臯蘭書院者一。與總督尹文端公繼善。巡撫陳文恭公安謀。講求教育人才之道。歲戊辰。

上命舉經明行修者。陳文恭公以景烈應。雖格部議。文恭自謂所舉無愧。景烈於學。以濂洛關閩爲宗。其論制義曰。業文而篤於行。明經而致於用。其言理學曰。理者性之所主。氣者性之所兼。天不命氣。而氣數亦謂之命。亦理不離氣之義。其爲文章。少時多奇氣。其後一以發揮理蘊爲主。所著有四書講義。關中書院課解。蘭山書院課解。酉麓山房稿。滋樹堂存稿。郃陽縣志。鄠縣新志。郃封聞見錄。菜根園慎言錄。館課焚餘錄。孫氏族譜。弟景昌字仲揚。爲叔祖起良嗣孫。乾隆副榜。狷介慎取。與終日默坐。侍嗣祖母王疾。令出休。俟寢門外。不歸。

志曰。孫氏郟陽鄆縣志。皆依據康氏志例。而篇目間有改易。郟封錄標目七篇。亦刪祠祀而增藝文。地理一篇獨詳。人物多康氏志及續志後志所已錄。增者數人。文未成篇。而徵引繁富。足資采擇。餘則搜輯未備。其自叙曰。予世籍郟封里。遂以里名名其所錄。不曰武功者。欲自別於武功縣志云爾。又曰。武功沿革。自康氏作志。得其實者半。失其實者亦半。意在補正康氏遺誤。而儲材備用。書卒未成。惜哉。

高元介

高元介字介菴。河道里人。祖起志。生光燿。光學。光燿生元介。康熙壬申辛丑間。歲饑。稱貸濟貧乏。不繼。勸有力者出粟。里人感其惠。以孫迥官。

馳贈福建順昌知縣。子益讓。爲光學嗣孫。舉鄉飲介賓。

卷之四

二十九

贈福建順昌知縣。子迥。字雲客。少聰慧。六七歲能事光學起居。長舉乾隆元年鄉薦。除神木教諭。遷知順昌縣。胥吏誣鄉民富戶。亦習詐民財。迥嚴懲以法。弊革。以廉能著。

劉永年

劉永年字延祝。其先固始人。元末遷關中咸寧。數世再徙武功興城里。父新基。

國朝人。娶於楊。生永年。父早卒。母矢節。祀節義祠。永年兒時不妄戲。事母孝。康熙辛未歲饑。永年負母就食終南太白間。轉側危磴。日行數里。母素所嗜。必陟峻歷深。得乃止。人稱孝子。長子燦。字闇公。雍正甲辰副榜。乾隆甲子舉人。乙丑會試。列明通榜。以副榜除直隸趙州州判。格舉人銓法。罷除。老於家。主有郟書院講席。邑令瑪星阿。兩舉鄉飲大賓。

李可楫

李可楫字宜川。北岡人。始祖御可。自固始遷武功。七世祖誨。嘉靖貢生。四川威寧教諭。子居敬。萬歷貢生。山西太谷訓導。曾孫演。國朝庠生。子維畿。亦庠生。生可楫。乾隆貢生。家貧力學。舅氏素封。歲時周給。不辭。亦不多受。爲諸生。授徒城北香山寺。偶入城遇婦。如瞻視無少妄。邑令楊毓芳。躋其行。給貧生糧。不受。更餽斗米。亦不受。楊愈敬重之。延課其子。屢聘不就。楊登堂致聘。乃從命。或譏其迂。楊曰。吾正取其迂也。孫氏景烈。稱可楫自題其堂曰能貧。聞者皆笑之。然此君素有志節。不求於人。實爲貧而能自守者。志曰。士窮乃見節。義顧或出以矯激。則隘。可楫進退以禮。辭受無過情。彬彬然文質君子哉。賢哉楊君。與單父武城爭烈矣。

張伸

卷之四

三十

張伸字乃直。在城里人。父素蘊。明初。由固始遷武功。可考者自七世尚禮始。孫桐。生素蘊。素行。素行無子。以伸嗣。

馳封山丹教諭。伸幼隨兄偉。受書。旣長。善書法。兼精騎射。由雍正選貢。隨

勅使甘肅宣講

聖諭。因除山丹教諭。山丹僻處西陲。士少廉隅。伸振其委靡。士風一變。素蘊子偉。生元哲。字濟公。監生。叔佩伸。皆無子。伸卒於官。元哲匍匐山丹。扶柩歸。生平喜施濟。錢米藥餌。隨時調給。老不衰。子渤。字海若。廩貢生。工詩。尤嗜音律。彈琴吹簫。無師程。自合律度。闢舍右隙地。置半畝園。琴韻書聲。弗輟也。著有半畝園詩草。

陳博

陳博字洽章。陳小寨人。康熙庠生。父敬之。以耕讀世其家。博學專

周易參伍錯綜有所得。輒筆之書。書未就。遭母喪。日夜號咷。遽火其書。不復著。每問門弟子曰。汝輩讀易。果於身心中見卦爻消息。否居常垂簾面壁坐。年將八十。夏不扇。冬不爐。行不杖。及卒。累日顏色如生。門人李厚傳其學。著周易長言錄。蓋淵源於博子。應騶字龍駒。弱冠能文。乾隆乙酉甲午副榜。

志曰。易自輔嗣尚元理。學者淪於老莊。漸與釋教相出入。易道微矣。博焚書見性。面死如生。居然佛氏涅槃。然學貴心得。視拘墟章句者何如也。

劉紹先

劉紹先。渠子里人。祖悌。生澤民。治民得民。澤民生紹先。乾隆戊辰歲饑。與得民子紹宗。施穀三百餘石。皆舉鄉飲耆。賓紹先孫雲爛。乾隆舉人。狄道州學正。得民孫養心。生士傑。乾隆扶風舉人。永昌

卷之四

三十一

教諭士傑。兄子晉吉。養心弟子雲龍。俱乾隆舉人。治民孫元灝。字瀚如。乾隆乙卯

欽賜舉人。麟遊教諭。工舉業。劉氏子弟皆所成就。

何敬

何敬。觀音堂人。乾隆四十九年。敬年八十九。子士純。年六十七。孫璞。年四十六。曾孫其。年二十八。元孫丁酉。年八歲。五世同堂。五十年。奉

旨。旌賞黃絹一疋。匾曰盛世休徵。

蘇氏

蘇氏。新尚邨人。分東蘇南蘇。東蘇相傳十三世。有生員十人。南蘇甸亦傳十三世。有生員六人。其五世皆

國初人。甸子朝宰。生冉仁。冉傳至曾孫仁。傳至元孫。五世同爨。鄉

黨稱孝友。譜皆冠唐以前。蘇建世次。僅載康氏志所錄。宋元無徵。又有新邨蘇氏。不能舉其高曾。亦據康氏志繪爲宗圖。有名志仁者。乾隆十一年。據圖充蘇瓌後裔。守瓌墓。四十八年。儒學舉志仁。孫庠生殿雲。爲蘇武後。未及行卒。

志曰。蘇武。杜陵人也。子通國。後裔無傳。武兄嘉十一世孫則。始爲武功蘇氏。子姓繁衍。不僅瓌一支。據唐書表。自漢暨唐。蓋三十二世云。志仁狀稱遠祖瓌。殿雲狀稱二十一世祖武。武長子純。覽者高閣唐書矣。蘇氏顯於漢。盛於隋唐。計其功名甲第。豈處韋杜下。迄今求其後裔。展轉疑似間。茫然莫得其統緒。嗚呼。觀於蘇氏盛衰之際。不重可慨哉。

人物志上之二

黃鸞

卷之四

三

黃鸞。邑布衣。少弗羈。尙力使酒。嘗與康恕者。撻於市。旬弗解。時人爲之語曰。康恕黃瞎。高麗銅孟。并州鉄刷。鸞一目微眇。故云。雖兄若弟。咸遠之。數年。悟而悔。且改屏跡東山麓。數從有道者遊處。惡少妬其倏異已也。羣聚詈之。鸞笑弗答。或攘臂逐之。鸞閉門謝。鄉黨咸曰。古有周處。今有黃鸞。因所居。共號爲東麓。邵封録引牛恒白閣集如此。鸞殆與恒同時與。

牛恒曰。蟬脫冀澗。有汲風飲露之操。鳩馴鳥也。化爲鷹。恣搏擊焉。夫人固在所變何如爾。

張山人

張山人。失其名。南師仲元麓堂文集。有送張山人歸武功序云。張山人者。武功人。慕長生。自垂髫遊四方名邑大都。雅善舍公術。詣太素脉訣。年八十。容貌蒼臙。筋骨矯健。日行百里不倦。序作於萬

歷丁巳十月。

李服義

李服義字良貴。萬歷貢生。登封訓導。永年教諭。遷知閩鄉縣。政尚寬大。閩鄉衝劇。值外番貢使需索滋害。服義爭之力。罷歸。

韓識張善誘張守元陳謨

韓識字荊州。大莊鎮人。庠生。萬歷貢生。霞孫也。崇禎甲戌。流寇攻其堡。識登陴發炮。賊死傷衆。攻愈急。堡陷。識持挺當門。擊殺數賊。被執。賊壯其勇。不忍殺。識大罵不已。遂磔死。張善誘字誨我。崇禎貢生。流寇犯武功。善誘守禦多方。畧張守元。楊陵鎮人。與同鎮陳謨同愾。結生死交。流寇攻堡。幾破。守元及謨奮戈陷陣。斬其渠賊。愈仇之。攻殺急。前後數十戰。賊乃解去。堡賴以全。二人卒。鄉人合圖二人形。春秋祭賽。圖剥落。猶存其面。面圓鬚禿。目光炯炯。有生

卷之四

三

氣而張陳不辨。贊曰。子帶我劍。我佩爾箠。金蘭干城。鋒鏑骨肉。既一其心。何分其身。嗟哉耳餘。爾張爾陳。

志曰。韓識諸生耳。而拒門殺賊。甘心磔死。以光學校。可謂志士矣。善誘克全所守。張陳奮戈陷陣。不死幸耳。嗚呼。苟無死志。安能善其守哉。

孝友

張節

張節父居仁。母亡。居仁娶繼室馬。康熙丁未。居仁卒。節事繼母孝。棲身窰穴。日隨馬力耕餬口。己未。馬年三十七。突來惡少。強爲馬媒。馬怒斥之。越數日夜半。惡少糾黨至。馬拒門罵衆。衆攻門急。節持刀力敵。衆怒焚窰。閤家被害。馬女節弟亦同死。死後檢屍。馬髮鬢焦灼。面目如生。節手抱弟妹。僵屈馬側。猶作衛母狀。

志曰節穴處力耕事母。已無愧爲孝子。變起倉猝。奮不顧身。豈復知有繼母哉。旣死。抱弟妹以衛母屍。其志更可悲也。馬抗節捐軀。真不愧其子者。

宇文墜。西街人。少喪母。哀毀如成人。長事父及繼母以孝稱。父老病。奉湯藥十餘年。不歸寢。父歿。過哀成疾。遂不起。雍正八年。奉旨旌表。閔洪章。庠生。有學行。年五十。父怒。捧杖請責。怒解乃止。事繼母亦以孝稱。張復才。顯義里永臺人。天性孝友。父病。祈廟身代。年五十。先母卒。令弟大立。斂以素衣白冠。將屬纊。抱母項絕。初歲。饑。或減價售產。復才曰。吾力不能周。饑復乘人急。以自益。吾不忍也。如時價償。董榮。豐盈寨人。生五歲。父君文卒。母李年二十四。撫榮苦節。榮事母。飲食必親調。衾枕必手置。乾隆五十七年。母年七十七卒。榮亦年五十七。哭泣如孺子。旣卒。冒霜露守墓百日。戚友

卷之四

三四

爲結廬墓側。榮增墓封。高一丈三尺。周六丈五尺。戚友勸歸。終身焚香墓前。日三次。母墓在邨北一里。李振楷。白楊寨前衛人。庠生。爲叔演嗣子。孝謹。得演及母宋歡。演妾張怨。宋並及振楷。宋歿。演欲嫁張。振楷泣求乃止。張感之。先演卒。演哭之慟。以已衣棺葬。張統岡。上邨人。田不滿三十畝。養母段脩。甘旨姑適。周邨吳氏。吳死。遺子英九齡。無恒產。吳族議嫁姑。母曰。姑失節。吾不忍也。統遵母命。迎姑養終身。撫英生子成立。乃割畝分居。馬亨。新尚村人。父斌。庠生。乾隆三年。斌病足廢。處庭戶。則出人負。出遊則設輪椅推挽。任所適。興盡乃返。歷二十三年。父忘廢疾。王材。字特生。布王堡人。父早卒。事母孝。家庭瑣務。必請命乃行。與人交。謹辱親。無失言。母卒。旣葬。結廬墓側。伯父病歿。奔哭。哭罷。奔墓。三年後。猶朝夕省墓。歷三十年如生前。康達。字九衢。在城里人。父起忠。有弟起德。無子。

以達嗣達幼育於嗣父母。卽知孝養。旣長。父病劇。達延醫。蓋屋。夜墮雪窟。僵。曉有出之者。旣甦。問姓名。所延醫也。喜導醫。衛行。遇澗。溪輒赤足。破冰。引衛渡。醫感其孝。愈。父疾。醫戒父酒肉。父卒。終身不御酒肉。母患疽。吮之。不愈。卒。見疽者輒泣下。乾隆乙酉卒。年六十五歲。

志曰。達可謂純孝矣。觀其卧雪履冰。見疽涕泣。愍然如孺子。豈復有所容心哉。

徐四達劉漢周馬順世

徐四達字近修。在城里人。嘗之薛固鎮。拾遺金。還其人。盜竊衣物。置不言。舉鄉飲大賓。劉漢周字絳侯。家素封。樂濟人。緩急歲饑。出粟五百石。無德色。邑令上其事。

欽賜九品頂戴馬順世。韓店人。乾隆元年。拾遺金三十兩。扶風生

卷之四

員魏振東金也。召魏還其金。

李白春李大春

李白春字石年。本榆林人。兄大春。籍武功。亦移家焉。白春世武職。父甲。明臨洮鎮總兵官。征流寇。立奇功。白春亦官。參將。棄職浪遊。豪放負氣。不面諛人。當時豪俠莫能屈。大春字聖年。順治舉人。工詩。著有采鞠堂詩集。豐川王心敬序曰。大春丰神俊朗。應試宏博。有名士風。其詩詞與河濱朝邑李楫郿縣李相郿縣並以風流嫺雅。角逐藝苑。當時有諸李之稱。又有三李之目。大春附見後志。藝文。未詳行。事。觀王豐川序言及采鞠堂詩集。豈處白春下。邵封錄又有李叔夜能詩。與李天生富平人李雪木。相伯仲。其人無考。亦大春流亞與。

閔文翰何瑞

閔文翰字陸嗣。葦邨人。康熙舉人。家貧好學。讀書綠野書院。時與同志講學。詩學少陵。著有見山子詩集。孫氏景烈嘗謂爲諸生時。武功文名最著者九人。庠生康復齋呂賜舉人徐說敏。遜崔孟宣。暇張子甲士元閔陸嗣文翰趙燕乘驥恒。貢生牛原其逢慶。牛廷錫之瓌。吾師耿澤干先生星。字天章。九人中。惟崔昭官學正。餘或以舉人終。或以貢生生員老。皆不遇。生員何瑞字雲卿。漆邨人。早慧。爲詩歌古文辭。百韻千言。頃刻以成。顧短軀羸貌。屢試不第。乾隆乙酉卒。張氏洲哀辭曰。嘅生才之不偶兮。羌吾不解於天意。胡孕秀而降美兮。胡淹抑而藏閔。造物無心兮。故不可知也。才者不祿兮。則固如斯也。三十日壯兮。方進步以不。何遽天闕兮。忽焉滅此騏足。昔文考與子安兮。乃名永而齡促。生詎有同符兮。弗獲長視而遠矚。憶縱筆於千言兮。浩浩洋洋。長歌短吟兮。金石宮商。瞻瓊瑰火齊兮。玉珠璀璨以光芒。顧茲儕輩兮。疇可與爲頡頏。孰搜輯以掇拾兮。懼篇帙之佚亡。望渺渺而愁予兮。徒躑躅以彷徨。嗟生豐才。嗇厥值兮。困屈淹蹇。中道逝兮。護庭哭泣。孤幃涕淚兮。吾生友者。聞且喟兮。

卷之四

三六

魏惟慎李厚

魏惟慎嗜性命之學。潛心孤詣。不以窮困廢著。有性理注解。廣太極圖說。會大饑。客死隴西。書亦散失。李厚字凝莊。川口南莊人。庠生。學易于陳博。得其精粹。著周易畏言錄。自序曰。易有畫數。而有物象。有物象而理亦流貫於其間。三者雖均爲易道之所該。而象

尤重蓋由數以生象象立而一定之數亦在焉是象固可以該數而理又无不該于象中也其著書宗旨如此書成於乾隆四十年五月凡六冊不分卷帙。

志曰惟慎與厚皆不求聞達之士去今數十年鄉人鮮知其名惟慎客死他鄉著書散逸其遇更厄於厚然而惟慎不沒也。

徐立功

徐立功徐家灣人去李厚居十餘里每食減撮米儲篋積撮成合終歲累斗斛煮粥施捨歷十有二年秋禾熟立功宵防失禾子孫競偵竊者獲諸鄰斥鳴約正鄰笑曰爾翁贈耳曷往質子孫赧然退。

志曰減食爲施雖小惠有釋氏布施遺意焉莫夜贈禾匿及子孫足以知其隱德矣。

卷之四

七

王世平段玉田

王世平布王堡人乾隆

恩貢生制行高潔與孫氏景烈爲文友偶醲醒而自秩曰世平能改否除西鄉縣教諭以廉介稱段玉田字藍山蕪坊邨人乾隆舉人富平教諭災疾滌膺厠驗氣汚其鼻兩兄同朝夕衣無專屬嘗受業孫氏景烈教士富平一如孫氏教商州士春秋廟祭舊習尅減犧牲折價數倍除其弊官六月卒先是邑令黃景畧嘗延主有部書院講席多士樂其教及卒迎柩乾州哭失聲。

劉彪田生玉周大用

劉彪楊陵鎮人父爾公彪由行伍從大將軍岳公鍾琪征西藏積功擢都司移家四川乾隆四十年間累遷至建寧鎮總兵官姊適張佩見節婦傳言彪移家時袒示瘡痍身無完膚田生玉可層舖

後衛人。由西鳳營武功汎行伍。調征川楚賊。嘉慶元年。從戰襄陽瓦子岡。二年。從戰夔州青莊坪。以勇敢拔補郿縣經制外委。三年。從戰開縣西河壩。陣亡。子招喜。

恩蔭雲騎尉周大用。前衛人。亦由武功汎行伍。勦賊嘉慶三年。從戰盩厔焦家巷。咸寧大峪口。褒城連水塢。鋼廠。俱捷。四年。拔補郿州外委。五年。從戰西鄉王子山。陣亡。兵丁李發。崔棟。王有。功。程泰。高成。朱廷桂。郭喜。徐鏡。張喜。李盛。鄉勇張順。俱以陣亡。從生玉大用。祀乾州昭忠祠。

舊志闕訪人物

張秀。字國華。明監生。好善樂施。與人無競。諸昆弟待以舉火。邑稱有德君子焉。趙明俊。字賓廷。明庠生。父母早逝。善撫諸幼弟。以立後析爨。以季弟無子。復與同居。教其子善事叔。如事父。仲子昌周。

卷之四

三六

舉於鄉。劉志德。號仰吾。克敦孝友。尚義急公。舉壽官。鄉飲子珂。

國朝順治舉人。官上虞知縣。張德惠。字子民。山西平陽教授。惟恭子也。康熙貢生。授興安州訓導。張廷相。早歲失怙。家貧。不能延師。每逢人質疑。考證以資所學。學成。遊鄉校。食廩餼。貢入太學。終身絕跡公府。薛文龍。於昆季特友愛。有弟流落蜀中。龍思念日篤。遣其子徒步入蜀。徧求以歸。爲娶室。立家焉。張天宿。字野父。庠生。少。有文名。方正自持。邑令隘其門。舉鄉飲賓。李環。性孝友。樂施予。邑侯給匾獎之。

志曰。舊志載張秀八人。事跡寥寥。亦從闕訪例。附於篇末。續志有霍達。由進士官。

國朝工部尚書。按達。舊籍武功。後徙長安。見通志。今不錄。

舊志補遺

續志補錄二十六人

任安寶會宗寶武寶統蘇紹寶真蘇衡寶毅蘇澄蘇拯蘇安世蘇致堯蘇泳杜

佳張嶽張君美康錫康錦楊舟

後志補錄二人
蘇洪劉林甫趙
薛得中
曾梁璞馬京
按寶武寶統寶

錄二人

馬師祿

邵封錄補錄五人

蘇洪劉林甫趙

薛得中
曾梁璞馬京
按寶武寶統寶

真寶毅皆非武功人寶會宗子孫徙武功會宗無徙武功事見唐書表任安所居武功在渭南漢武功縣西無豪小邑非今武功地見水經注俱不錄

晉

蘇紹字世嗣愉子為吳王師石崇妻紹兄女也有詩在金谷集中弟慎左衛將軍

北周

蘇衡當元魏之末周文帝宇文泰時為魏丞相欲於行臺置學選德行明敏者充之又於諸生中簡淳懿者為侍讀遂以衡及汾陰

卷之四

薛慎等十二人入選

隋

蘇徹蘇肅皆威從父弟並以鄉正為盧愷徵用文狀後至而先任肅右足蹇授朝請郎國子博士何妥與威不協奏其事文帝大怒曰愷敢以天官為私恩朋黨甚明愷免冠頓首曰皇太子將以通事舍人蘇夔為舍人夔威子臣以夔未嘗遷固啟而止若與夔有私豈當若此文帝曰威之子朝廷共知汝乃固執以徼身倖所不知者便行朋附遂黜

蘇儼威之孫為尚輦直長煬帝詔威安撫關中以儼為副威子夔先為關中簡黜大使一家三人奉使關右三輔榮之

蘇洪隋太常寺卿乾隆二十年間邑人築堡西原掘地出墓碑書云大隋國陝西雍州太常寺卿蘇洪之銘北周改武功郡為雍州

故武功人謂武功爲雍州。

史永遵與從父昆弟同居。大業五年三月。有司上言。煬帝嘉之。賜物一百段。米二百石。表其門。

唐

靳孝謨。隋大業末。任朝邑法曹。唐高祖起太原。帥師渡河。孝謨以蒲津中渾二城迎降。高祖受禪。進金紫光祿大夫。武德二年正月。遣孝謨安集邊郡。爲梁師都所獲。孝謨罵之極口。師都殺之。二月。詔追賜爵武昌縣公。謚曰忠。孝謨墓在大莊鎮東北。有乾隆四十八年神道碑。

劉林甫。吏部侍郎。隋世選人。十一月集。至春而罷。人患其期促。貞觀元年十一月。林甫表。四時聽選。隨缺注擬。人以為便。唐初。士大夫以亂離之後。不樂仕進。官員不充。州府多以赤牒補官。至是皆

卷之四

四

勒赴省。選集者七千餘人。林甫隨才銓叙。各得其所。通鑑以爲武功人。唐書林甫子祥。道觀城人。傳載林甫事。詳不云籍武功也。

劉樹義。文靜子。貞觀二年。追復文靜官爵。襲封魯國公。怨父不得其死。竟以謀報被殺。

馬師祿。善相。長安主簿。蕭瑒與縣尉李嶠。李全昌同詣求決。馬生云。三人俱貴達。大李少府。位極人臣。小李少府。得五品以上要官。位終卿監。蕭主簿。晚達亦大富貴。從今後十年。家有大難。兄弟並流。唯公與一弟。獲全。又十年。遇大李少府在朝。當得引用。後瑒離長安任。作秘書郎。則天既貴。皇后王氏破滅。蕭瑒是其外姻。舉家流竄嶺南。唯瑒與弟瑗。配遼東。獲全。其時李嶠作相。於街中忽逢瑒。使人問是蕭秘書耶。因謂之曰。公豈忘武功馬生之言乎。於是擢用時。小李少府。作刑部員外。蕭公竟歷中外清要。

蘇踐言，良嗣子。官太常丞，爲酷吏陷，死嶺南，削其父爵。中宗神龍元年，復贈良嗣司空，以踐言子務元襲封，終邠王府長史。

蘇獻，穎之從祖兄，爲太常博士。伊闕人孫平子，以中宗遷別廟，欲遷於太廟，下羣臣議，獻及博士陳貞節等以爲七代之廟，不數兄弟殷時，或兄弟四人相繼爲君，若數以代，則無祖禰之祭矣。今睿宗之室，當亞高宗，中宗時立別廟，非躋睿宗於中宗之上也。從之。蘇靈芝，開元中易州錄事，善書，與胡霈然齊名。安世鳳墨林快事，謂靈芝書，拚有李顏二家，而視北海則加莊，視太師又多雋。按靈芝所書碑刻，易州鐵像頌，開元二十七年建，在易州刺史田琬德政碑。開元二十八八年建，在清苑。夢真容勅二碑，開元二十九年建，一在易州，一在盤匡。范陽憫忠寺寶塔頌，在大興。鐵像碑，署銜登仕郎前行易州錄事田公碑，則稱逸士。夢真容勅，但書武功。蘇靈芝而不署銜，惟寶塔頌乃爲史思明所書。唐書思明以至於德二載十二月表降，以爲范陽節度使。靈芝書頌，乃在十一月，蓋思明既欲歸命，先以此稱祝貢媚，而靈芝結銜爲承奉郎守經略軍曹參軍，或已入思明幕下歟。

卷之四

聖

蘇澄，夔季子，沁州刺史。元宗女壽安公主，小字蟲娘，曹姬所生，嘗令衣道服，主香火。後元宗爲太上皇，代宗起居，帝曰：汝在東宮，有令名，指蟲娘曰：汝後當與一名號，代宗遂令蘇澄尚之，封壽安。

宋

蘇安世，字夢德，仁宗慶歷五年爲三司戶部判官。太常博士時有誣歐陽修者，安世白其誣，有令刺陝西民爲軍亡者，死有司得亡者皆死之。安世言於上曰：亡者不赦，恐相聚爲盜，惟朝廷哀憐愚民，使得更生。仁宗從之。三十州亡者得不死，安世之力也。官至廣西轉運使員外郎。

蘇致堯，字唐卿，慶歷甲申。與范陽祖無擇、清源王袞遊東海，磨崖篆石爲三字詩，字大徑尺，蹟類嶧山刻石，宦蹟無可考。

蘇泳字潛聖爲直都員外郎英宗治平中與穎川韓絳等十人過仙遊潭挹玉女泉有記。

金

杜佺字真卿宋末有詩名嘗以五言詩百韻上乾州守馬涓涓大奇之阜昌中登科歷官有聲馬嵬楊貴妃墓過客留詩最多章宗有詔錄詩五百付詞臣第之佺詩在高第有錦溪集失傳惟馬嵬詩載堅瓠集詩曰楊柳依依水拍堤春城茅屋燕爭泥海棠正好東風惡狼籍殘紅襯馬蹄子師楊亦能詩尤工書翰。

元

張徽中統二年爲陝西行中書省左右司郎中善書有金京兆劉處士墓碣在西安碑林朱彝尊題跋云詞特崛奇徽正書涉篆隸體亦不猶人復工詩有題甘河遇仙宮送李和甫還筠溪詩。

卷之四

聖

張君美嘗與乾州楊魚商畧條畫徵收課稅踰月而政成又嘗與員擇遊乾陵有刻記。

趙曾梁璞見元至正十六年重修文廟碑記記稱前進士趙曾篆額前全州學正梁璞書未載縣名蓋皆武功人。

明

薛得中官邵陽知縣邵封錄得中字南峯明洪武末知四川安岳縣見武功景氏家譜。

馬京字子高由洪武十八年志作十三年誤二甲一名進士授翰林院編

修歷左通政大理寺卿建文中左遷四川按察司僉事永樂元年

召爲行部左侍郎志作右侍郎誤皇太子守北京命兼輔導盡誠翊贊太

子甚重之數爲漢王高煦所譴戍廣西既至仍坐前事逮下獄與

工部左侍郎陳壽吏部侍郎兼贊善許思溫皆死獄中洪熙元年


二月贈榮祿大夫少傅謚文簡志作贈禮部尚書誤四月遣官徐有業論祭贈謚制詞云維新之澤已被于生存康氏志云取之囹圄之中而卒于効用之始豈有所諱而云然耶抑錄用之旨方下而京已瘐死無及耶文載部封錄

志曰裴松之注三國志論者稱爲陳壽功臣而不知史部義例詞尚體要裴之所補皆陳之所棄也然本裴注以求陳所取裁而陳之才識相得益彰裴亦不愧功臣之譽康氏纂緝人物意存采擇蓋正史事詳本傳不借志乘表揚野史稗官又多傳聞失信故康氏節取足適已意而已餘則槩從刊落觀其取舍詳畧頗具史裁此康氏之所長也後人視爲類書補其所棄豈不貽笑作者續志補蘇氏詳矣今考唐書表振綽子孫康氏所遺尚有二十六人續志何以缺載推其意以爲不足錄耳嗚呼康氏之意不更較然彰

卷之四

聖

著哉例以裴注備錄諸家所補亦可以觀康氏之斷制焉至於康氏誤引正史則有必待校正者蘇建蘇武俱杜陵人李育漆人蘇竟蘇純蘇章蘇謙蘇不韋俱平陵人皆非縣志所宜收蘇純爲嘉六世孫見新唐書康氏作建六世孫良嗣爲蘇弁曾叔祖見舊唐書康氏作瓌從孫皆誤北史綽亮同傳亮父祐祖稚綽父協而不及祖名周書稚作權綽傳亦無祖名綽亮異祖可知康氏以協爲稚子亦未審其所據



武功縣志

卷五

人物志下

地
170.79
35
部二

續武功縣志卷之五

人物志下之一列女

原夫刑于之化起自庭幃。家教之成積為風俗。故詩三百篇首列國風而翰軒所采。往往多閨門篇什。蓋即內可以知外。由近足以觀遠也。後世史部標題淵源詩教列女特立專篇。擇其高秀以存一代風化之遺。其義不綦重哉。至於方志撰記。祇以備外史之拾遺。存一方之觀感。事取徵實。例寬進退。亦劉歆與其過而廢也。毋寧過而存之之義。武功列女四百餘人。依次編列。無異花名卯冊。茲所叙錄。體遵舊則。義取采風。譜系可考。則從永清志一門合叙之法。與前傳相表裏。而一家之風教可知。世次無稽。則仿華陽志異郡分載之例。別里居為部。次而一鄉之習尚可徵。比類參觀。一邑之風俗備焉。若族姓里居無屬。而有母家者。並從附錄。亦載馳

卷之五

系。鄘河廣附衛之遺旨也。後之君子欲覽一邑之家教鄉風。其或

有取於斯。續志著錄十五人。

明張曉妻楊康栗妻楊馬萬衢妻景

陳懋謙妻牛耿認妻弓沈來聘妻李郭榆妻王劉弼主妻後志著

錄三十八人。

王孝婦李儵妻郭黃某妻康烈婦康呂賦妻焦馬鐸妻

芳妻黨馬國榮妻黨李向林妻楊魏起鳳妻南南正已妻呂李顯

後妻郭黨可法妻張劉新基妻楊尚助妻李馬桂姿妻黨節婦康

師妻耿馬喻妻魏黨從直妻李黨仿妻薛李瀨妻劉張承變妻馬

康呂勳妻黨李維世妻康楊圻妻宇文楊用極妻張王錦妻馬徐

遵妻喬楊茂棟妻羊魏良策妻康徐進妻尚王世桂妻崔何運泰

妻錢氏志著錄八十五人賢媛張位妻王節婦王應運妻張楊景

金庫妻馮魏大緒妻孫蒲桐妻何張義妻景舒庭妻吳張志耀妻趙

寧妻張張洞妻焦田希箒妻趙張金門妻馬曹恒祿妻馬黨廷環

妻胡朱安斌妻焦黨熙齡妻耿黨黃珍妻黃徐宏綬妻申徐養裕

妻李張國傑妻蘇戴彩妻崔張名樂妻田張積貴妻楊戴盛德妻

黃王建真妻趙魏天壽妻喬朱心興妻劉張景梅妻李高君全妻

趙宇文釵妻崔劉暉妻張王庭楷妻張符鳳岐妻申丁允寧妻張

楊文秀妻朱王需妻劉弓冲漢妻別王寧妻白張玉璽妻王何運

妻白李之玉妻王顏華妻張尚居禮妻卓張澤妻成張彥妻程黨
廷梁妻張杜賓賢妻李朱信已妻馬王璟妻趙杜琳妻袁王有年
妻夏曹宗武妻劉白受福妻鄧康殿妻蘇李注妻閔張素抱妻何
張素蘊妻耿張佩妻劉別克敬妻王康作喜妻常賀登台妻徐楊
繼博妻崔李彩妻張楊延壽妻段丁鴻讓妻郭黃虞再妻張李茂
發妻張張秀妻夏穆鳳朝妻李程壽妻常康福妻譚高忠妻劉王
生蒼妻吳金舉妻趙康士新志著錄二百九十六人共四百三十
元妻金烈婦劉貧初妻郭
三人列體分編仍各以年代爲次其會膺
旌表者舊志縣卷爲據餘皆缺焉

長寧舖康氏列女

楊氏海長子栗繼室也河南靈寶人雲南布政使楊維康女明嘉
靖己丑栗卒楊矢志殉潛吞鼠藥以救得甦姑尚日夜防衛選幹
婦伴歸母家冀解於父母父母亦嚴防衛涕泣求歸使兄宋及嫂
康氏送之見姑有喜色守且懈一日盥漱畢顧嫂曰宿食作渴趣
調醋湯湯至潛下砒焉毒作姑檢袖得遺砒索醫急楊泣曰兒樂

卷之五

死而苦生砒得醋醫無益也兄嫂逼進藥齧碗碎遂不救嫂浩女
也栗從姊妹宋卒亦仰藥死靈寶建雙烈祠載通志耿氏海九世
孫孝妻耿禮義女歸孝夏家溝

國朝乾隆戊寅夫歿嗣子亦亡苦節五十六年馬氏焮孫倣叔妻
順治甲午倣叔卒撫二子有室先馬卒又撫三孫雍正辛亥卒年
百有四歲丁氏倣叔從父兄弟學叔妻順治己亥年二十寡志作
九年寡據撫遺孤呂師娶婦耿氏又撫夫兄子呂夢娶婦閔氏康
熙壬子閔年十六于歸未逾歲呂夢卒遺腹子權庚午丁卒志呂
師卒
在丁前據越十年呂師卒耿年二十四無子撫族子爲嗣與閔共
守雍正丙午閔卒己酉與耿同

旌表載通志焦氏呂賦繼室蓋屋學生焦化秦女康熙庚午年二
十呂賦病焦不解髻焚禱無效泣與約曰歸君未育子無可守一

死從君耳。呂賦卒四日，衰麻自經死，面如生。黨氏歛弟，灼曾孫呂勳妻，呂勳卒，歲荒不給饘粥，力作奉繼姑。撫二子全活。黃氏國曾孫，草妻于歸，數年草卒，操井臼，勤紡績，撫子煥中，守志。馬氏國曾孫，葑妻，少寡，撫子輝中，焯中，守志。張氏廷瑞子，世任十三世孫，文俊繼室，夫亡，遺孤銀在襁褓，前室子金亦幼，張度夫弟不相容，攜孤別居，劬勞自給。馬氏天申妻，天申病篤，泣曰：子未及歲，吾抱恨九泉矣。馬以撫孤誓，或勸改適，馬曰：受托而棄之不信。夫死而背之不義，幸無復言。灼長女適庠生黨某，早寡，育子克存，夫嗣年八十餘。次女適庠生魏良策，志作范夫亡，遺前室二子，弱且劣，或勸嫁，女曰：夫子即吾子，棄之是吾死二子也。卒撫二子，有室，後相繼死。女晝日井，夜紡績，鞠孤孫，孫死，復撫曾孫，卒年八十餘。純引叔長女，母方娠，夢白衣婦持贈白璧，曰：此純無瑕者。既生，名曰純，適庠

卷之五

三

生郭清，清死，子女幼，姑從少子居，純無依，仍歸母家，每飯輒念姑食，母亟饋姑，純謝曰：兒累父母，乃更以姑累耶。於是勤女工，易鹽米，時遺姑，母爲製練衣，純曰：兒爲父母子，則可服，爲郭氏婦，則不可衣，辭不御，以荆布老。八姐，純妹，適黃姑，患疽，躬親滌濯，晝夜更藥，無倦，無子卒，舅銘其旌曰：孝德婦。四姐，呂勳叔，衍叔女，適於吉，早寡，撫嗣子守貞。二姐，錫七世孫之桂女，適魏秉純，夫亡，舅憐其無子，勸再醮，對曰：婦所以不死者，正以無子耳。得昆弟子爲夫嗣，夫死，猶未死也。舅立嗣子，成其志。

志曰：洋在兄弟間，無顯名，而子孫獨盛，婦德亦多出其門。洋殆有隱德與，焦殉節如生，繼美粟妻矣。

宣化街馬氏列女

景氏驥子萬衢，志作萬里誤妻南樂縣丞景德章女，明成化間，萬衢官

清豐主簿卒。女在襁褓。景泣。枯一目。素服菜食三十年。嘉靖甲午。旌表魏氏驥。七世孫瑜妻。魏廷對女。康熙癸卯。年十六歸瑜。生子際康。值吳三桂叛。瑜轉輸軍餉亡。際康娶婦郭。郭早死。際康亦久客。復撫兩孫存夫祀。載通志。劉氏穎姿妻。劉環之女。穎姿殉難。劉年二十四。育嗣子。偕四十餘年。

旌表載通志趙氏傑孫浚。四妻舉人趙景梅女。歸浚。四宣化街。年二十九夫亡。撫孤尙志。夜績課讀。尙志思臥。齧其首。血浹齒頰。廢績泣。尙志懼。力學爲生員。嘉慶丙子。

旌表劉氏應福。從祖兄弟。應月六世孫。沼妻。劉順甲女。歸沼。許西莊。夫亡。食杏仁自毒。及救不死。撫嗣子起基。以老。侯氏鳴世子。生員璟。繼室。扶風侯士龍女。順治癸巳。璟病篤。侯誓先死。時侯父母客武功。勸之。志愈堅。登樓自經死。年二十四。載通志。張氏璟弟生

卷之五

四

員珮妻。生員張文耀女。明崇禎癸未。珮病亟。張誓死殉。時張有娠。六月。生子嘉裔。抱子投姑。曰。婦事畢矣。請從夫地下。不食死。年二十二。載通志。黨氏珮兄珂元孫。夢龍妻。黨黃珍女。歸夢龍。鳳安堡。乾隆癸未。夫亡。母孀居無子。奉母終天。撫子秉寬。及夫弟子秉惠。皆成人。今年六十七。趙氏夢龍從祖兄弟。樓妻。舉人趙景梅女。歸樓。永安里。乾隆壬申。樓卒。撫夫弟子秉乾。爲嗣。歲凶。攜子鬻餅。自給。嘉慶己未。

旌表黨氏班子。生員桂姿妻。生員黨之鳴女。康熙庚申。桂姿卒。黨年二十。子鉅六歲。諸書鉅生康熙乙卯。志謬皆作二歲誤。長充增廣生員。繼姑郭病。

侍湯藥。夜不交睫。黨氏鳴秋。伯父國榮妻。明天啓間。夫亡。舅老。經營家計。教子鳴河。及孫珪。爲生員。卒年九十五。王氏馭九世孫鐸。一名妻王錫女。年十八。生二女。鐸卒。舅姑與母勸更適。不從。歸啓

篋失裝資餘一衣一裙。知嫁已意決。卽夕自縊。死時年二十四。載通志。

志曰。璟珮皆鳴世子。其婦或先夫死。或棄子死。決絕如恐不及。何其烈也。殆聞舅風而興起。與鐸妻。殆姑命。毅然自決。又何其善也。馬氏多節烈。蓋其家風使然。

興城里張氏列女

馬氏文燦。孫錫璧妻。府谷教諭馬珩女。歸錫璧。義樂寺。康熙丁亥。馬年二十餘。夫亡。撫子緯。漢授室。生三孫。陳氏文燦弟。文煥。孫錫麟妻。陳愨女。康熙己巳。年二十。寡。越三年。歲飢。攜子瀛洲。依母以終。杜氏錫麟弟子。宏洲妻。杜叢生女。夫亡。子玉楷。十歲守貧。教子無失業。黨氏鎬妻。黨子章女。鎬卒。遺子澡。女三人。拮据畢。昏嫁。澡爲生員。明嘉靖甲寅卒。馬氏棨子。生員承勳妻。馬錦如女。康熙丁

卷之五

五

未夫亡。教子素坦。爲生員。己未。素坦亡。遺婦張氏。姑婦相依。撫孫錫桂。亦爲生員。馬氏樞子。承燮妻。馬翰如女。年十三。子歸。承燮病。癩未成禮。無怨色。每食。承燮狂怒。碎盤盃。曲事三年。無倦容。順治初年。承燮歿。撫夫兄。承輝子。爾怙。爲嗣。苦節五十七年。沈氏承輝兄。承燧。元孫進業妻。沈成德女。歸進業。韓店西溝堡。乾隆甲戌年。二十三。生子奮。奮兩月。夫亡。撫奮。奮及夫兄子。登。奮從兄子。斐然。皆成人。斐然初生。父慮不育。遺沈代哺。沈教養如奮。奮旣爲生員。還其父。年八十。時扶杖。斐然家。詢其衣食。今年八十二。康氏樞弟。生員棻妻。康燾女。年十八。夫亡。無子。屏居一室。焚香。瞑坐。歷五十年。嘗述其父訓曰。吾康無再嫁女。五人皆黨氏子孫妻。劉氏文熙。孫庠生。金榜妻。劉璜女。康熙癸丑。夫亡。年二十。撫嗣子。灝如。已出。馬氏金榜從父兄弟。庠生金門妻。馬鳴玉孫女。康熙辛未。寡。年二

十餘姑郭痺廢扶掖盡瘁歲飢自食豆渣縫紉市餅餌食嗣子演育及諸孫孫廷榴成進士。

馳贈太孺人乾隆壬辰

旌表焦氏金爐子澗

一名

妻焦濟女乾隆庚申年二十寡撫嗣子

廷枝事姑董養殮必潔命同食則曰已另具食矣焦歿姑除焦室得糠粃榆皮屑泣曰此吾婦所謂另具食也聞者悲之焦庚寅卒姑年七十五矣癸巳

旌表姜氏金爐弟金印子瀟妻姜輔姬女幼習孝經論語乾隆癸酉年二十歸瀟漆邨逾歲瀟亡事舅十九年姑二十八歲嗣子廷樞孫炳義爲生員徐氏維紳從父兄弟繼紳妻徐雍門女康熙甲子年二十歸繼紳焦陽邨旣寡親老子女幼紡織辛勤持家幾六十年子位歲貢生趙氏繼紳從祖兄弟澆子倏妻趙恒升女康熙

卷之五

六

己亥年十九歸倏上營越三年夫亡子星環二歲衣單衣夜卧麥藁苦歷五十二年程氏鍊六世孫聲錫妻程大受女歸聲錫渭源里乾隆丙辰年二十六夫亡育遺孤樂濼樂娶胡有信女乾隆庚午胡年二十變歿遺子機濼娶常潤庭女乾隆乙酉常年二十八濼歿無子時程年五十六胡與常同心撫機常尤知書明大義機長娶胡氏乾隆甲午年二十四機又歿遺子守清時程年六十五胡矢志不渝三世孀居一堂四節稱家庭盛事今機妻年六十三李氏鍊八世孫克讓妻李艷女歸克讓焦陽邨乾隆辛未年二十二寡教二子力作以終其節郭氏儒珍兄翺七世孫錫履妻郭紹儀女康熙庚申年二十二夫亡值歲荒攜子復漢歸母家復漢授室數年夫婦相繼亡郭零丁苦節雍正戊申卒載通志黨氏海子會十世孫重華妻黨仲賢女歸重華田寺邨夫亡夫兄名才無子

老且瞽守确田九畝養名才終身子女皆婚嫁杜氏亦會十世孫名傑妻杜方山女名傑歿遺子秉乾乾隆戊辰飢夫弟謀析居杜泣勸合爨五十餘年章氏海兄全十一世孫毓奇妻章喜女歸毓奇田寺邨乾隆乙亥年二十三寡教子永浴讀夜半紡不停讀不敢輟永浴亡撫孫本煊年未五十鬢髮皓然今年八十一楊氏全十二世孫安妻乾隆乙未寡夫兄巧先亡皆無子從子春起爲安後春起兄春發爲巧後皆鞠育成立郭氏海弟洪十一世孫雲起妻郭保女歸雲起田寺邨乾隆甲午年十九寡斷髮誓節善居積有田數十畝率子天榜耕耘承燧曾孫泳長女年十八適監生楊斌斌亡嗣夫弟安邦子育安邦女迄於嫁孀居三十年次女適王庭楷年二十四夫亡勸舅娶繼姑黃生叔三槐黃旋卒撫叔成立子夢陽爲生員玉姐泳子芳桂女適舒作楨夫亡撫前室子泰爲夫死撫夫弟子爲嗣歷四十二年

卷之五

七

生員嘉慶丙寅泰卒撫孫以老承輝女適遊擊焦金章夫亡守貧育孤數十年四女皆鎬妻黨氏子孫女壩弟壩女適庠生楊用極夫死撫夫弟子爲嗣歷四十二年志曰儒珍妻康鑿女也一家譜牒稱其幼習詩書克修婦職育子女十餘人皆躬親乳哺能言卽授以小學孝經其教深矣故能傳流後裔婦德母儀接踵十世不衰而先後濟美多至數十人又何其盛也鎬妻守貞後世婦女繼承亦多以節顯可謂善嗣徽音者洛陽邨郭氏列女

王氏榆妻榆亡事孀姑三十年姑卒王亦積勞卒子內俊明萬歷舉人知單縣贈太孺人

國朝入祀節義祠賀氏世良八世孫繼汾妻賀承業女歸繼汾鳳安邨乾隆己卯年二十一寡誓志撫孤今年七十四張氏郭銀漢

妻張金甌女銀漢父珍張自出與金甌爲內舅弟故以張字郭銀漢病目瞽珍自憾議却婚女不從卒適郭生四子一女與銀漢偕老乾隆己丑卒年五十四黨氏維垣妻黨年女歸維垣南關西堡乾隆癸巳年二十五寡姑病子幼俯仰備至以孝慈著今年六十六銀漢維垣世次家譜缺載。

北關楊氏列女

李氏續妻續卒於京師李紡續自給撫夫兄續子鑿爲嗣鑿爲生員撫孫汝智亦爲生員守節四十餘年萬歷乙酉旌表

國朝祀節義祠陳氏續元孫新昌妻新昌逝育子維震維德皆成人乾隆丙寅年八十六卒馬氏續九世孫向榮妻馬鎬女乾隆庚申年三十夫亡舅痛失明馬曲喻承歡楮柱家訃朱氏亦續九世孫文秀妻朱宜岐女歸文秀北關乾隆辛酉年二十一寡子大偉

卷之五

八

四歲大任遺腹鞠養皆成立。

鳳陽舖耿氏列女

弓氏光前次子認妻認卒子愈炳愈鄰教之讀愈炳爲生員王氏志煒繼室王大芳女封宜人志煒卒王屏居絕戚族會流寇陷京師明莊烈帝殉難泣日良人若在必殉先帝我受朝廷封誥亦王臣也敢偷生乎不食死王氏啓乾繼室邠州庠生王吉女康熙間啓乾卒育子俶及抱孫猶織紉不倦張氏獻吉孫庠生元凱妻庠生張懷坦女雍正乙巳年十六歸元凱城東街乙卯夫亡事姑陳撫嗣子汝華以孝慈稱李氏性良子庠生汝毅妻李宗白女歸汝毅城東街乾隆丁丑年二十夫卒居母家嗣子旭爲庠生郭氏性良兄性直孫丕顯妻郭爾常女乾隆戊子年十九歸丕顯城東街丙申夫亡與夫兄合爨事舅鞠遺孤甘隸竈下王氏汝恭從父兄

弟汝超繼室扶風王基女乾隆甲申年十七歸汝超城東街越歲夫亡哀毀踰禮前室子壽數齡舅姑慮有變王曰夫子不幸棄二大人養遺孤冲藐何敢一死自逸嘉慶丙辰疾瘳進藥餌却不飲日吾未亡人耳舅姑壽終汝亦抱子吾其見汝父於地下矣遂卒嘉慶四年

旌表獻極女年十六適張澹庵子榮坦六月夫亡苦節四十餘年以疾卒瑩然女適岐山李淑世踰年生子四日夫亡紡績事舅姑舅姑卒歸母家苦節十九年卒子亦夭載通志女適外縣不錄已載舊志故并附於後。

志曰志煒妻以命婦死國難其言正其事奇崑山顧母何以加此忠臣非烈婦也觀志煒立朝大節使隕星不早豈讓巾幗獨步王之死亦善繼志煒之志耳嗚呼志煒有妻矣。

卷之五

九

萊園堡楊氏列女

黨氏正芳妻鑄母明萬歷甲寅于歸崇禎辛未正芳卒時舅起鳳垂老子鑄鍾鈞皆幼家貧復罹兵燹黨崎嶇數十年鑄充生員康熙戊辰年九十卒賈氏正芳族伯叔其靜妻年三十夫亡賈耕樵不避風雨子正懷授室諸孫羅列猶經營家計不自逸年七十六賈時代無考據家傳次黨後當亦康熙間人崔氏正芳族兄弟續妻崔家溝人年二十餘續亡撫子作棟成立。

邵封里黨氏列女

張氏順治間人端八世孫可法妻年十七歸可法南關可法遠客志作可遺老母幼子張勤女工資衣食年九十可法終不歸載通志馮氏亦端八世孫懷妻馮公著女卒年八十四事無考均於乾隆年間詳請入祀節孝祠杜氏端十世孫致遠妻生三子致遠歿

執箕帚事舅姑疾撫二叔衣食守節四十餘年耿氏允福從子熙齡妻耿淑女歸熙齡南莊里雍正庚戌年十九寡絕粒五日舅姑曰婦死如二老人何耿斷指誓節乃復食教嗣子黃甲學爲生員乾隆己亥

旌表黃氏熙齡從子黃珍妻黃虞際女歸黃珍南莊里乾隆丙辰年二十一夫亡無子父母勸改適誓以死及夫葬投身墓穴折臂鄉里稱半臂人與耿氏同年

旌表張氏允福孫黃璧妻張輝漢女乾隆丁卯年十九夫亡嗣黃甲子金鑑爲嗣金鑑爲生員嘉慶辛酉

旌表蔣氏允福從父兄弟允盛元孫忻妻蔣兆奇女忻居南莊堡乾隆乙巳年十七將嫁而忻亡聞訃痛絕哀經奔喪修婦職今年四十五李氏從直妻鈞祖母李蘭菴女順治庚子年二十四從直

卷之五

十

歿子倥偬俱幼李食貧撫孤仿娶妻薛氏薛揚德女康熙癸酉年二十八仿歿姑病痿扶持罔懈子銓生員乾隆壬戌

旌表並載通志王氏鈞子振聲繼室郟縣生員王璘女嘉慶丁巳年十九二月于歸七月夫亡於西安柩歸仰藥死初王匣儲療瘍藥哭漚時潛取食之婢見而不知爲毒故失救是年

旌表胡氏資美八世孫廷鏗妻胡玉齡女歸廷鏗姚坊邨年二十一夫客死胡歸夫柩並葬舅姑撫孤三十二年乾隆乙未

旌表張氏資美十世孫廷梁妻夫歿家貧姑患癰謹醫藥恩育嗣子。歷三十餘年。

漳環邨趙氏列女

黨氏繩祖兄孫柱恒妻黨允升女康熙辛未年二十歸柱恒煒環邨歲荒出簪珥持家舅姑歿典嫁衣襄葬事饑甚傾篋授夫及夫

弟避他鄉。隻身就食母家。會訛傳柱恒死。允升與柱恒叔燦謀嫁。黨謀成。迫黨泣曰。請明朝從父命。乘夜自經死。年二十一。越數月。柱恒歸。黃氏夢璧族孫星胃妻黃鏞女。乾隆丁酉歸星胃。漳環邨。越五年寡。今年五十三。子成生孫矣。

在城里張氏列女

耿氏素蘊繼室。耿獻極女。康熙癸酉年二十夫亡。撫前室子如已子。卒年八十六。劉氏素蘊子佩繼室。

贈建寧鎮中軍遊擊劉爾公女雍正癸卯年二十七夫亡無子。撫嗣孫濟。乾隆癸未卒。初耿痛姑亡哭失明。劉虔禱自誓。菜食二十年。耿目復明。人以為誠孝之感。乾隆戊申俱。

旌表何氏素蘊弟庠生素抱繼室。何宗禮女。年二十五夫歿。育前室子維為生員。郭氏維孫清妻郭緯女。乾隆庚寅年二十。清歿於

卷之五

十一

江南浦口。撫子大樞為生員。今年六十三。王氏佩從祖兄弟位妻。

王明道女。康熙辛丑年十七。志作十九。據縣卷改正。嫁位越三年。志作七年。據縣卷改正。

正。夫亡舅繼卒。貧不及葬。姑病。王勤十指奉姑。冬夜饑。丸酸齏吞之。紡不輟。姑卒。寢柩側。夜半彷彿見舅姑與夫。慨然曰。此幽魂告我早葬也。齒左股以誓。卒成葬事。嘉慶七年旌表。

河道邨焦氏列女

李氏映岱子璉妻。乾州貢生李大鵬女。雍正癸卯年二十七璉亡。姑老。衣履皆李手製。教子士範成名。彭氏映岱曾孫銓妻。乾隆甲辰年二十一寡。舅老遺腹子登榮孤弱。恒產不終畝。賴彭十指資給無缺乏。今年五十。

山邨弓氏列女

別氏冲漢妻別鴻道女。雍正乙巳年二十一。冲漢亡。子賜彤在襁。祿目不曉。別泣曰。見長妾必勉使讀書。成君志。乃瞑。賜彤從孫檢。討景烈學。卒爲生員。冲漢兄子士達。族子士俊。皆失恃。別皆撫育。如賜彤。乾隆壬子卒。孫峻登。曾孫常新。皆舉於鄉。峻登娶于氏。在城里。于寅女。嘉慶壬戌。于年二十八。峻登卒。自經寢室殉。嘉慶八年。俱。

旌表張氏冲漢從父兄弟文炳妻張則友女。雍正甲辰年二十二。夫亡。子士廉三歲。食貧育子。撫及孫曾。乾隆辛丑卒。何氏鉞兄煩。六世孫運和妻何明志女。康熙辛酉年二十三。運和卒。拾薪供炊。育子緯。世成立。年八十一。何氏亦煩。六世孫普妻何仁女。乾隆庚申年二十五。夫亡。子幼。茹糠粃終其節。王氏煩十世孫武生。廷樹妻王世安女。乾隆乙未。年二十四。夫亡。撫前室子衣食。與已子同。

卷之五

十一

曹氏希程妻曹雲武女。乾隆丙辰年二十三。夫亡。子瑚四歲。守志四十年。希程世次家譜缺載。

聶邨崔氏列女

張氏襟海族孫爾寬妻張泰女。乾隆辛酉年二十五。夫亡。舅鳳習。痿廢侍疾五載。教三子皆成立。段氏爾寬兄子崧妻段忠女。乾隆乙亥年二十。崧亡。無子。嗣孫。今年七十六。崔氏受爲本支。又有西邨支東邨支。張氏穆族叔西邨支養昇妻。年十九。夫亡。行不踰閭。育二子。周憲終其節。張氏爾寬族兄弟東邨支仁妻。康熙丙辰年二十五。仁歿。撫子紹文。苦節四十年。吳氏亦爾寬族兄弟東邨支德妻。康熙甲申年三十三。德卒。子紹章。生未百日。撫字成人。

河道邨高氏列女

趙氏元介孫進妻趙煥女。乾隆丙子年二十一。寡。子登瀛。在襁。祿。

依夫伯母張勤劬資給兼育夫兄弟子如登瀛李氏進從子登岸妻乾隆辛巳年二十二寡無子嗣子居易姑失明李先意曲盡姑忘其警楊氏進從子登原妻楊植女乾隆丁丑年二十一夫亡無子女嗣子步青時姑在堂憐孫女數人失怙恃楊育諸女如已出顯義堡黃氏列女

張氏虞臯族弟虞再妻張明德女乾隆庚辰年二十二寡伯叔迫改適絕其食瀕死無異志終身不入伯叔家嗣伯子爲夫後更撫字伯子三人三人忘非母也左氏建極從孫金妻左逢年女康熙丁酉年二十九金卒育嗣子終其節馬氏虞臯孫居正妻馬超宗女乾隆丁亥年十九子歸踰年夫亡無子居正鮮兄弟勸舅納妾生履正舅及少姑卒撫育履正生子爲夫嗣嘉慶辛未旌表。

卷之五

十三

北關丁氏列女

張氏仕俊六世族孫允寧妻娘母張廷棟女夫卒遺幼女姑卒遺叔金聲二歲與女並育金聲長生子娘養爲已子黨氏允寧族子離妻黨植槐女乾隆壬午夫亡養老姑兼撫嗣子今年六十于氏亦允寧族子毓槐妻于錫女乾隆癸巳年二十一夫亡事姑鞠子復念父老無依往來兩家長昏罔替今年六十一張氏允寧族弟耿光妻張九槐女歸耿光胡家堡乾隆庚子年二十六夫亡事親養子以孝慈稱今年六十餘郭氏丁鴻讓妻年十七子歸越年夫亡貧能事舅育子爲諸生。

渠子里劉氏列女

鄭氏治民子紹祖妻鄭選女年二十八寡遺三子鄭紡績授書長子元灝官麟遊教諭乾隆乙巳卒年八十四楊氏紹祖子元澄繼

室乾隆甲戌年二十七寡嗣子雲麟今年七十五郭氏元澄族兄弟養初志作養正妻郭景章女乾隆癸酉年十七歸養初北關年十九夫亡時姒楊亦贅居無子郭撫嗣子繩娃與楊依夫叔鑿鑿子養志謀鬻二嫂償博負楊不堪其虐改嫁去郭終不屈養志乃謀劫嫁郭潛市砒霜吞之死時年二十六鑿舐犢不報景章慮檢骸爲羞獄遂寢養志旋暴死張氏洲傷其冤抑作長歌紀其事。

新尙邨蘇氏列女

張氏相九世孫元吉妻張永清女乾隆癸巳年十九夫亡撫遺腹子憲馬氏仁六世孫明德妻馬維女乾隆丁巳年十九夫亡家貧資母家養舅姑撫嗣子終身夏氏明德弟明揚妻夏明起女乾隆戊寅年二十六寡遺孤七歲旣長生子亦卒撫孫以老年八十一志曰婦道無成而待有終是以鹿車振德教述先姑女誠楊芳詞附於後亦以表一家之風教著雙美之德音也。

卷之五

古

稱家訓有由來矣康馬各族端操繼承與前傳相比附悉依支系次列以著閨範淵源其餘人數無幾亦爲區別族姓次其年歲以附於後亦以表一家之風教著雙美之德音也。

郭氏在城里王繼祖妻繼祖早死撫孤乾明娶婦張氏生子受元在襁褓乾明亦旋死郭與張并撫受元娶婦田氏不數年受元又死遺子良臣田年少或勸之嫁泣曰兩世堅守予何獨不然亦守節終身邑令標榜其門曰三世孤孀良臣順治貢生。

楊氏在城里李尙林妻楊邦本女順治乙酉年二十三寡遺子灝娶劉宏霄女康熙甲寅灝故劉年二十三撫遺腹子祖唐姑憐其少戒過勞劉夏不納涼冬不辭寒操作益力姑老眠食需人劉朝夕奉侍曲體隱微乾隆丙辰同

旌表載通志。

南氏張三官寨蘇應賓妻南景郁女順治丙申年十九寡子玠生週月鞠養劬勞卒年八十二曾孫庠生燎娶妻何氏何淮女乾隆庚寅年二十四燎卒撫嗣子大順以節終。

宋氏大莊鎮韓必聖妻宋兆祥女康熙癸丑年十八夫亡遺子國芳苦節五十年高氏必聖族孫秀妻高岱女乾隆丁亥年二十四寡子元樹二歲中年亦歿舅姑貧且老賴高措柱奉養無虧。

陳氏漆邨張欽妻陳大謀女康熙甲寅年二十五夫亡蜀地陳崎嶇數十年卒歸夫骨遺子汝成娶劉振文女雍正戊申劉年二十八寡育子玉奎安喜玉娶李志女乾隆乙未李年二十六寡無子嗣安子錦標殤復育嗣孫錦章子熙增爲生員乾隆庚申陳卒戊申劉卒李今年六十四。

董氏山邨桂君佐妻董天榮女康熙辛酉年二十四寡子惟良三

卷之五

五

歲家人謀改嫁董引刀刺面謀遂寢兒痘忌油氣家人隔壁烹油利兒死乃抱兒坐竟夜卒無恙雍正戊申卒朱氏君佐族孫皎妻朱元杰女乾隆丁丑年二十八寡子生三月姑歿遺叔七歲朱並育無異操今年六十五。

馬氏邵封里王錦妻馬鳴海女康熙癸亥年十九歸錦越三年夫亡斷髮毀容矢志靡他撫孤廷濟投室生子而廷濟又死婦孫氏撫子如姑歷節四十餘年乾隆丙辰馬年七十二旌表。

喬氏城西街徐四達子遵妻幼習書史康熙癸酉年十八適遵逾年遵亡子元傳七歲親授經書教之成人乾隆壬申卒得

旌表郭氏遵孫爾章妻郭繡女乾隆壬申年十九寡嗣子震三歲及授室生孫震又亡與震妻某氏撫孫見曾孫乃卒尙氏遵從兄

弟進妻歲貢生尙琦女。年十七適進宣化街紡績佐讀。生子世材甫二歲。康熙己卯進死。尙年二十四。艱辛鬻子。進弟遠死。尙又撫其遺孤。皆婚娶。卒年五十四。

田氏谷尼寺谷漢升妻。田生卑女。康熙癸未。年二十八寡。子應秀八歲。田晝耕夜績。以謀衣食。享年九十。李氏漢升族姪。待聘妻李盈超女。乾隆庚子。年二十九夫亡。撫嗣子時發。時亨爲夫後。

李氏蘇坊邨段雲漢妻。玉田祖母。李守正女。康熙乙酉。年二十九寡。事姑謹。二子弱。不任耕。李牽牛隴畔。分其勞。子從師學。歸早。無炊米。舂穀種數十穗。食之。趣學。薛氏雲漢族弟涵妻。薛福增女。乾隆庚申。年二十一寡。守遺腹子。終其節。徐氏涵族子宗漢妻。徐麻益女。乾隆甲戌。年二十八寡。撫孤苦節。卒年六十五。馬氏宗漢族孫友蘭妻。馬友德女。乾隆乙酉。年二十五寡。親老子幼。堅志守貞。

卷之五

年七十一。

徐氏夏家溝。夏日炳妻。徐秉哲女。康熙丁亥。年二十五寡。撫嗣子月桂。葬舅姑祖塋。徐氏夏月武妻。徐密才女。乾隆戊寅。年十九寡。或勸嫁。慨然曰。妾去衰親稚子。將疇依。今年七十六。宋氏夏年傑妻。宋自魁女。年傑歿。曲事舅姑。力無旁貸。

陳氏立節邨張成學妻。陳有良女。康熙丁亥。年十七寡。撫嗣子。事舅姑。歷久無渝志。吳氏成學孫世彩妻。吳含女。乾隆辛丑。年十九寡。奉姑育子。年逾三十。髮如雪。今年五十一。子玉田爲生員。申氏成學族孫寧棟妻。申俊女。乾隆庚申。年二十二寡。遺孤冲幼。抱子侍舅姑。疾朝夕勤劬。張氏成秀族孫好妻。清河郡元益女。乾隆癸酉。年二十一。好卒。遺二子。俱恩撫成人。卒年八十二。

賈氏貞元鎮蒲桐妻。康熙庚寅。年二十五寡。事親教子。有禮法。桐

兄子延齡亡於康熙辛卯。妻朱氏年二十一。遺子二歲。矢以死殉。賈勸曰：死節易，守孤難。朱乃食貧鞠子以終。乾隆乙亥同旌表。

李氏南關綠野堡徐養裕妻。康熙乙未年十九寡。子履吉生四月。養裕兄養志娶趙氏。趙淳女。先養裕卒。嗣子爾禮。娣姒居窮同心。守志。李卒年七十二。趙卒年八十一。

何氏大莊鎮靳莊繼室。何君貴女。康熙丁酉年十六歸莊。姑病。盡何滌穢惡。易衾褥。晨昏無倦容。前室子允寧歲餘鞠育如所生。娶婦張氏。張玊女。雍正庚戌。何年二十九莊卒。遺二子幼。壬子張年二十。允寧卒。遺孤二歲。族屬靳葦逼嫁。何剪髮指誓天日。張闔戶自縊。何救甦。相抱哭葦。自是不敢犯。乾隆癸巳同旌表。張氏莊族弟介妻張班女。乾隆壬辰年二十介卒。無子。養舅

卷之五

七

姑無缺乏。今年六十一。莊介皆唐靳孝。謨後裔。惜無世次可稽。

白氏城東街葛正夏妻。白士彥女。康熙己亥年十七于歸。雍正甲辰夫亡。母欲奪志。剪髮遺母乃止。庚戌雷雨。屋將圯。依夫柩不徙。鄰里代葺之。歲荒無食。將自裁。正夏從兄時夏憐之。爲葬夫柩。移與同居。贍其食。且教子讀書。乾隆甲申旌表。劉氏正夏從孫玉麟妻。劉潤女。年二十四寡。養姑。迄葬無缺。

事。嘉慶壬申卒。年五十四。

程氏晉集鎮張彥妻。程鉞女。康熙辛丑年二十一。彥歿。子步鰲四歲。長娶妻康氏。乾隆乙丑年二十五。步鰲歿。子丁生。月餘。家厝四世遺柩。姑婦茹苦居積。四喪俱舉。丁亦成人。乾隆甲辰程卒。嘉慶丁巳康卒。趙氏彥族子俊裔妻。趙文燦女。乾隆丙戌年二十三寡。守嗣子。敝歷數十年。成氏彥族孫澤妻。成瑚女。乾隆丙子年二十

四寡子文德一歲姑病成割左臂調藥遂愈文德娶徐謀女乾隆癸卯徐年三十文德亡姑婦並育遺孤增福乾隆乙丑成卒徐今年六十一喬氏彥族孫繼積妻喬仁女乾隆丁酉年二十七夫亡鞠嗣子事老姑歷三十七年。

趙氏永安里王之倫妻趙煥女康熙辛丑年二十一寡叔逼嫁憤成噎疾撫子炳娶何煥然女乾隆丁卯何年二十四亦寡姑病噎朝夕侍奉數十年撫子亦成立乾隆甲辰姑終何亦卒乙巳同旌表。

吳氏二水寺王生蒼繼室吳方來女雍正乙巳年十九夫亡舅老子甫週月茹苦以終黨氏生蒼族子世用繼室黨南金女乾隆乙未年二十五寡今年六十四楊氏世用族兄世佐妻楊運龍女乾隆庚辰年二十九寡遺二子夫弟析居去燃柴夜績志不渝。

卷之五

六

白氏趙邨何運妻白魚躍女雍正辛亥年十九夫亡侍姑癯瘵不避穢惡教子學詩爲生員李氏運族孫博妻李善女乾隆辛丑年二十五夫亡子世寧六齡事舅姑以孝稱今年五十七。

吳氏朱家邨朱鳳妻蓋屋武舉吳朗女雍正壬子年二十九寡教子勤儉歲荒伯鳳攜子遷徙道留伯子撫育成家蘇氏鳳族子俊德妻蘇吳女雍正巳酉年二十三夫亡子純殤養姑守節。

劉氏楊陵鎮高登霄妻劉彥積女雍正乙卯年二十七寡撫孤君相娶李茂春女乾隆壬戌李年十九亦寡姑婦撫孤姜以終老趙氏登霄族子君全妻扶鳳趙福榮女乾隆壬戌年十七子歸十三日夫亡織布易粟撫嗣子毓歷四十七年。

張氏石佛寺楊元德妻張爾恭女雍正乙卯年二十六夫亡子蘭孤藐伯逼嫁不從乃割田析居禁代耕張胼胝耕耨守志愈堅韓

氏元德族子武舉人秀山妻韓國輔女乾隆丁亥年二十五婺居子仲達在襁褓舅姑慮守難韓指天日自誓年六十卒梁氏亦元德族子禮妻梁大觀女歸禮居寨里乾隆丙子年二十二寡撫嗣子勤苦三十餘年張氏元德族孫文瑞妻張芳女年十九歸文瑞居寨里乾隆庚寅年二十五舅姑歿夫亦亡遺孤孩提田十六畝夫叔利其產逼嫁不從復阻其耕張力作輸賦不改捺。

趙氏二水寺徐自敬妻趙才女雍正乙卯年二十四夫亡嗣子進娶翟嚴女乾隆庚子崔年十九夫亡事姑撫子罔懈今年五十二何氏南仁天張明禮妻何永福女乾隆丙辰年二十二夫亡事姑育子卒年八十二王氏明禮族弟張元凱妻王繼孟女乾隆甲子年二十三夫亡子三歲守志食貧調夫叔母不靳。

曹氏于邨李良能妻曹苞女乾隆己未年二十二寡子三歲耕織自給全其節吳氏良能族孫康妻吳毓秀女乾隆庚辰年二十三寡一子幼撫育生孫以老。

卷之五

九

段氏南莊堡李福喜妻段吉學女乾隆壬戌年二十八寡子湖娶李生春女乾隆乙酉李年二十三湖亦歿遺子效天姑婦合志苦節教效天爲生員王氏李之玉妻年十六于歸越二年夫亡遺子福成方八月撫之成立卒年八十六李氏李疆妻圪塆堡李大勳女乾隆乙酉年二十生子畏天而疆卒撫孤勵節今年六十八丁氏張三官寨魏敬臣妻丁秉介女乾隆癸亥年二十二寡舅姑八旬操作奉養撫子述先承先日咬菜羹教以詩書李氏敬臣族子繼先妻李永清女乾隆丁丑年十九寡子永福不及歲舅老叔幼措社家計能自立。

郭氏圪塆堡徐思恭妻郭鄰女乾隆癸亥年二十一寡子厚積二

歲刈收麥禾。郭自負省庸值。以養舅姑。馬氏思恭族孫自立妻。馬金秀女。乾隆甲午年二十一。生子全。三月夫適巴里坤。踰年亡。力作居積。歸夫骨。

徐氏石谷邨賀登臺妻。年十七于歸。五年夫亡。織紵撫孤。卒年七十五。王氏登臺族子遐齡妻。王繼武女。乾隆甲戌年十九夫亡。守貞四十餘年。乾隆甲寅。

旌表。

馬氏桂家營桂廷棟妻。扶風生員馬公澍女。乾隆甲子年二十夫亡。子繼殤。夫弟廷澍娶扶風貢生王岵女。乾隆癸酉年十九夫亦亡。自傷與馬同命。質嫁資與馬合養舅姑。今年六十一。

常氏普集鎮程壽妻。常潔女。乾隆丁卯年二十二寡。撫嗣子玉衡。王氏程之清妻。王朝鼎女。乾隆己丑年二十七夫亡。翁瞽奉事勤。

卷之五

三

教子煥林爲生員。

何氏邵家寨李藻中妻。何遷女。乾隆庚午年二十五夫卒。育子鎮。以事親舅患瘋疾。却葯餌。何跪進。乃服鎮娶張宏女。乾隆己丑年二十鎮卒。生子產齡。何亦卒。王舅病篤。張滌濯扶持十餘載。今年六十四。

馮氏金鐵寨金庫妻。乾隆辛未年二十七。庫適渭源堡。日將暮。庫族叔錫穩催庫浦賦。投間誘馮。馮泣罵不從。復迫庫輸賦。辱及馮。馮忿自經死。置錫穩法。馮得。

旌表。趙氏金舉妻。年二十五夫亡。孝事舅姑。教子爲生員。歷節四十二年。

李氏興城寺楊元德妻。李作楹女。乾隆癸酉年二十二夫亡。遺二子幼。或諷他適。輒自批面議遂息。今年八十二。金氏元德族弟朝。

居妻金明福女。乾隆丙戌年十九寡。子孤藐。姑亦孀居。金勤苦奉姑終身。子亦成人。今年六十二。

崔氏城西街宇文澄孫釭妻。年二十寡。遺孤二歲。撫育艱辛。乾隆甲辰年五十。張氏簡妻。張錫朋女。夫卒。撫嗣子紡績自度。嘉慶壬戌卒。年七十七。王氏筠妻。王兆吉女。乾隆丙戌年二十八寡。姑老子八歲。教子治生。助十指養姑。今年七十四。黃氏祿妻。乾隆丁丑年二十三寡。育子廣居。今年七十九。王氏燧妻。王照廣女。乾隆甲戌年二十寡。日不再食。歲不更衣。撫嗣子堂以終身。四人皆澄族孫華氏。宇文耀妻。見節義祠神主。餘無考。

李氏北關徐仲鼎妻。李生梅女。乾隆壬午年二十二寡。弟仲觀娶王作賓女。乾隆丁丑。王年二十一。亦寡。舅鰥居。同勸娶姑梁。生子步鰲。四歲舅姑逝。同撫步鰲。成立嘉慶壬申。王卒。李年七十六。

卷之五

三

伊氏渭源里李振東妻。伊元烈女。乾隆己卯年二十二。夫亡。遺子冲弱。舅姑老。叔振家娶垂奎女。乾隆庚寅。華年十七。振家歿。華嗣伊次子。與伊釀酒求錙銖利。仰事俯育。無遺缺。嘉慶十四年。同旌表。

劉氏漆邨何瑞從弟珍妻。劉振文女。乾隆己卯年二十五寡。夫弟蕩產盡。劉攜子大成。日食樹皮野菜。庸值終其身。蘇氏珍族子代妻。蘇自成女。歸代觀音堂。乾隆庚子年二十五寡。子五歲。茹苦守志。

羊氏校場堡楊友蘭妻。羊正義女。乾隆己卯年二十一寡。兄景蘭娶黨氏。黨啓女。乾隆癸未年二十寡。黨與羊奉姑鞠子。皆享高年。郭氏永安里王雲龍妻。郭延湖女。乾隆庚辰年二十一寡。雲龍弟應龍妻。張氏張明聚女。乾隆壬午年十九寡。舅姑痛二子亡。且無

嗣郭與張勸慰諄篤舅姑爲減悲傷郭嗣子家珍張嗣子應駒嘉慶已未同旌表。

杜氏高望川馬成妻杜寵女乾隆辛巳年二十三寡嗣子錫福今年七十五成弟式妻楊氏楊福林女乾隆癸未年二十一寡嗣子步瀛今年七十一。

王氏長寧舖汪江妻王元佑女乾隆辛巳年二十一江卒撫嗣子廣潤娶馮秉女王病醫無效馮禱姜嫄廟投身岩下傷不死王病愈而馮卒王今年七十二。

田氏孟王邨許吉寧妻田進許女乾隆壬午年二十一寡不以貧約易操劉氏吉寧族孫飛龍妻劉慰女乾隆庚辰年十九寡親老子幼亦不以貧約易操。

卷之五

三

陳氏南莊堡楊忠妻陳自售女乾隆甲申年十九生子景泰未週月忠歿忠弟信娶馮德女乾隆壬午馮年十九生子景清數月信歿姊姒同志養親並撫遺孤陳今六十八馮今年七十。

楊氏北陽邨張峩妻楊之樸女乾隆癸卯年二十二峩亡無子峩弟鳳鳴先峩一年歿妻康氏康友女年十九寡與楊合志事親撫嗣子而楊嗣子復夭今楊年五十二康年五十。

蘇氏仁邨康殿妻年十七于歸越七年夫亡撫嗣子爲夫後時嗣子本生母王氏亦寡與同炊共績以成其節卒年四十六譚氏康福妻年十七于歸越三年夫外出不歸譚事舅姑盡禮撫嗣子如已出金氏康士元妻年二十一夫亡事舅及夫叔惟謹撫遺孤拱以老茹苦三十三年。

人物志下之二列女

在城鎮列女

柴氏在城康滿妻。明成化間。柴年二十六夫亡。守節四十餘年。嘉靖戊戌旌表。

牛氏西街陳懋謙妻。牛兆祥從孫元昇女。夫亡。牛年十九。撫遺腹子。輅五十餘年。艱苦備嘗。萬歷年旌表。

王氏在城鎮李萬箱妻。乾州王樂煥女。康熙庚戌年十八夫亡。撫嗣子不渝志。乾隆丙辰旌表。

李氏西街孫國良妻。歸國良。夜紡績。佐夫讀。康熙丁巳年三十四夫卒。遺三子。家貧。令子作小賈。日豐年不足食。荒歲將何賴。乃鬻簪珥。及夫遺衣服。儲麥八九石。及辛未饑。賴麥免逃徙。歲稔餘麥數斗。由此家漸裕。慨然曰。值今日之易。當思昔日之難。尺布顆粟。

卷之五

三

吾視爲珍異也。年屆七十。猶紡績不輟。孫景烈成進士。官翰林。以文名顯。

羊氏西街楊茂棟妻。羊尊周女。康熙戊辰年二十一寡。奉舅姑。撫嗣子。子亡。以夫族子爲嗣。乾隆丁巳旌表。

申氏北關徐宏綬妻。申永貴女。雍正丁未年十九寡。事親終老。子亦成立。乾隆戊戌旌表。

魏氏南里城楊仲文妻。魏國祥女。雍正庚戌年二十六寡。子旺三歲。食貧守節。卒年六十六。

喬氏西街魏天壽妻。雍正壬子。喬年二十二夫亡。撫二子成人。卒年七十四。

焦氏宣化街朱爨妻。整屋焦世緒女。雍正癸丑。焦年二十一。嫁爨。勤縫紉。兼業履。佐薪米。奉舅姑。助夫膏火。夫得爲生員。年二十五。寡。撫嗣子許官。守志以歿。年六十六。乾隆甲午旌表。

李氏北關李崇盛妻。李爵女。年十九。于歸。值舅姑病。作新婦三日。卽改妝。侍湯藥。雍正乙卯。年二十四。夫亡。與叔同爨。叔賂鄰媪。勸改適。不從。乃攜子英及喜。別居。撫育成人。葬夫時。投穴以殉。急救已傷一臂。乾隆甲戌旌表。

常氏城南街李文明妻。常承祖女。年十七。歸文明。乾隆壬申。常年二十四。夫亡。舅老家貧。常夜績晨舂。供舅衣食。而已常枵腹。舅逝。教遺孤業。賈而貧如故。卒年七十二。

卷之五

五

李氏南關王從儒妻。小北街李作棟女。乾隆癸酉。李年二十。夫亡。父母舅姑。憐其少。勸改適。剪髮矢志。孝養弗懈。卒年六十二。

王氏南留邨孫澍妻。王生昭女。乾隆乙亥。年二十。寡。侍姑疾。偶失意。旨退而自責。教嗣子爲生員。食廩餼。嘉慶庚申旌表。

徐氏西街申紀妻。徐宏毅女。乾隆丙子。年十八。寡。撫嗣子浩。讀書成立。嘉慶戊辰旌表。

黨氏西街楊之華妻。黨志德女。乾隆戊寅。年二十一。寡。貧能養姑。教嗣子甲木。爲生員。嘉慶丙寅旌表。今年八十。

徐氏宣化街黃文德妻。徐天保女。乾隆己卯。徐年二十四。寡。三子

俱幼家貧無依。晝樵夜績。摺拄數十年。守貞不渝。卒年五十八。
王氏白楊寨李振楫妻。乾隆庚辰年二十四。嫠居。養姑二十九年。
撫字嗣子如瓶。爲生員。

楊氏東街王富善妻。楊名福女。乾隆丁亥。

旌表縣卷殘缺。駢詞所載。有云十六于歸。十年失所。嘗糞事親。茹
荼教子。

李氏西街監生劉起瑞妻。李應材女。乾隆戊子。年二十。夫亡。時舅
姑未葬。李經營備舉。育嗣子成家。嘉慶五年。

旌表。

張氏西街楊凌雯妻。鄭家坡張福世女。乾隆己丑。張年十九。歸凌
雯。越三年。夫亡。勤女工。養舅姑。鞠育嗣子。晏守貞以老。今年六十
五。

卷之五

五

黨氏牛家河趙性良妻。黨成女。乾隆庚寅年二十一。寡。無子。事舅
姑以孝聞。

王氏菜園堡鄭自誠妻。王成發女。乾隆辛卯。王年十九。于歸。越七
年。自誠病歿。王事姑育子。苦志堅守。今年六十一。

劉氏宣化街李愷妻。劉浩女。乾隆戊戌。劉年二十五。寡。子俊。生數
月。長病。股廢。孀姑又多病。劉俯仰辛勤。不少倦。今年六十。姑年八
十三。

朱氏白楊寨陳振遇妻。朱統女。乾隆辛丑。年二十二。夫亡。事舅姑
撫嗣子。教養兼至。

趙氏北關王作安妻。拒姦投井死。嘉慶丙辰
旌表。

年歲無考。列女附後。

張氏小北街李五榮妻張翬女年二十一寡育遺腹子恒居蔬食不充腹事舅姑及嗣姑以孝聞恒居生子出外與子婦經營餽粥以老卒年七十歲。

李氏尙家坡尙桂妻年十六適桂越二載夫亡熊兆其遺腹子也茹荼嚙冰鬻子以終卒年八十。

志曰附城川原美麗比戶詩書風教殊焉馬氏楊氏趙氏丁氏張氏皆世代占籍長寧康氏興城張氏鳳陽耿氏邵封黨氏亦多移居城郭合觀之可以知其盛矣。

貞元鎮列女

郭氏于邨李僑妻郿縣郭寧女年十六于歸歲饑夫乞食他方病阻於外姑年老需肉食郭剪髮購烹以進又剜臂股調羹以廖姑疾康熙癸卯學使榜其門曰閨閣烈孝。

卷之五

三

何氏高望川楊景妻何全圖女康熙丁丑年二十八寡年八十卒乾隆丁卯

旌表。

吳氏大寨子舒庭妻康熙己卯年二十五寡食貧撫孤乾隆丙寅旌表。

李氏大韓店李濟時妻乾州李振體女雍正壬子年二十一夫亡哭失明猶驅勉事舅姑教嗣子力田不倦卒年七十三。

卓氏可層舖尙居禮妻雍正癸丑年三十夫亡子路生五日育以守志卒年八十。

馬氏可層舖趙連庭妻乾隆己卯年十九連庭歿撫嗣子世昌守志今年七十三。

倪氏可層舖監生王治妻倪有德女乾隆辛巳年二十三寡遺二

子值歲饑家人逼嫁不從。食菘花自給子長。以次子嗣。夫兄浩後張氏。察劉卹劉事。清妻。乾隆壬辰年十七歸。事清踰月。夫亡守嗣。子無異志。食指七十餘口。張經營朝夕。不辭勞瘁。年今六十。闔室稱之無間言。

張氏。大韓店李咀華妻。張萃業女。乾隆甲午年十八生子震邦。兩月夫亡。舅亦繼歿。或謀其產。以嫁婦。惑姑。張泣請曰。姑不爲婦計。獨不爲孫計耶。姑始悟。今姑年八十三。手足痿廢。張年五十七。日爲櫛沐修潔。捧飲器。操匕箸進食。無一日懈。

何氏。大韓店劉瑞妻。何起蛟女。乾隆乙未年十九寡。無子。事舅姑能盡歡。居家勤儉。有餘則施衣食濟人。今年五十七。

王氏。高望川王際貴妻。乾州王庫女。乾隆丙申年二十一寡。教養幼子。不以貧屢自懈。今年五十八。

卷之五

七

陳氏。可層舖尙世堤妻。陳其祿女。乾隆戊戌年二十三夫亡。織布撫二子。卒年五十六。

郭氏。高望川趙寧妻。郭章女。乾隆己亥年二十一寡。生遺腹子。依夫兄泰以全其節。今年五十五。

年歲無考。列女附後。

張氏。大韓店顏萃妻。年十七于歸。越四年夫亡。撫遺腹子以延宗祀。年六十六。

長寧鎮列女

楊氏。興城寺劉新基妻。永年母。康熙間。楊年二十夫亡。撫孤永年自立。卒年八十一。孫燦舉人。

曾氏。和尙卹高靈陽妻。曾謀女。康熙己亥年二十夫亡。舉遺腹子。密密長。先曾死。曾茹荼終身。卒年八十。

吳氏。上莊戴愈顯妻。吳國棟女。康熙壬寅。吳年二十五。夫亡無子。鞠嗣子嚴如所生。

趙氏。馬午邨田希箐妻。乾州趙之節女。雍正壬子。年二十九。夫亡。值歲饑。日食糠粃。養親無缺。教三子耕讀。卒致孫曾濟濟。家計日興。乾隆壬辰。

旌表。

許氏。岡子上朱天祿妻。許杭女。乾隆壬戌。年二十七。寡子璵四歲。鞠育二十二年。璵死。更撫嗣孫可法。可法亦出亡。許孑然守貧以老。

白氏。小九寨王寧妻。白文秀女。乾隆甲子。年二十二。夫亡。絕粒求死。舅諭之。乃復食。子敏中幼。白勤苦持家。釐然無廢事。乾隆丙午。旌表。

卷之五

天

劉氏。鎮南堡張權妻。劉輝祖女。乾隆庚午。年十九。寡遺子直。亦早卒。育孫以終其操。今年八十。

譚氏。焦上邨葛洪仁妻。譚爾忠女。乾隆壬午。年二十八。洪仁卒。子世明五歲。譚守貧撫孤。終其節。

蘇氏。小九寨楊彬繼室。蘇大年女。乾隆乙酉。年二十七。夫亡。撫前室子如巳子。

蘇氏。焦上邨李應髦妻。蘇倫女。乾隆乙酉。年二十四。夫亡。子五歲。家窶甚。姑令改適。不從。加以凌辱。終不從。乃止。

何氏。和尙邨丁折桂妻。何迪女。乾隆乙酉。年二十一。寡。貧能教子。嘉慶甲子。

旌表。

張氏。焦上邨戚耀妻。張自勇女。乾隆己亥。年二十七。寡。子茂齡八

歲有勸他適者。輒自批其面。終以節老。今年六十一。年歲無考。列女附後。

劉氏。小九寨王需妻。年少夫亡。苦節四十餘年。

志曰。長寧康氏。興城張氏。皆鎮人也。明正德萬歷間。冠蓋相望。盛甲一邑。其家人皆能明禮義。尚節操。是以孝婦烈女。接跡一門。久而成爲鄉俗。單門弱族。亦克振拔自勵。卓然以節孝稱。豈不盛哉。

薛固鎮列女

田氏。涇源何恂妻。田良女。康熙甲子。年十七歸恂。越十五年恂卒。田事舅姑。撫幼子。以孝慈稱。享年百有八歲。乾隆癸巳。

旌表。

張氏。馬坊毛福貴妻。張謀女。乾隆壬午。年二十二寡。姑慮志不堅。齒斷一指自誓。姑卒。貧無棺。里黨市櫓營葬。張勤女。工教子仁牧。

卷之五

三

羊積庸。值酬之。今年七十三。

張氏。梅花寺郁錦妻。張含英女。乾隆癸未。年二十五。夫亡無子。孝養舅姑。以成其志。

黃氏。崆峒堡閻仲妻。黃鏡女。乾隆乙酉。年二十三。寡養舅撫嗣子。俯仰兼至。

毛氏。爪稜堡李之梅繼室。毛福祿女。乾隆壬辰。年二十六。夫亡。子忠元。冲弱。前室子忠愛。痴愚。皆撫育成立。今年六十七。

何氏。孔雀寨婁傑妻。何彩女。乾隆己亥。年二十二。夫亡無子。舅納痴妾。生子不能育。何代爲鞠養。今年五十六。

普濟鎮列女

康氏。北寨陳柱妻。康謀女。康熙乙未。年二十三。柱亡。抱遺子。事病姑。夙夕勤劬。父母乏嗣。移養於家。歿葬已地。附身附棺。無遺憾。卒。

年九十二。

張氏南仁天姜轅姬妻張爾城女雍正巳酉年十九寡守遺腹子鉦成其貞操。

楊氏鄭邨侯世財妻楊寧女雍正壬子年二十寡伯叔逼嫁攜嗣子讓依母家食貧守節。

李氏鄭邨杜賓芳妻李作謀女于歸未逾月賓芳客於蜀乾隆丙辰賓芳死李年二十三撫嗣子楹守志歸夫骸骨葬如禮卒年七十四。

何氏高渡邨譚肆妻何三忠女乾隆巳未年二十七寡鞠子紹賜矢節沒齒不移。

常氏仁邨康作喜妻常進姜女乾隆癸亥年二十三寡姑病廢動作需人扶掖床策應如影响守嗣孫明以終其志。

卷之五

三

章氏南寨里張雲妻章順女乾隆甲子年二十七雲卒姑老子幼無恒產章經營數十年以孝慈稱於鄉里今年九十六。

段氏曹家店明御史楊秉中八世孫延壽妻段吉祿女乾隆間年二十二夫亡子炳二歲舅姑七旬夫弟三人未有室迫舅姑歿弟亦散離攜孤依母家晝樵夜紡不以困約改操卒年六十一。

楊氏贖馬邨劉信妻楊乘龍女乾隆巳巳年二十二寡于星漢二歲家人逼嫁急入室自經驚救得甦家人知不可奪議遂止星漢後爲武庠生。

李氏鄭邨杜賓賢妻乾隆庚午年十九于歸一載夫亡絕粒數日親族諭以撫孤爲大始就食現年八十二。

宇文氏新尙邨趙天相妻宇文謀女乾隆甲戌年十九夫客死矢志不更適嗣子長亦出亡孤苦終老。

伊氏贖馬邨宋世繼妻伊金女乾隆乙亥年十九夫卒無子時姑蚤亡逮事舅與王舅王姑王姑嚴厲善怒值佛意家人皆避匿伊獨柔聲怡色得王姑歡既而舅娶繼姑葛事姑如王姑不知爲繼也姑病則旦暮禱於神所以身代娣姒憐其孤弱不使重勞家務伊夙夜操作終不以嫠而自逸嗣夫兄世賢子爲夫後旣長就學輒易簪珥供楮墨張氏洲題其德撰其行事如此。

高氏洪家寨洪世奔妻高武女乾隆癸未年二十四夫卒姑老子尙孩提家計出入悉力經營皆就理。

張氏董邨史恩妻張光照女乾隆乙酉年二十三恩卒子記行三歲越二年繼姑王卒遺三叔俱幼張鞠育周至皆成人舅自厚老病張奉湯藥夜恒不寐今年七十一。

魯氏令功邨薛明妻魯倫女乾隆壬辰年二十七寡遺孤六歲有

卷之五

三

田六畝躬耕育子卒免饑寒今年六十八。

張氏曹家店曹士玉妻張棟女乾隆丁酉年二十五寡子靈二歲舅失明且老張奉養無缺撫子亦克成立。

王氏洪家寨趙講妻王賓女乾隆己亥年二十四寡子三歲舅姑皆老舅且瞽家計無所依倚王操作克供朝夕。

年歲無考列女附後

劉氏曹家店曹宗武妻年十九于歸子琪甫一歲夫亡事親教子晝夜勤劬卒年七十八。

大莊鎮列女

尙氏鎮西堡李如玉妻尙秉虞女順治庚寅年二十四夫亡勤女工奉舅姑撫子良力農業年八十四卒。

趙氏高邨張志耀妻順治庚寅年十八于歸越十年夫亡子授室

亦卒。又撫孫及曾孫年百有二歲。乾隆壬申。

旌表

王氏。張三官寨張宰妻。康熙己丑年十七于歸。夫亡斷髮毀容。忍痛撫孤。以延祀。卒年八十二。乾隆丁丑。

旌表

侯氏。山邨張自秋妻。侯顯女。康熙庚子年十九夫卒。子文著在襁褓。既長而夭。嗣孫不肖。敗產出亡。侯拾薪自炊。年九十卒。

王氏。孟王堡孟登科妻。王紹女。乾隆庚申年二十一。夫亡無子。姑亦繼卒。鞠幼叔。以慰舅心。癸丑歲饑卒。

夏氏。裔旗寨王有年妻。夏璉女。乾隆癸亥年二十。夫亡無子。夏請以夫從弟新剛爲舅。嗣而教養之。新剛授室生子。而婦亡。夏撫新剛子徵。亦爲授室。嘉慶九年。

卷之五

三

旌表

蘇氏。山邨李沛妻。蘇謀女。乾隆乙丑年十八沛卒。踰月生子福財。諸伯析箸。與叔合爨奉姑。姑卒。子授室。叔亦分析躬治田園。更撫諸孫以老。卒年八十一。

張氏。半個城李茂發妻。張琮女。乾隆乙丑年二十五寡。子俊升三歲。教養兼至。不以孤弱少寬假。

陳氏。漆邨鄭琬妻。陳瑄女。乾隆戊辰年二十三琬歿。姑老子瑞麟四歲。家計惟紡績。是賴。卒年八十六。

李氏。閭家堡閭文蔚妻。李永女。乾隆己卯年二十四夫卒。子須良生七日。有田數畝。佐舅耘耨。夜則紡績自力。卒年八十四。

王氏。鎮東堡李立妻。王甲女。乾隆乙亥年十九寡。孝養舅姑。教子長年勤儉。務家計。

姚氏毛家嘴康倫妻。姚彥聖女。乾隆丙子。年十九倫卒。撫嗣子乃與成立。

何氏張三官寨段倫妻。乾隆庚辰。年三十三夫亡。遺子友鑾。升娃辛卯七月。友鑾出傭。升娃亦鬻餅街市。鄰劉法夏偵聞。戲之。何忿。詆逐。旋自經死。法夏畏罪亦自戕。

張氏張三官寨劉竹齡妻。張玉女。乾隆丁亥。年二十一寡。舅姑六十餘。張善女紅。織布業屨。工倍傭。婦指腫無懈。舅姑賴以溫飽。教嗣子重讀書習儒業。今年六十八。

何氏張三官寨張登先妻。何可言女。乾隆戊子。年二十三寡。子曰玉四歲。恩撫勤劬。紡績奉舅姑。承志盡歡。族子某幼失怙恃。何養育十餘年不倦。今年六十八。

史氏山邨田汝霽妻。史純女。乾隆己丑。年二十八夫卒。事親育子。不以食貧自懈。

卷之五

王氏大莊堡趙世和妻。王大賓女。乾隆癸卯。年十八夫亡。家貧取給十指。質衣供姑膳。教子芳成立。今年五十五。

卓氏義樂寺吳安邦妻。卓聖潔女。乾隆丁酉。年二十四寡。無子。教夫弟治邦成名爲貢生。今年六十二。

楊氏義樂寺周三元妻。楊洪女。乾隆壬寅。年二十二夫亡。子大善四歲。撫以守志。

年歲無考。列女附後。

李氏張三官寨沈來聘妻。少寡無子。有勸嫁者。李曰。姑在誰與養。織紉以供甘旨。歷四十餘年。

南氏張三官寨魏起鳳妻。年十五于歸。八年起鳳死。居貧孝事舅姑。撫三子皆成人。年八十二歲。有孫十二人。曾孫二十人。

呂氏張三官寨南正已妻年二十八寡撫孤成立年八十三卒
李氏尖栢樹堡吳翥妻年十九夫亡遺一子族惡逼嫁斷五指自
矢撫孤授室得孫瑤爲生員卒年六十九。

王氏尖栢樹堡別克敬繼室年二十于歸越五年寡撫前室子教
育周至年七十八卒。

鄧氏方家寨白受福妻年十七于歸四年夫亡撫夫從子爲嗣苦
節四十餘年。

志曰薛固普濟大莊宋節婦鄉也其事不傳惜哉迄今歷數百餘
年而鄉俗不衰嗚呼其風化遠矣。

永安鎮列女

楊氏女徐家灣楊志秀女順治辛卯年十四治奩將嫁賊破堡逼
汚女大罵不從賊縛至渭灘罵不絕口賊怒橫刀斷其面兩目俱

卷之五

三

墜猶呦呦作罵聲死。

靳氏小寨堡陳所懷妻靳應科女康熙間年二十五夫亡遺老親
幼子靳茹苦支持克成其志。

劉氏立節堡張璜妻劉青女康熙己酉年十六于歸夫亡無子撫
嗣子恩勤如已出享年一百六歲乾隆壬辰

旌表。

李氏圪塔廟劉承訓妻扶風李某女年十八歸承訓康熙庚午夫
亡踰年歲饑舅姑勸改嫁誓不從給歸母家娶者車及門李知不
可挽歸辭舅姑登車行二里許自經車中死面如生歸葬於劉。

高氏立節堡張桐妻義樂寺高珍女康熙戊寅年二十四桐卒子
安世穩世俱幼數月姑亦繼亡遺二叔亦幼高撫叔與子無異

閔氏張捕邨封昭妻閔相蘭女雍正甲寅年二十一寡子爾恭三

歲恩撫授室。先閔卒。閔卒於乾隆庚戌。爾恭婦馬無子。傷姑苦節。呈牒疏其梗概如此。

李氏張捕邨鄧隆妻李蕃女。雍正乙卯年十九生子王兆隆。卒事舅庠生雲續。姑李克盡婦職。王兆八歲教之讀書。不以居貧廢學。卒年八十九。

袁氏杜家坡杜琳妻袁繼先女。乾隆辛酉年二十七夫歿。孝事老親。教子時茂爲生員。

封氏新莊堡劉繼全妻張捕邨封雲志女。乾隆甲戌年二十八寡。遺孤五歲。封砥節茹苦。以存夫祀。

董氏王家坎子王庫妻生員董瀚女。乾隆丙戌年二十九寡。家貧子幼。姑勸更適。董誓曰。餓死無怨。紡績養姑。姑賴以安全。子亦成長。今年七十六。

卷之五

三

劉氏橋頭閭宗孔妻劉元昇女。乾隆戊子年二十四。夫卒。親老遺孤三歲。劉賦性溫恭。仰事俯育。從容就理。

傅氏徐家灣劉偉妻傅彥女。乾隆丙申年二十五。偉卒。子振孤弱。有田四畝。鄰人感其義。代耕給食。今年六十二。振卒於乾隆乙亥。妻朱亦賢。

郭氏鎮民焦登妻郭永茂女。乾隆丙申年十七。歸登。未及歲。登外出。絕音耗。郭甘貧奉姑。姑雙目失明。今年八十六。郭年亦五十四。扶持起居如少婦。

劉氏杜家坡杜時俊妻圪塔廟劉永康女。乾隆庚子年二十七。寡。二子孤藐。夫兄歿。遺一子。夫弟外出。遺二子。俱幼。劉勤女工給食。夫伯母張寡無子。叔璜卒。遺子時雲。亦幼。劉并移養於家。今年六十一。

郭氏徐家灣徐之然妻扶風郭世揆女乾隆壬寅年二十八寡矢志守貞今年五十九足跡不踰閭閻。

王氏杜家坡杜潦妻王登周女乾隆壬寅年二十一夫亡無子撫夫從弟雅爲舅姑嗣劬勞以終其身。

年歲無考列女附後

李氏穆家寨穆鳳朝妻年二十七寡家貧克孝舅姑耕無牛以子代夜無火隨月續汲井灌漑墜井幾死子賣餅於市或憐與錢責令卽還不願子受非分財而家漸裕實勤儉之報亦德教所積也李時代缺考孫自浩呈牒年七十三則李年亦畧可想見。

志曰鎮爲慶善宮遺址寶太后遺風猶有存焉者乎楊氏女斷面猶能罵賊非深明大義者不能吁烈矣。

楊陵鎮列女

卷之五

三六

楊氏上營張脆妻楊璟女明成化間楊年二十五寡脆病篤語氏曰汝能守則善事吾母撫吾子不然且適人楊曰有不虞止一死耳後撫子世策漸長嘗勉謂之曰我原許汝父以死所不死者以爾未立爾其勿負吾志後世策爲臨津教諭嘉靖壬午旌表載通志。

陳氏傅家莊張織妻陳敬之女康熙乙酉年二十四夫亡子召鳳孤弱撫以守貞不以貧窶累其志。

劉氏川口朱心興妻劉金堂女康熙甲午年十九寡無子家人勸嫁誓以死守育嗣子永福歷四十餘年。

劉氏豐盈寨袁綬妻劉緒女康熙戊戌年二十一寡食貧奉親教子耕讀爲業卒年八十四。

崔氏上營堡楊繼溥妻崔光遠女康熙庚子年十九于歸越三載

夫亡撫子守貞卒年六十一嘉慶丙寅旌表。

張氏川口劉府妻張安世女乾隆辛酉年二十三瘠卒事孀姑育稚子守節終其身。

張氏馬家溝梁永福妻張班女乾隆辛未年十九方娠夫亡姑哭子失明冀生孫三月生果男也而足跛數歲不能行姑曰守跛兒如無兒婦方少艾曷他適張泣曰婦不去爲養姑也姑失明婦去誰與給朝夕兒雖跛亦足延夫嗣願姑無以婦爲念今年八十一申氏南陽邨符鳳岐妻申應福女乾隆壬申年二十一寡茹苦養舅撫嗣子秀章成其志卒年八十歲。

段氏陽邨楊濟憲妻段長山女乾隆壬申年十九夫歿子秀玉週歲撫以守志夫從兄濟水圖嫁段夜半強啓房戶計以曖昧污其

卷之五

七

名則奪嫁有詞段驚起急投井中鄰人急救得不死卒年七十七張氏杜家寨何盈妻張忠女乾隆戊寅年二十二寡無子姑慮家貧令他適張曰貧命也他適卽不貧乎願餓死不易志姑以盈兄子爲之嗣痴愚不慧張鞠養恩勤卒成姑意。

張氏川口劉璋妻張含素女乾隆丙子年二十寡甘糟糠供姑養膳教嗣子燦爲生員嘉慶八年旌表。

徐氏杜家寨裴同妻徐仁女乾隆丙子年二十四同卒無子事姑三十年無懈容同從弟銳憫其窮老無依迎養於家卒年八十一喬氏殷彭邨彭開寧妻喬彩女乾隆戊寅年二十三寡薄田二畝不足資生佐以女工勉供朝夕姑老多病湯藥盡織紉也撫子聚成立。

史氏殷彭邨彭尙金妻史芳女乾隆己卯年二十四夫卒姑老病子女待哺搗拄口食恒日不再炊史不以爲苦姑語人曰婦能忍人所不能忍真孝婦也。

吳氏南卜邨張盈妻吳穩周女乾隆己卯年二十一盈卒子生數月奉老姑以畜稚子無渝志今年七十四。

楊氏轟邨張宗仁妻同邨楊蒼女乾隆庚辰年二十一寡家貧養姑水必手汲食皆布買迄終養無缺匱今年七十四。

景氏校場堡賀登妻景萬倉女乾隆丙戌年二十四夫亡舅姑存歿所需悉出十指遺子亦鞠養成人今年七十。

董氏柴家嘴柴桐妻董宗德女乾隆庚寅年十九寡姑年七十子生一歲搗拄勞瘁年未三十髮白如雪今年六十一。

馬氏本鎮曹恒祿妻馬英女乾隆癸巳年二十九忿張九錫穢言誘戲自縊死獄具

旌表。

任氏豐盈寨荆澤妻扶風庠生任廷柱女乾隆丁酉年十七嫁澤六月而澤亡事王舅及舅姑數十年稱賢孝嗣子壬辰今年五十二。

馬氏鎮民張濟妻馬實女乾隆戊戌年二十五夫卒無子事舅享年八十餘今馬年六十。

楊氏鎮民蘇泰妻楊濟海女乾隆戊戌年十九寡無子奉親生死無缺禮居恒樸素不爲容飾非大事不踰閭門今年五十四。

賀氏厓子堡徐樹妻賀元明女乾隆壬寅年二十樹歿治家勤儉善事舅姑恩養嗣子今年五十一。

崔氏梨張溝張萬景妻崔鎧女乾隆庚子年十九寡無子舅姑老

病居貧奉養以成其志。

張氏。厓子堡徐序妻。張景深女。乾隆辛丑年二十四序歿。子冲藐。拮据事親。兼養遺孤。髮白目昏。卒不辭勞。今年五十七。

李氏。川口何尙仁妻。乾隆甲辰年二十一夫亡。事舅姑。壽終。遺子亦成人。今年五十餘。

年歲無考。列女附後。

崔氏。本鎮戴彩妻。崔超女。年十五于歸。十八夫亡。撫嗣子元文。成立。年六十五。

黃氏。本鎮戴盛德妻。黃顏女。年二十一夫亡。撫育嗣子。子亡。撫孫成立。年七十五。

田氏。本鎮張名樂妻。田伯禾女。年二十二夫亡。撫姪成法。爲嗣。年六十三。

卷之五

三九

楊氏。本鎮張積貴妻。楊如雲女。年二十三夫亡。遺孤二歲。撫育成。立爲生員。年七十。

馬氏。川口朱信已妻。馬台芳女。于歸六載。夫亡。孝事翁姑。教子有義方。茹苦五十餘年。卒年八十二。

遊鳳鎮列女

屈氏。焦陽邨杜逢雲妻。萬歷間歲饑。翁及夫皆就食漢南。翁死。夫歸亦死。氏朝夕泣。以夫死而使翁骸遺棄他鄉乎。遂殯其夫。同母弟徒步赴漢南。負骨歸葬。竟以餓死。

樵氏。王澤邨華元秀妻。新寨樵思強女。康熙戊戌年十九夫亡。無子。樵本農家女。克明婦道。誓以死守。姑病不能踐履。八年樵服勞奉養。無少怠。病劇扶掖。夜不交睫。舅諭少休。則曰。代夫終養。婦職也。願以子視婦。姑爲泣下。

劉氏桂家營齊伍妻。劉振孔女。雍正乙卯年十八寡。撫子良臣。娶妻生子。學良。臣死。婦改適。學十餘歲亦死。劉恩勤兩世孤苦。一生鄰里咸憫惜之。

秦氏桂家營姚福德妻。扶風秦志花女。乾隆己卯年二十寡。紡績事親兼撫幼叔成家。

黃氏福多邨鄭天玉妻。黃世雄女。乾隆壬午年二十五寡。姑年逾七十。遺子七歲。支持家計。不懈於貧。今年七十六。

杜氏王澤邨徐作楫妻。庠生杜玟女。乾隆癸亥年十九夫亡。善事舅及繼姑。操作勤劬。不以嫠居自逸。處娣姒以謙和。著教子煦。不少寬假。讀書爲生員。

徐氏蒜邨楊受桂妻。徐諧女。乾隆丁酉年二十三夫歿。舅老子七歲。徐躬勤灌溉。復勤女工。一家賴以資給。今年五十九。

卷之五

四

陳氏岸底邨羅君恩妻。陳明新女。乾隆辛丑年二十八夫外出絕。耗遺二子幼稚。河灘地三畝。不宜麥禾。乃藝棉供紡織。以給朝夕。今年六十。

段氏新邨王大賓妻。段盛女。乾隆辛丑年十七適大賓。三月夫亡。無子。乞夫從弟爲舅嗣。長爲婚娶。生子盼娃。立爲夫嗣。兩世宗系。賴以不替。今年四十八。

魏公鎮列女

段氏鎮民魏書徵妻。段義女。康熙乙酉年十八嫠居。無子女。砥節事舅舅時語人口。爾婦不如乃婦。嗣子溥。夫兄澤民子也。卒年八十三。

李氏崗上邨張梓妻。鳳安邨李永良女。乾隆丁巳年二十四寡。無子。姑厝寢室。李矢志營葬。謀嗣子。梓從子士信。重其行操。議立梓。

從子士佺爲嗣復助資葬姑與夫壬戌冬久雪母子數日斷炊鄰
魏際盛憐之贈士佺米數升李責之曰非骨肉至親何可受士佺
含淚還魏俄瀕死士信得狀持餅趨饋乃食得不死卒年七十一
魏氏鎮民劉文俊妻魏天受女乾隆壬戌年二十一寡遺孤生三
月善事舅姑戚友饋食具有餘則易市他味進及舅姑歿盡質衣
服器具以葬日磨麥屑撫孤子。

魏氏鎮民劉現妻魏秉賢女乾隆乙丑年二十一寡子孤藐姑歿
遺叔五歲魏慈養如姑在時寒冬授衣先叔後子日子煖叔寒是
死姑也。

霍氏鎮民黨國材妻霍名玉女乾隆癸酉年二十一夫亡嗣夫弟
國善子四歲旣而國善亡遺子未週月霍恩養二子老不告瘁。

孫氏任渠堡魏大緒妻乾州人乾隆癸酉年二十二生女許字任

卷之五

聖

通貴子通貴艷其色偵大緒赴市持刀逼污拒刀疾呼創之立死
置通貴法女亦絕昏獄成。

旌表。

段氏鎮民劉毓棟妻段可智女乾隆乙亥年二十一夫亡生子未
週月毀面自矢食貧以終嘉慶庚申。

旌表。

劉氏鎮民楊學洙妻扶風劉士欽女乾隆戊寅年二十一寡貧能
事姑教嗣子樹清業儒嘉慶庚申。

旌表。

朱氏鄧家莊尙恭錫妻朱映禔女乾隆己卯年二十四寡貧能勵
志撫子女畢婚嫁。

劉氏鄧家莊劉聰妻劉中槐女乾隆庚寅年二十一八寡貧能勵志

撫子女五人皆成立。

戴氏樊邨張文龍妻戴文女乾隆庚辰年二十寡善事其舅教子以詩書。

王氏右所寨陳宗孔妻王文舉女乾隆辛巳年二十八夫亡善事姑子二人今年八十。

楊氏右所寨陳超妻楊守福女乾隆乙酉年二十三夫亡亦善事姑詩書教子有樊邨戴氏風。

里居無考列女附後

李紹韓志

陳氏劉弼主妻百戶陳世宗之女崇禎甲戌流寇破堡城強逼欲辱之必不從罵不絕口賊斷其兩臂猶罵遂斷其首以死。

沈華志

卷之五

聖

崔氏王世桂妻桂早卒崔織絰自活撫孤映斗成立斗年八十先崔卒崔生於萬歷癸丑卒於雍正辛亥享年一百一十九。

宇文氏適楊坊康熙年間氏二十五夫死撫孤有成歷節五十二年卒。

馬氏張居仁繼室康熙丁未年二十五生一女而寡與前妻子節力耕餬口棲身密舍苦守十三年一日有惡少爲馬作伐斥絕之越數日夜半糾夥突至馬拒門固守罵不絕口賊攻門急節揮刃峻拒賊忿舉火焚密閣家被害馬面目如生。

郭氏李顯俊妻年十九顯俊死遺子引未彌月家貧窘內外無倚郭守堅金石惟與一老婢躬績紡爲活計引稍長卽延師受書誨之以正引後爲諸生郭年八十三卒。

康氏李維世妻生一子六歲而維世死康持門戶葬翁姑遺柩撫

子成立。歷節四十一年卒。

王氏。何運泰妻。年十六歸。運泰死。王勺水不入口。將以身殉。轉念翁姑老病。且無養。因強食。拮据奉事無間。後翁姑相繼歿。王隻身營葬。運泰族人利王年尚少。謀奪其志。王聞知。大慟。嘔血數升。死。年三十二歲。邑人高其節義。共立碣於墓焉。

康氏。李某妻。康熙壬申。歲饑。大疫。康年二十六。夫亡。遺子女各一。姑殯在堂。康營葬。數年始就。葬日大雨。康衰服。扶輦行泥中。泣聲載道。女長甫嫁。而歿。子婚。生孫。媳又死。康素精女紅。善指授。師奉最多。卒年六十一。

錢汝器志

張氏。生員王應運妻。康熙己未。年二十六。寡。遺孤二歲。教育成立。亦爲生員。卒年九十二。乾隆丁巳。

卷之五

四三

旌表

景氏。張義妻。康熙丙午。年二十。義歿。斷指矢志。恩撫遺孤。卒年八十。乾隆丙寅。

旌表

蘇氏。張國傑妻。康熙年間。子歸。夫亡。子幼。家貧。蘇歷盡艱辛。撫孤成立。子亡。撫孫。恩勤倍篤。卒。年七十一。

趙氏。王建真妻。年二十二。夫亡。撫姪。以爲己子。至二十八歲。姪又亡。孤苦伶仃。紡績自活。卒。年六十三。

李氏。張景梅妻。年二十二。夫亡。無子。撫族姪。爲嗣。守節四十八年。現年六十有九。

王氏。張玉璽妻。年二十二。生子方十七日。夫死。家貧。翁老。王事翁盡孝。撫孤成立。守節五十四年。現年七十六。

趙氏王璟妻夫亡家貧矢志守節養姑育子克盡敬愛屢遭伯叔逼嫁不移其操現年六十有七。

閔氏李注妻夫亡年二十五苦節終身有司給匾獎之。

張氏李彩妻年十七于歸二十三夫亡無子撫族人子爲嗣家貧晝夜紡績撫子成立乾隆乙未學使嵇公榜其門曰冰心綿祚。

夏氏張秀妻年二十三夫亡遺孤三歲家貧夏撫孤成立苦節五十年。

劉氏高忠妻康熙間年十五歸高越六年夫亡時翁姑在堂遺孤方五歲劉仰事俯育不少怠守節五十八年乾隆乙未學使嵇公給匾曰貞操勵俗。

前志補遺附後

西魏武功縣孫道溫妻趙氏者安平人也。方俟醜奴圍岐州久之。

卷之五

四

無援趙謂城中婦女曰。州城方陷。義在同憂。遂相率負土晝夜培城。城竟免賊。大統六年。贈夫岐州刺史。贈趙安平縣君。北史列女傳



